

瀛社題襟集  
(二)

甲午新春 蔣夢龍書



# 瀛社題襟集

附：鄉土吟懷

發行人：許哲雄

主編：林正三

攝影：柯有澤

編輯群：吳秀真 郭先倫 羅順隆 王秋鵬

張明萊 翁正雄 洪世謀 陳岸

校對：林政輝 陳淑芬

臺灣瀛社詩學會叢書

國家圖書館出版品預行編目資料

鄉土吟懷 附：瀛社題襟集第二輯／林正三主編

社團法人臺灣瀛社詩學會 初版 2014〔民 103〕

ISBN：978-986-90209-1-6 (平裝)

初版 --- 發行人：許哲雄（臺灣瀛社詩學會叢書：特 8）

1. 社團法人臺灣瀛社詩學會

863.51

103003372

## 臺灣瀛社詩學會叢書—特 8

### 鄉 土 吟 懷

發行者：社團法人臺灣瀛社詩學會

網址：<http://www.tpps.org.tw/forum/portal.php>

地址：新北市瑞芳區中央路 48 巷 18 號 5 樓

電話：(02)2451-5151

發行人：許哲雄

主編：林正三

攝影：柯有澤

編輯群：吳秀真 郭先倫 羅順隆 王秋鵬 張明萊 翁正雄 洪世謀  
陳 岸

校對：林政輝 陳淑芬

印刷廠：俊昇印製廠有限公司

定價：新台幣：肆佰伍拾元整

中華民國一〇三年（2014）三月出版

著作權所有·翻印必究 本書如有缺頁破損，裝訂錯誤，請寄回本會更換

# 瀛社題襟集

## 序

臺自民紀肇建，實歷甲午洊至，間以吾瀛立社，適其創會在先，頃亦欣慶百年之紀，將迎五稔之禧矣。然則，憶斯悠悠歲月，猶能巍巍乎，嶽立鯤溟之北隅，樹幟遡興者，寧匪豐豐然，能步趨先賢之遺徽，慎守成無隕之所傳，承襲毋愧哉！況及比年，社務更蒸，社譽日盛，隆彼全臺，若鉢聲吟韻之響中南，亦靡以星霜之代迭，恆免受風雨之摧搖，迺得自助天助，贏得之歟。

緬之疇曩，凡所爲吟，雖曰不乏絕唱，不缺高吟，惟設題取材，仍不離乎風花雪月，草木鳥蟲之屬爲主。概多玄虛空泛之景，少涉切身攸關之物，易招言不由衷，或傳無病呻吟之譏者，厥其由斯乎。詩者，包羅既廣，範疇遼廓，靡囿之學也。然則，逝者既此，來者可追。倡導詩學者，既欲使後昆，免淫于舊篇，俾逸其囿守，破踟躕於躊躇之境，夫微更弦而易轍，求變而創新，其豈有方耶？

繫念及此，旨出于社。蓋社自立案暨今，命題既廣而博索，擇材少限乃龐採。由是，凡耳目之所觸，景觀之包羅，概可入題，韻且自拈，以開思路，意符鄉情。故爾，雷同奚滋，抄襲將杜。則戛戛獨造，文采斐斐。風調之煥然，願將非遠矣。唯著作既豐，其不付梨棗而能行世者，既信不可。何若略施點墨，藉以添錦，裨使區區之雕蟲，躍然紙上，益顯文藻之華麗，兼蓄美學之事功，豈非盡善盡美焉。更遑論懸斯一幅，而茅舍之增輝，厥亦由茲也。

曾文正公嘗云：「人之不善書，則如山之無木，人之無衣」，固非無因。攸往我瀛社先賢，工詩善書者，不計其數。嘗聞吟嘯游墨之餘，輒見撫琴作畫。然概多率性之舉，興聿即止，素罕影紀之存，亦殊公演之類。終難蔚成風氣，卒爲庶民凡眾所鮮知，此之故也。況世局迭替，詩書之爲用，縱已江河千里；士子復孜孜乎生計之未遑。其能擅詩書兩絕者，盛況雖有別既往，卻仍大有人焉。頃聞吾儔，且暮游刃詩書之匪懈，何止屈指；更有互跨詩書兩會者，亦數見不鮮。揆之時世，電腦網路如織，聲氣相通，一蹴可幾。詩之傳承，不惟詩會一途。衡其典藏之豐，與其傳輸之速，普今詩會諒必望塵矣。從而詩學之路，乍然多歧也。其曰：「詩書庶幾淪夷」，寧非杞人之憂乎？

適值瀛社百五周年之誕，爲示吾人心繫鄉土之情，爰集諸同儕雋詠鄉土詩句，彙近百篇。渥承 澹廬書會、中華民國書學會、基隆書道會、彰化縣書法學會、新莊書畫會諸大方家，暨本社善書之同人，惠賜千金之字。雄增文麗，斯有「瀛社百五周年鄉土吟懷詩書聯展」之葳功。溯之詩書聯展伊始，悠忽數載已然。詩書合璧之騰輝，洵非同日可言矣。則恢宏傳統文化之大任，膺肩吾屬，恐無旁貸也！願與諸昆共勉，引之爲序。

中華民國第二甲午元宵 許哲雄

## 【目次】

### 辛卯年（100）

#### 第二屆第三次會員大會

首唱：花博泛詠 ..... 005

次唱：茉莉花開 ..... 012

#### 元春組例會

首唱：慈母頌 ..... 017

次唱：暮春 ..... 024

#### 端陽組例會

首唱：塑化劑風波 ..... 029

次唱：兩岸自由行 ..... 037

#### 中秋組例會

首唱：椿庭 ..... 042

次唱：中秋即興 ..... 048

#### 冬至組例會

首唱：題詠台北景點 ..... 053

次唱：白髮 ..... 061

### 壬辰（101）

#### 第三屆第一次會員大會

首唱：題目自訂 ..... 066

#### 元春組例會

首唱：瘦肉精風波 ..... 075

次唱：懸崖勒馬 ..... 082

### 端陽組例會

首唱：台灣願景 ..... 087

次唱：暴雨 ..... 093

### 中秋組例會

首唱：懷詩聖杜甫 ..... 097

### 冬至組例會

首唱：勞工保險論見 ..... 104

次唱：臘月抒懷 ..... 110

### 癸巳（102）

#### 第三屆第二次會員大會

首唱：題詠雙北市景點 ..... 114

次唱：早春 ..... 122

### 元春組例會

首唱：春興 ..... 127

次唱：詩味 ..... 136

### 端陽組例會

首唱：防颱 ..... 142

次唱：冒雨尋詩 ..... 148

### 中秋組例會

首唱：良心 ..... 153

次唱：風雨故人來 ..... 159

### 冬至組例會

首唱：冬至瀛社團敘 ..... 162

次唱：歲暮 ..... 169

# 瀛社題襟集（二）

辛卯年（100）

第二屆第三次會員大會

時間：100年3月6日

地點：天祥路吉祥樓餐廳

收稿：48件 參加人數：63人

首唱：花博泛詠

左 王 前 先生選  
右 詞宗 翁正雄

左元右十一

林正三

寅年接卯展多時，花博鵲城妙設施。夢想能教生創意，未來畢竟顯奇姿。  
園區旖旎風光絢，科技尖新藝事宜。世界舞台榮一席，欣如有子耀門楣。

右元左四

楊東慶

繽紛錦悅北都懸，悅目怡心景色妍。武后催葩芳簇簇，莊生化蝶舞翩翩。  
如斯采綠詩情湧，最是題紅雅興傳。花博花開花百億，合教金谷寫新篇。

左眼右三二

蔡業成

花花世界競爭妍，魏紫姚黃孰佔先。四海嘉賓伸拇指，三台墨客獻詩篇。  
枝枝帶露招蜂妒，朵朵凝香引蝶憐。綠葉丹葩皆解語，人潮洶湧屢摩肩。

右眼左花

王宥清

萬紫千紅映稻江，欣來博覽興尤龐。園分四域栽花種，館展多元豁吟腔。  
恍步桃源塵俗遠，似觀瑤景慮煩降。雖疑議亦高人氣，美麗行銷譽國邦。

右花左二三

陳麗華

羈懷今日豁然開，不惜看花冒雨來。澹蕩春光多氣象，霏微煙景少塵埃。  
盈眸粉溼紅成簇，撲鼻香浮翠作堆。儼在丹青圖畫裡，儘多詩料任拈裁。

右四左十九

邱進丁

不管其中貶或歌，遊人湧入一波波。圓山站外公車織，美術館前舞蝶梭。  
環宇風華蘭出色，臺灣逸秀藝包羅。大佳船岸霓虹燦，百萬春潮欲漲河。

左五右十八

許秉行

花博鵲城冠宇揚，節能綠化領風光。色聲變幻彰科技，藝術縱橫隱典章。  
故事館中臨古蹟，未來境裏賞仙鄉。養生夢想親身驗，減碳心靈共主張。

右五左二八

陳麗卿

百卉紛呈花博臨，多元展演萬邦欽。紅嬌綠艷超娛目，水幕光簾倍賞心。  
偉構方舟供飽覽，精雕古厝動高吟。繁華轉瞬成塵土，莫負芳辰日浸淫。

左六右三一

郭三河

鵲城花博正斯時，萬卉飄香絢爛姿。接踵頻臨鷗鷺侶，連園秀發鳳鸞姿。  
未來畢竟新奇顯，夢想能教創意師。四海揚名歡喜詠，賞遊有伴子相隨。

右六左三一

蕭煥彩

鵲城花博盛登場，騷客閒來詠一章。夢想館中情可訴，名人苑內曲難忘。  
漫吟水岸虹橋美，小憩林園茗點香。國際邀來歌舞秀，多元大賞贊聲揚。

左七右二六

吳俐蓁

芳菲深淺滿鵲城，入眼街衢美景橫。茉莉媚人香迭迭，薔薇招蝶色相迎。  
寅年花博台灣現，卯歲仙妝國際呈。漫步園區頻駐足，丹葩錦萼任君評。

右七左二六

葉金全

千紅萬紫慶芳辰，雨潤鵲城草色新。花道池坊評苑藝，盆栽園圃展松筠。  
半年邀賞多遊客，百卉爭開艷照人。彩傘如龍長數里，蜿蜒羅列劍潭濱。

左八

孫秀珠

四季繁花出蕊宮，凝妝爭艷萬人中。山光水色無情碧，菊秀蘭芳別樣紅。  
科技聲光開眼界，鷗朋鷺友逐詩風。銷魂總在沉吟後，一任斜陽照晚空。

右八

張耀仁

蓬島寒流接踵來，忍觀花博跨年開。邦奢債舉全民背，尹侈錢燒主辦哈。  
眼耳嬉娛歡短景，財經敗壞苦長災。惟圖選票公然攏，詞貶何須倚馬才。

左九右二五

駱金榜

江城花博慶成功，國際名揚譽望隆。綺麗群芳幽雅顯，超高人氣艷姿豐。  
詩情美藝迎賓客，水秀山靈蔚樹叢。參展園區鮮色彩，繽紛寰宇耀瀛東。

右九左避

王 前

國壽期頤國運昌，北臺花博更輝煌。千間展館新流派，萬頃園區鬧艷粧。  
恍似上天開御苑，猶如大地舞霓裳。空前創舉誇寰宇，奕代聲名史筆揚。

左十右二二

陳淑芬

博花百億盛空前，驚動瑤臺請眾仙。一盞紅蓮開競艷，千株寒菊薦分妍。  
神奇夢想群芳炫，科技時新創意先。萬物欣榮春意好，賡吟共載太平年。

右十左十一

李珮玉

歡開花博藝文宣，蝶舞鶯啼在眼前。萬客來遊同賞艷，群芳競放互爭妍。  
雖言接踵行徐步，卻喜偕娘逛並肩。攝得慈顏依麗影，好將怡景付詩篇。

左十二右十五

林麗珠

花博鵲城展翠華，四園處處譽聲嘉。彩虹鋪地人歡歎，素手開葩客喜嗟。  
真相重呈越今古，流行環保減塵沙。自由夢想無邊際，創意空前世競誇。

右十二左二五

洪玉璋

北都花博世馳名，客擁如蜂數不清。老去尋芳饒逸趣，閒來賞勝富吟情。  
綺羅叢裡枝枝艷，紅紫葩中朵朵盈。百五億元高造價，有人稱贊有疑評。

左十三右二七

蔣孟樛

春光無限萬芳紅，花博宏開振海東。綠野鋪茵隨處美，名園競艷感人衷。  
剪裁別出天工妙，設計新奇氣勢雄。寶島而今揚國際，如癡如醉浴和風。

右十三左二九

林禎輝

萬紫千紅四處揚，客來排隊似龍長。觀花美景多歡洽，圓博風光數賞望。  
假日同遊欣有伴，平時獨自樂無疆。人潮擁塞如山海，一片祥和繞帝鄉。

左十四

張錦雲

中華國壽慶期頤，花博譽揚世榜時。各館主題臻妙智，分區創意絕新奇。  
風標圃象霓裳舞，錦簇豔增遊客痴。宛入大觀情不禁，全民力讚值褒詩。

右十四左三八

游振鏗

博覽會開排萬難，群芳競艷種千般。人潮絡繹耽花興，館閣琳瑯壯眼觀。  
省識佐農科技善，欣隨賦景藝文歡。春風散馥舒胸次，美麗稱聲處處刊。

左十五右二九

吳秀真

鵲城花博幸春嬌，美景盈眸雅韻饒。科技新奇凝創意，人文薈萃會今朝。  
龐奢價造榮光顯，靡巨債留民怨招。縱得令名寰宇震，貶褒自待後賢描。

左十六右三四

邱天來

鵲城花博壯台灣，建構巍然歷苦艱。地闢園區招遠客，徑迷芳草接圓山。  
風華國際誇無二，縹緲丹丘視等閒。象外雲煙多麗景，浮生樂得不知還。

右十六左二十

黃廖碧華

鵲城博覽美聲傳，遊客如蜂數萬千。艷麗奇葩嬌欲滴，清幽古厝雅無邊。  
稀珍植物迷人眼，燦爛燈光映水天。難得一窺花百種，頓增見識撼心田。

左十七

洪世謀

蕊宮盛會燦鵲城，七彩繽紛照眼明。到處芬芳來不絕，迷人景致喜相迎。  
能源環保方舟創，科技農經園藝呈。絡繹嘉賓皆嘆賞，台灣花博譽聲贏。

右十七左二四

簡上彬

萬國風情並在斯，尋春墨客賞芳蕤。遊人往復同欣樂，結綵繽紛共豔姿。  
看菊看蘭誠得妙，觀松觀柳亦稱奇。千秋盛會應難再，遂把吾懷寄此詩。

左十八右三十

陳漢津

博覽群芳索特刊，義工親切不孤單。流行舞蝶名人館，夢想迷宮故事壇。  
異國庭園花隧雅，原鄉景壁路橋寬。爭奇鬥豔非凡種，萬卉齊開倍壯觀。

右十九左三三

周福南

首都花博潤如油，卉海風華一望秋。藝館怡情環保旅，迷宮饒趣綠能遊。  
禪園草木連香徑，水岸星空共泛舟。太息官商誇懋績，民脂百億未良謀。

右二十左三十

洪淑珍

芬芳盛會舉鵲城，放眼嬌姿艷色爭。園藝賞心盆景雅，館區探勝樂聲縈。  
自然至美人偏愛，科技取奇花永生。展現綠能環保踐，亦興農利世揚名。

左二一右三五

陳保琳

展覽規模氣勢雄，輝煌造景奪天工。青蒼異草晶如玉，粉豔奇花賽彩虹。  
信步尋芳程自北，閑遊拾翠徑從東。萬頭鑽動人聲沸，只歎春光去太匆。

右二一左三二

黃祖蔭

一再吟花口也香，流行夢想最風光。圓山錦繡疑仙境，淡水霓虹似幻鄉。  
列國珍奇添異彩，神州古典著新妝。傾城戀者魂牽處，色目嘉賓共蝶忙。

左二二右二八

許哲雄

芳塵障眼筆能修，香海人潮共鷺鷥。爛漫瑤園連日賞，徘徊花館隔宵遊。  
豔疑潘令先妝點，樂與江郎偶唱酬。似覺武陵重作客，桃源韻事暢詩喉。

右二三

陳欽財

千紅萬紫似仙鄉，花博稻江百歲香。夢想成真呈動畫，未來現實化聲光。  
中西學陣欣情放，南北人潮樂意張。清淑舒和增旖旎，昇平寶島媲三唐。

右二四左二七

沈榮槐

異卉奇花千萬嬌，香飛十里伴人潮。容姿彩韻宜三顧，舞影歌聲動九霄。  
環保風生新建築，人文霧擁舊喧囂。遠來近悅頻稱譽，寶島榮華好地標。

右三三左三六

杜美華

花博尋幽喜氣洋，百年建國發光芒。探情思古名人館，夢想成真演藝場。  
科技節能宣理念，神奇彩卉襯芬芳。廣傳寰宇蜚聲譽，和唱胸懷逸興長。

左三四右三六

李玲玲

一覽英菲引領望，萬頭竄動失行方。但圓夢想親芳澤，不畏人龍冒曉霜。  
聲色奪眸名浪得，鮮香弗見孰思量。梅魂蕙嘆無顏面，花博花農喜若狂？

左三五

李宗波

電車遊覽興悠悠，百藝園區百卉妍。品茗茶坊人薈萃，觀摩劇院客聯翩。  
館探爭艷香飄逸，蝶舞繽紛影蹀躞。世博還輸花博會，名揚國際口碑傳。

左三七

李政村

花博繽紛客滿城，園街暢覽樂舒情。群芳競艷姿搖舞，藝館玄奇影像明。  
林苑景幽留雅頌，國都蕊展著光榮。市區處處芬馨佈，譽得全民讚美聲。

右三七

余美瑛

柳杉原木會嘉賓，日照能源電曜鈞。植綠高牆披翠蘚，礫間淨水溯芳津。  
東風御扇迴生態，錦卉嫣盤盡異珍。大用城邦思永續，浮花夢境可知辛。

右三八

王庚春

瓊葩千朵劍潭邊，太古巢巔品馥泉。台北城街排玉樹，圓山苑囿布金錢。  
非關濟苦添三釜，恰是留名易萬緣。百年煙花光一瞬，羅浮夢覺幾時鮮？

左三九右三九

楊錦秀

萬芳競艷滿鵲城，花博開張博好評。四海人潮來攬賞，一園草木自爭榮。  
展場變化新奇妙，嘉客招徠讚美聲。巧奪天工揚世界，春光綠野鳥飛鳴。

左四十

洪龍溪

北市花叢博覽中，群芳艷麗競爭雄。規模可比靈仙境，造景堪追世界風。  
來賞他邦皆雅士，參觀我國盡詩翁。玻璃館道呼時尚，人類交流喜氣融。

右四十

徐世澤

北台花博世稱奇，寰宇展區錦繡姿。創意新科凝智慧，養生勝景集聞知。  
千株異木迎遊客，七色彩虹樂粉絲。園藝繽紛多燦爛，騷人合詠百篇詩。

次唱：茉莉花開

左 詞宗 黃祖蔭 先生選  
右 洪玉璋

左元右六

徐世澤

茉莉花開雪白嬌，人民吶喊撼雲霄。欣聞網路英雄起，掀此民權第四潮。

右元左十七

陳保琳

茉莉花開起浪潮，不容專制腐王朝。自由民主權天賦，深化公平正義昭。

左眼右避

洪玉璋

雖無艷態鬪春嬌，蕊綻全球乍動搖。愛汝催生民主化，故教華夏更心焦。

右眼左三六

陳麗卿

為爭民主樹芳標，遍地繁開茉莉嬌。堅抗頑強獨裁宰，燎原烽火勢難澆。

左花右九

吳秀真

芬芳茉莉應時嬌，覺醒人權作指標。但把尊嚴留歷史，花開遍地蔚成潮。

右花左三三

張耀仁

茉莉花香舉世飄，非洲王氣黯然消。自由民主無邦界，兩岸何時播此苗。

左四右五

李玲玲

茉莉薰醒民主潮，串連網路會今朝。蒸黎革命為生計，寰宇花開怒火燒。

右四左二二

游振鏗

遍地花開茉莉嬌，古來苛政眾人囂。為爭民主能驚世，演變和平革命潮。

左五右二二

孫秀珠

民主自由頑抗潮，串連撻伐極權凋。花開四野誰能擋，網線功成霸業消。

左六右十六

洪世謀

茶中有汝暗飄香，移入冰壺陸羽調。網路傳來民主蕊，花開遍野應陳橋。

左七右十二

曾銘輝

一枝茉莉有歌謠，蕊壓千香細自嬌。海外神州新信物，花開民主蔚時潮。

右七左三十

蔡業成

茉莉花開野火燒，全球抗暴湧狂潮。推翻專制行民主，革命功成壯志飄。

左八右三十

楊志堅

茉莉情移革命飄，中東響徹起風潮。花開遍地千枝動，轉變民心鬧世囂。

右八左三一

王宥清

覺醒民權國際潮，花開茉莉世同嬌。殷期蛻變新思想，景闢來人幸福超。

左九右三六

杜美華

六月清香小苑飄，冰肌素質不曾驕。豈知革命人間事，名盛無端起浪潮。

左十右二七

李珮玉

民主花開引火苗，北非中國熾延燒。雖遭鎮壓終何用，茉莉風吹更遠飄。

右十左二九

黃廖碧華

茉莉花開萬里飄，自由民主已成潮。北非發起移東亞，但願功成暴政消。

左十一右十三

吳俐蓁

波斯引入育新苗，遍地馨香粉黛嬌。子夜客來稱上品，天南地北話通霄。

右十一

郭三河

茉莉花開萬里遙，香飛非北入華朝。人權自主民爭得，顯見三邦願遂饒。

左十二右二一

蕭煥彩

姑射仙娥下九霄，頭簪玉蕊透芳標。花開馥郁烹茶飲，競賦還思反暴潮。

左十三右三一

葉金全

迎陽茉莉馥香飄，吹向殊方革命潮。開得自由花盛放，和平歌唱震雲霄。

左十四右三三

楊錦秀

清芬六月韻高超，喚起人間博愛潮。花氣薰來神意潔，自由號角響沖霄。

右十四左二一

陳淑芬

潔白芬芳濕翠翹，麥秋花氣最高標。豈知一把焚身火，燒醒中東起怒潮。

左十五右二五

陳賢儒

民生重澤播黎苗，推轂招弓史認梟。茉莉花開傳遍地，嚴苛腐政霸權凋。

右十五左二八

張錦雲

遍開茉莉卓風標，一夕全球霸氣凋。民主終歸民所主，凱歌捷鼓貫雲霄。

左十六右三五

許秉行

民主風吹帝制凋，中東義舉壯黎苗。人啾苦悵啼痕背，茉莉花開霸者焦。

左十八右二四

邱天來

麥秋花氣見高標，潔白清香滿地嬌。茉莉一枝相映處，吹開六月湧風潮。

右十七左三七

楊東慶

北非雲湧極權燒，民怨潰堤成浪潮。網路迅傳蕃茉莉，伸張公義氣凌霄。

左十九

賴添雲

嫩綠新苞待燦宵，期傳怒馥萬方飄。焉知雪雨門山錮，骨氣叢存待旭朝。

右十八左二十

蔣夢龍

花開素蕊態無驕，引發人間革命潮。香氣染來能醒世，自由民主志沖霄。

右十九左三二

洪淑珍

茉莉精神氣勢驕，蜚聲今世仰高標。自由民主憑呼應，遍地芬芳見湧潮。

右二十左二三

陳麗華

苛政蒸黎怒氣燒，為人命似樹間蠅。寰球抗暴行民主，茉莉開花景可描。

右二三

邱進丁

香傳四座享清標，翠葉芳英豈自嬌。待得繁華君在位，山河易主正王朝。

左二四右三二

王 前

花開六月十分嬌，茉莉香飄起浪潮。民主借他伸正義，呼聲直唱到雲霄。

左二五右三七

洪純義

冬盡嚴寒老樹凋，煖春徧地革新潮。欣傳茉莉馨芳綻，喜訊如風撼朽朝。

左二六右三四

李政村

六月花開素蕊飄，問渠何事惹風潮。紛紛香氣憑誰賞，要識幽妍比雪嬌。

右二六左三四

翁正雄

花開遍地起風潮，茉莉詩吟寄意饒。瀛海驪探揮妙筆，看誰雁塔姓名標。

左二七右四十

黃明輝

頻年糧斷恨難消，屈想狂夫擲玉貂。烈魄高燒千火燄，此花遍插可同堯。

右二八左四十

駱金榜

古來苛政群黎抗，網路認同爭反潮。茉莉花開民主化，臺灣社會共同驕。

右二九

歐陽開代

寒霜炎日百花凋，茉莉北非何獨嬌。陣陣薰風環宇動，荊芳影隱苑迎堯。

左三五

王庚春

清芳雅潔免畦饒，腐朽壤園香愈超。菲北民潮傳茉莉，馨飄寰宇革貪梟。

左三八右三八

余美瑛

茉莉風雲帶暗潮，漫燒四海起商飆。民聲揭鼓豺狼伺，細問蒼生可筆描。

左三九

周福南

芳菲白蕊挹清飆，曲徑幽香寶島嬌。茉莉花開掀革命，北非民主殄魔妖。

右三九

鄭貴真

西風舞動蔚成潮，茉莉飄香透紫霄。未懼晴空傳霹靂，花開自在任逍遙。

## 元春組例會

時間：100年4月24日

地點：天祥路吉祥樓餐廳

首唱：慈母頌

左 吳素娥 小姐選  
右 詞宗 張儷美

左元右三二

許哲雄

陟屺吟遲暮，倚門將不堪。千秋歌反哺，數語憶搖籃。  
還鮒賢聲著，埋錢淑訓參。無求因子貴，萊服報恩覃。

右元左眼

蔡業成

春暉無限暖，稚子遍身舒。負襁三年整，懷胎十月餘。  
青燈課兒女，白髮倚門閭。每憶蓼莪句，劬勞最感予。

右眼

張民選

慈愛言難盡，恩深舉世推。懷胎堪茹苦，教子則忘疲。  
掌上珠憐女，心頭肉護兒。北堂情累重，反哺豈能遲。

左花右二七

張耀仁

親情深似海，母愛大如天。報德知多少，沾恩感萬千。  
岳忠中外仰，孟義古今傳。淑範兒孫頌，慈顏笑晚年。

右花左五

李宗波

母育群兒秀，含茹歷苦辛。誰吟東野句，我頌北堂春。  
闡範芳徽著，慈暉懿德臻。坤儀人敬仰，寸草報恩親。

左四右八

駱金榜

母節頌慈萱，芳徽耀德門。忠精安社稷，懿訓示兒孫。  
畫狄坤儀著，和丸典範存。春暉欣共沐，養育感親恩。

右四左六

連珊屏

春暉千古耀，照徹世間明。母抱懷胎苦，兒思養育情。  
艱辛培長大，教化盼崢嶸。此日賡詩頌，萱花歲歲榮。

右五左三六

陳碧霞

哺乳三年苦，親情一世徽。劬勞忘雪鬢，懿德烙心扉。  
恩比乾坤大，功同日月輝。世間人子女，至孝報春暉。

右六左十四

林麗珠

北堂如麗日，長暖子心房。十月懷胎苦，三年襁褓忙。  
縫衣禦風雪，炊飯煲羹湯。欲報慈恩晚，思親獻頌章。

左七右九

王 前

母愛無窮盡，春暉寸草溫。劬勞懷往日，辛苦憶前恩。  
婺宿長天耀，慈光大地暄。詩吟東野句，筆頌北堂萱。

右七左二二

楊錦秀

十月懷胎苦，三年哺乳辛。萱堂勤訓育，儒子學忠仁。  
懿範千秋頌，儀型萬古新。慈恩言罔極，佳節倍思親。

左八右二十

洪世謀

孺慕春暉暖，持家歷苦辛。入門為長媳，教子作賢人。  
廚下翁姑順，園中稻麥巡。大恩深似海，佳節孝重申。

左九右二九

許秉行

母節感恩深，劬勞鞠育欽。宿鴉知反哺，遊子誌前忱。  
慈眷三年乳，春暉寸草心。針絲情更切，孝道正清音。

左十右二五

邱天來

萱花開孟夏，紀節想芊芊。孺慕情殊切，思親意更綿。  
固知恩罔極，難報德無邊。母愛如春暖，溫馨播大千。

右十左三一

葉金全

千家歌母愛，撫育自劬勞。襁褓雙肩負，胼胝盡日操。  
慰萱期子秀，折桂冀名高。感此何為報，誠心祝壽桃。

左十一右十六

楊東慶

天使化慈親，為兒守護神。劬勞甘咽苦，鞠養樂含辛。  
爭忍紅顏老，誰教白髮新。長懷風木戚，愧念北堂春。

右十一左十八

洪玉璋

聖善為人母，功高德配天。斷機良可範，刺背更堪傳。  
兒女迎佳節，笙歌醉綺筵。懷恩余倍切，作賦紀年年。

左十二右二一

郭三河

育子費精神，同聲讚母親。甘霖滋寸草，暖日照三春。  
永憶針針密，長懷句句真。萱堂恩未報，遠隔夢慈頻。

右十二左三五

孫秀珠

北堂萱澤美，懿德子孫傳。刺背期忠孝，移家誨聖賢。  
劬勞無日月，鞠育復週天。罔極恩難報，惟祈福壽綿。

左十三右十五

陳麗華

自憐萱見背，頌母愧毛錐。訓子才兼德，從夫孝且慈。  
筋疲春稼穡，骨瘦手胼胝。我痛空回首，晨昏反哺遲。

右十三左二一

李珮玉

最是母懷中，溫馨勝錦絨。遭憂愁可解，受困惑能通。  
子女承恩厚，人鴉反哺同。望娘追鶴壽，容我孝慈躬。

右十四左四十

盧麗美

懷胎雖苦楚，教養更艱辛。母愛乾坤大，慈暉日月伸。  
劬勞開覺路，撫育指迷津。懿德千秋頌，兒孫孝悌親。

左十五右三五

鄞 強

銀髮如霜雪，慈恩浩似天。劬勞無計日，克苦守長年。  
縱有鴻圖展，應當孝悌先。偉哉歌懿德，聖善媲神仙。

左十六

杜美華

堂北春輝映，殷殷育子辛。靈萱揚馥郁，寸草仰慈諄。  
若許詞文述，卻嫌書葉貧。恩深思罔極，圖報恨無辰。

左十七右三三

張錦雲

古今歌聖善，懿德識唯真。舐犢慈情郁，斷機孺訓申。  
劬勞安宿命，護育貫全神。罔極坤恩沐，焉能不孝親。

右十七左十九

洪淑珍

春暉何罔極，鞠養愛深深。垂訓賢能勉，劬勞家務任。  
慈親恩不忘，令節賦高吟。人子思烏哺，承歡盡寸心。

右十八左二三

余雪敏

慈母恩如海，劬勞撫育忙。青絲添白髮，額上刻滄桑，  
何處佳餚善？唯親滋味長。勸君心繫念，定省問安康！

右十九左三二

吳秀真

舐犢情何切，春暉入北堂。淑儀真典範，令譽自芬芳。  
慰我孤鸞淚，隨緣濁世颺。恩深無以報，借筆述馨香。

左二十右二三

吳俐蓁

母愛最難忘，渾如日月光。持家無異念，教子有馨方。  
晨起牛羊飼，燈前針線張。大恩非筆墨，懿德比天長。

右二二

洪龍溪

人間慈母愛，寸草報春暉。十月懷胎苦，三年哺乳巍。  
持家兒女護，展業志心揮。今古萱堂範，親恩合頌威。

左二四

李政村

育教啟心扉，辛勞願未違。三遷才智溢，萬世譽芳徽。  
筆點精忠去，槍揚報國歸。賢慈千古頌，懿德勝山巍。

右二四左三七

姚啟甲

自古慈恩厚，人間母愛豐。斷機垂懿德，刺背訓精忠。  
菽水承歡樂，萊衣娛舞融。休嫌娘老喋，惟孝沐萱風。

左二五右二六

徐世澤

十月懷胎苦，育嬰哺乳難。受傷頻餵藥，求學並加餐。  
離別因謀食，叮嚀應禦寒。毋忘慈母愛，日日報平安。

左二六

余美璞

生是東瀛客，少成民國兒。須臾承膝下，奄忽近雲涯。  
著意傳欽愛，留心養聖基。萱暉書賦跡，鏡影髮華時。

左二七

李玲玲

慈闈迎耄歲，親友聚言歡。鶴鰥椿萱影，兒孫龍鳳般。  
持家勤且儉，教子嚴濟寬。何以春暉報？誠祈百二安。

左二八右三一

林忠義

孕育懷胎苦，貞心尚母風。賢才期輩出，懿德媲天同。  
養子胸襟抱，孝親志念隆。慈恩歡得報，讚頌北堂功。

右二八左三三

黃廖碧華

書香賢淑女，自幼學詩詞。立志幫忙婦，終年助產兒。  
相夫教子女，成器耀門楣。懿德人崇敬，慈恩我日思。

左二九右三六

周福南

黃童失怙憐，寡母苦心研。舐犢劬勞育，忍饑乳哺先。  
春暉期偉器，孝悌慕高賢。米壽悲仙逝，慈恩瀚海鯤。

左三十右三四

蔣夢龍

春暉懷寸草，育我憶劬勞。恩比乾坤大，功同日月高。  
艱辛期願望，兒女做英豪。彤管揚芬永，千秋懿德褒。

右三十左三四

黃祖蔭

萱堂辭世後，慣作柏舟吁。不肖為遊子，何當反哺烏。  
鳴機陪苦讀，忍淚囑征途。日煖思慈抱，春風滿竹廬。

右三七

許又勻

深閨口澤遺，惆悵憶先慈。課女持家計，敦兒建業基。  
炎風耘豆翠，熾日沃禾滋。為子三餐足，娘身每日飢。

左三八右三八

陳淑芬

白髮增生急，慈顏即望溫。持家勞復苦，抱節忍何論。  
共養心開闊，無愁眼力昏。期頤身尚健，光耀北堂暄。

左三九右三九

林玉枝

春暉時憶念，教子愛心千。餵乳慈如佛，縫衣雅似蓮。  
端裁鞋樣巧，細繡枕花妍。律己留風範，尊夫守德賢。

右四十

陳欽財

春暉昭日月，懿德蓋江洋。慈母明倫繼，遊兒盡孝長。  
堅扶無棄意，鞠育有萱堂。罔極劬勞頌，坤恩萬世揚。

次唱：暮春

左 詞宗 黃祖蔭 先生選  
右 林正三

擬作

林正三

隴頭百卉漸依稀，錯認東君勢已微。忽見桐花留後勁，不因春暮減芳菲。

左元右十三

李政村

春雷未響送春歸，蝶少鶯愁氣候非。不雨寒流頻陣迫，祈天霖降護邦畿。

右元左三六

張錦雲

把盞陽關挽馥菲，三春蓬島富新機。齊歌浩氣昌詩雅，及握浮生志不違。

左眼右十九

黃廖碧華

庭園又見落花飛，草木枝頭換綠衣。粉蝶紛紛出牆去，滿懷惆悵送春歸。

右眼左六

許又勻

落英水面映餘暉，紅瘦郊原稻漸肥。試問人間誰解得？年年此刻悵春歸。

左花右二三

葉金全

花博蘭亭映曉暉，展期明日賦人歸。千芳萬艷隨春去，惆悵江頭蝶影稀。

右花左十五

張耀仁

涉園已見失芳菲，穀雨濛濛下四圍。戴笠農夫勤稼穡，蓬壺雖小富生機。

左四右四十

陳麗卿

一年花事已將歸，綠暗紅衰蝶影稀。有限韶光如轉瞬，勸君惜取眼前緋。

右四左二九

洪玉璋

獨上高樓望夕暉，百花催落更紛飛。詩吟頻觸家鄉思，有客天涯悵未歸。

左五右十四

陳淑芬

老盡東風感慨非，鶯啼亂葉送芳菲。浴沂把酒斜陽外，欲惜殘紅醉幾希。

右五左三二

洪世謀

辛卯暮春春雨稀，農民播種寸心違。築巢翠鳥沾沾喜，兩樣情懷野廟祈。

右六左九

李宗波

一園錦繡未全非，醉遣幽懷願不違。成卷憐香詩永在，東風回首思依依。

左七

駱金榜

韶光將盡失妍菲，三月東皇駕欲歸。燕語鶯聲聽暫杳，繁華過眼悵吟微。

右七左二二

周福南

鶯愁蝶怨挽芳菲，金谷猶然對夕暉。夜雨落花韶景盡，吟詩把酒送春歸。

左八右二一

孫秀珠

徙倚欄杆望四圍，卻憐紅紫落紛飛。留春無計空惆悵，更涉芳園未忍歸。

右八左二一

杜美華

杜鵑啼血惜春歸，柳絮飄空雨濕衣。老盡東風驚客夢，一年花事感依依。

右九左十一

甄寶玉

三月花殘蝶影稀，雛鴉何忍送斜暉。今朝不是無情感，痛失慈親淚滿衣。

左十右二九

陳麗華

綠陽煙裏落花飛，芳草相催奪色緋。忍見陌頭紅杏雨，流鶯有恨景全非。

右十左避

黃祖蔭

謝豹聲中春欲歸，俄驚綠暗訝紅肥。清明已過甘霖少，甚盼雷公顯一威。

右十一左三三

郭三河

九十春光不久歸，邀朋山野看芳菲。多情楊柳千絲挽，莫使東風帶翼飛。

左十二右二四

王尚義

偷閒結伴逐雲飛，望斷煙花散翠微。一路流鶯啼不住，聲聲都為恨春歸。

右十二左二六

林麗珠

韶光九十見將歸，樹密花疏野草肥。驀覺鬢邊添雪色，吟心猶欲彩毫揮。

左十三右二六

余雪敏

蓬萊三月尚芳菲，百卉繽紛伴綠肥。莫待薰風催夏至，行吟郊道送春歸。

左十四右三一

連珊屏

殘香敗絮感依依，蝶影搖風燕子飛。莫怨闌珊花事老，滿園春色已將歸。

右十五左三九

盧麗美

九十春光去欲飛，情生惆悵志無違。及時奮起屠龍技，過眼繁華悟妙機。

左十六

許哲雄

東君漸去景將非，香淡花殘蝶影稀。林外鶯啼何不止，未甘梅雨亂天機。

右十六左十八

陳欽財

蝶忙鶯老綠楊飛，露笋痴期杏雨微。水庫掀泥生計拙，熙和社稷仰天機。

左十七右三九

林忠義

三月殘春鳥語稀，千花搖落逐風飛。今宵祖餞留君醉，蜂蝶無知戀夕暉。

右十七左二八

黃明輝

纔過寒春近色微，山空客去蝶先歸。孤芳淡日驚相失，最惱此時人也非。

右十八左二九

王 前

初霽山光曉露微，離枝艷蕊逐風飛。傷心無計留春駐，唯有題詩送夕暉。

左十九

楊錦秀

韶光欲老百芳飛，蝶恨鶯愁晝掩扉。花事銷魂難綰客，騷人無計阻春歸。

左二十

吳俐蓁

清明猶見著寒衣，穀雨天教風信違。聞說桐花花未綻，望雲春晚故依依。

右二十左二七

鄧 強

杜宇聲乾對落暉，題詩贈別願無違。騷朋踐約韶光送，酌酒高歌妙筆揮。

右二二左二三

楊東慶

韶光九十送春歸，綠暗紅稀景漸非。惟願繁華常久駐，憐香未忍感依依。

左二四

邱天來

棟花風過惜春歸，四處留香興不違。最愛撩人多麥氣，綠陰詩味映斜暉。

左二五右二五

李珮玉(左詞宗取兩位左二五)

今朝又見落花飛，漫步溪山近夕暉。遇此春殘難捨興，尋詩柳岸更依依。

左二五右三十

李玲玲(左詞宗取兩位左二五)

春光九十忍將歸，綠減紅衰蝶影稀。欲借丹青藏淑景，更憐幽韻惜殘馥。

左二六右三四

歐陽開代

烟沉綠暗減芳菲，鶯遠燕來新蝶飛。春色榮華駒隙似，通宵秉燭弄珠璣。

左二七

余美瑛

樹擁溪邊夕照微，山浮雨後翠嵐圍。將歸杏影添寥寂，三月扶桑掩涕歔。

右二七左三十

洪淑珍

柳暗花殘春欲歸，江樓遠眺興無違。悠悠銀浪鷗眠穩，如此烟光亦忘機。

左二八右三二

蔣孟樑

柳絮飄揚惜落暉，畫簷驚見燕來歸。鶯啼蝶怨春將老，徧地殘紅滿院飛。

右二八左三七

許秉行

千紅萬紫競芳菲，馨覺園林溢四圍。高閣春深人似醉，花前日午蝶紛飛。

左三一右三六

黃天賜

深紅淺紫伴霞飛，綠滿人間遍野肥。歲月匆匆催老至，年年空過送春歸。

右三三左四十

陳賢儒

花殘又感草芳菲，乍見蓮塘秀釣磯。墨客踏青情未減，幽風一幅絢珠璣。

左三四

簡上彬

東風煦煦啟衿衣，似道思留不願歸。此恨綿綿無有盡，都成暑氣沁芳菲。

左三五右三八

吳秀真

寒逐暮春花瘦蕊，枝頭鶯鳥鮮啼飛。低溫頻襲時分亂，束手閑居看冷扉。

右三五左三八

林禎輝

春日滿中使眾祈，千花萬觀不忘歸。人生得失何為樂？養性修身道莫違。

右三七

蔡業成

春光九十落花飛，蝶恨鶯愁冷翠微。綠草垂楊紅杏雨，王孫有恨寸心違。

## 端陽組例會

時間：100年7月24日

地點：天祥路吉祥樓餐廳

收稿：四十八件

首唱：塑化劑風波

左 詞宗 劉清河 先生選  
右 陳麗華

左元右十七

吳東晟

東瀛核變禍仍紛，塑劑居然入起雲。掩秘不掀沉舊案，驚天一報訝新聞。  
招牌金字堪悲笑，食品黑心難辨分。豈但惡名傷國譽，暗摧人命亦推君。  
左詞宗評：老成之作。意在溫柔敦厚之中，且寄慨無窮。允推為壓卷。

右元左十九

楊東慶

驚聞塑化普天侵，毒捲全球幾欲沉。主管應當嚴究辦，商人自是守規箴。  
何堪敗德評論在，豈忍違仁感慨深。罔顧健康朝野憤，生財有道莫惟金。  
右詞宗評：整體寫法層次分明，句形變化多元

左眼右十九

邱天來

劑名塑化誤肝腸，消費驚呼亂一場。惟利是圖嗤市儈，攢營枉法實奸商。  
情淆食品千夫指，序擾街衢大地傷。法理難容終自斃，黑心毒害喪天良。  
左詞宗評：珠圓玉潤，非老手莫辦。

右眼左三九

游振鏗

塑毒驚醒今世人，染汙大地更傷身。商家為利心何惡，邦譽蒙羞信欲淪。  
食品標明當務實，貨源銷毀莫因循。恢恢法網不疏露，梟輩嚴懲安兆民。  
右詞宗評：寫法老練對句亦工。

左花右九

歐陽開代

一滴鳩漿千鼎烹，巧調香味扮參羹。無疑入口柔腸蝕，有意斂財奸賈橫。  
尚望綱張邪轉正，殷勤道佈賊翻卿。飢餐渴飲祛煩慮，瓊液蓬萊寰宇縈。

左詞宗評：起承有致，句法圓融，尤能以吉祥語作結。知作者不俗。

右詞宗評：整體通順 轉承亦佳

右花左三一

洪玉璋

起雲塑化毒存疑，消費之人那得知。流竄商場驚未定，檢查官府責難辭。  
徒拖累月焉能忍，故作瞞天劇可悲。傳遍全球傷國譽，食安速決莫遲遲。

右詞宗評：一氣呵成對仗亦佳

左四右三五

姚啟甲

科技多元日萬千，物名塑化盡工研。奸商逐利良心昧，鳩酒偷天食品填。  
龍鬼佛天同震怒，歐西邦國不成眠。諄諄寄語司權者，正視民生執法堅。

左詞宗評：造語出新，立意不同凡響。允推為上駟。

右四左十四

許又勻

鯤瀛產品令名彰，塑劑汗沾舉國惶。百業蕭條商譽損，兆民惆悵體靈傷。  
金車信實人欽仰，義美誠真眾頌揚。害理傷天終有報，高瞻守德步康莊。

右詞宗評：獨一將廠商名入題 自有風格

左五右避

陳麗華

黑心產品惹風波，重利商人似著魔。有毒無形防不及，因貪致害罪如何？  
色偏美白真材少，味太香酥誘餌多。畢竟病常從口入，衛生第一莫蹉跎。

左詞宗評：立意頗善，對仗工整。一結尤佳。

右五左三八

陳淑芬

黑心塑化震全台，厚利爭趨釀毒災。加料起雲藏禍害，經商合法賺錢財。  
良知枉顧蒸黎苦，世道沉淪社稷哀。幸有英雄楊技正，勇為見義撥雲開。  
右詞宗評：轉承不錯 句法老練

左六

杜美華

起雲調劑禍人寰，塑化荒唐見一斑。奸賈貪婪違道德，黎民毒害亂安閒。  
名聲重擊台灣島，品譽貽嗤國際間。返樸天然須自省，矜憐脩性濟時艱。  
左詞宗評：由內向外看果禍及全民，由外向內看應真該自省。

右六左二九

李宗波

起雲塑化必颶颶，席捲三台肇禍殃。貨值瘋狂山倒海，骨牌效應雪加霜。  
商家生意名譽損，經濟衰頹景氣傷。難得吾邦良對策，穩行戒忍獲安康。  
右詞宗評：喜歡頸聯 整體寫法也不錯

左七右十一

邱進丁

奸商惡質痛心肝，食品多含損命丹。飲料危人忙下架，專員驗毒動高官。  
把關疏漏全民禍，用藥頻繁塑化殘。檢測宜嚴須謹慎，良優體制保平安。  
左詞宗評：能各盡其職，則無愧於心矣。

右七左三三

洪淑珍

塑劑毒人真相浮，全民撻伐更擔憂。奸商嗜利良心昧，漫畫析疑佳話留。  
但見官司忙緝捕，偶聞業者暗銷售。何當管制除公害，加重量刑儆效尤。  
右詞宗評：反應時勢 句法亦佳。

左八右三七

郭三河

塑化風波舉世烘，全民盡是可憐蟲。幼童受害哀孱體，黔首遭殃痛寸衷。  
荼毒奸商能應讖，飭節良吏喜成功。營存德信謀長久，斂利由來轉眼空。  
左詞宗評：寫實之作。

右八左二五

張民選

痛聞塑化劑污名，毒豈傷身世震驚。商道無遵悲賈客，官方有責愧蒼生。  
傳媒鼓動人心亂，經濟衰危市面清。吾輩自嘲多健忘，風波未息早移情。  
右詞宗評：整體不錯，更喜歡後二句。

左九右二五

陳漢津

飲水糕湯醬醋茶，匡前塑化起雲沙。奸商猛放殘身蠱，技士窮追劣棗瓜。  
普世貪風乖逆旅，蒼生懸念幸當家。因源染止人工品，愛啖根莖果菜花。  
左詞宗評：能從此風波中轉啖蔬食，作者不俗。

左十右二三

楊錦秀

珍味台灣四海揚，因遭塑化毒閭鄉。一人為利施奸計，百姓無知卻受傷。  
欲淨風波平惡浪，應懲貪慾息災殃。回歸太上羲皇世，產品天然美味長。  
左詞宗評：平實之作誠屬不易。

右十左十六

陳麗卿

塑毒殃民五內寒，奸商只顧黑錢攢。攫拏暴利眸尤亮，泯滅良心夢豈安。  
摻飲入餽香縷縷，致癌喪命鬱團團。風濤暫息人餘悸，司責機關力恐殫。  
右詞宗評：句法變化佳

左十一

洪純義

晴空霹靂一聲雷，颳起陰風掃不開。瀆職千官渾莫識，搬財五鬼任施災。  
唯求塑化輕成本，那管昇雲性命催。寄託揆司多負責，嚴關把守勿重來。

左十二右三十

張耀仁

本期餐飲益延齡，塑化成災不忍聽。食品安全遵典範，珍饈產製合芳馨。  
無能政客應知悔，受害黎民要喚醒。惡習奸商清理後，春盈寶島福盈庭。

右十二左三五

沈榮槐

盡心檢測探根由，石破天驚恨不休。商賈黑心興禍害，黎民紅淚起悲愁。  
風波震盪全球懼，影響深長舉國羞。重振新機彰信譽，利群敬業展宏猷。

左十三右三四

黃廖碧華

塑化風波震九州，驚惶失措惹人愁。無知百姓徒身病，不肖商家只利求。  
解決危機施厲法，提高品質覓良謀。推行公德民心定，食物安全宿願酬。

右十三

周福南

塑劑無味無色呈，起雲合化媚雙睛。奸商重利黔黎苦，佞吏顛預社稷驚。  
鯤島珍饈沾毒素，小龍奇跡浪虛名。誰言遺患除難盡，重典嚴刑挽國聲。

右十四左十五

許哲雄

民食為天自古該，嘗鮮食旨豈當媒。膏腴沁齒人工偽，糟粕垂涎塑化催。  
毒藉調羹商不義，庖爭入饌宦無才。蒼黔始識穿腸劑，饜飫雖香口慎開。

右十五左二六

黃祖蔭

塑化多端日用豐，摻和食品則幫兇。奸商計較低成本，暴利頻增大恐龍。  
一旦研幾傳害命，全民指摘莫包容。官員出面追查急，法院開庭未放鬆。

右十六左二二

黃明輝

商奸古訓今猶是，害物虐人爭斂忙。受病容愁親不捨，擔心體弱罔多惶。  
自良感覺哀汗吏，無奈悲酸困善腸。好譽瞬間如鼎破，何時磊落再嚐香。

左十七右二四

李玲玲

尋常飲食豈能無，毒劑風波久矣夫。只嘆奸商蔽心性，焉知淺識受欺誣。  
當權失職將何奪？悖道營私唯利圖。塑化禍遺人恐絕，十方撻伐不容汗。

左十八右二二

翁正雄

塑毒災傳入夏時，一波未了一波滋。普查食品多淪陷，呼請官方有作為。  
法辦奸商除禍首，詩披忠膽護邦基。殷勤寄語仁君者，愛國安民速拯危。

右十八左四十

陳保琳

塑毒浮雲亂眾心，民生經濟恐遭侵。健康安忍因招損，口慾寧辭不敢尋。  
失德商家令髮指，無辜百姓費沉吟。當思政策相宜否，放眼將來仔細斟。

左二十右三一

王 前

塑化劑今猶沸揚，奸商罪惡此昭彰。添加食品遺餘症，泯滅心君劇可傷。  
危害全民懷耿耿，忍看舉世感惶惶。蒼生期早風波遠，還我無憂福壽康。

右二十左避

劉清河

媒體開聲報禍根，安寧社會信難存。聖心載道仁何在，利字當頭智已昏。  
塑化劑堪摻食品？起雲散怎畏人言。有司此刻那兒去，者是謠傳不用煩。

左二一右三九

康濟時

塑化烏方毒大千，一波未靖一波連。害人害己靈台背，毀國毀名商譽蠲。  
民食為天安要首，官監若電速當先。非常風暴非常法，物禁添加品自然。

右二一左二三

蔣孟樑

由來科技日翻新，塑化彌漫害世人。劇毒暗偷參食品，奸商貪吝爲錢銀。  
三臺亂象應堪慮，百姓無辜何處伸。重返自然歸太上，胸懷清靜享真淳。

左二四右三三

余美瑛

染化馨芬得起渾，奸商殄作撼瀛鯤。徒令塑劑千秋禍，終斷嘉聲百業幡。  
鬻利分明身外物，涵真蘊養世間源。何由小吏懸神尺，不見高官骨硬魂。

右二六左三二

陳碧霞

新聞頁頁震當今，塑劑摻銷飛禍臨。百姓無知終日飲，奸商競利歷年侵。  
嚴懲重罰盈雙耳，染疾傷童亂寸心。人命關天休大意，綢繆未雨莫唯金。

左二七

蔡業成

黑心塑化釀風波，狂掃全台歎奈何。市肆奸商圖暴利，家居百姓受煎磨。  
西歐東亞皆關注，飲食生醫盡網羅。信譽崩盤人側目，從嚴懲罰起沉疴。

右二七

葉金全

食品加工亂滲填，益生菌裡起雲煙。果王配製違人道，塑劑增添反自然。  
廿載污源傷渴飲，一時檢驗出波顛。始知毒害言難盡，每為斯情感萬千。

左二八右三八

徐世澤

豈伸塑毒震全球，技正掀摻把毒揪。受害廿年調口味，無辜每日滿身留。  
加工食品聲譽降，常用糖漿消費憂。檢驗把關查緝密，清除惡賈解民愁。

右二八

甄寶玉

塑化沾污食品中，黎民惶恐怨無窮。鼠狐毒害唯圖利，堂廟嚴懲尚秉公。  
保健生涯原有道，自然營養勝加工。台瀛產業蒙塵垢，清譽重光志一同。

右二九

吳秀真

塑毒延燒憂患堆，震驚寰宇禍瀛臺。黑心商廠貪痴陷，化劑汗羹食品培。  
當政無能威自喪，唆安有險惡皆來。民聲載怨心惶恐，忌口慎防香僞災。

左三十右四十

李政村

衛署群英未檢真，廿年膠化害全民。商場失信名聲損，國譽難堪痛罵頻。  
食物保存皆染毒，求醫藥品也傷身。添加製造心邪惡，論罪追查判果因。

右三二左三四

陳欽財

塑劑風波滾滾強，俄而四海聚焦光。頻衰腎胃危身體，逐損心肝害健康。  
廿載生靈侵百害，三台活計近千傷。全民性趣全球後，飲食嚴明享吉祥。

左三六

許秉行

商家下架萬堆瓶，大眾聞之臉鐵青。食品安全疏準則，衛生機制實離經。  
陽間病變閻人相，地府冤增絕症靈。戕害庶黎心險惡，嚴懲塑毒莫輕刑。

右三六左三七

林松喬

澆漓世態慾焚天，腐化人心感萬千。塑毒橫行污染劫，起雲遍佈禍災延。  
奸商巧詐良知泯，罪惡嗔貪失德愆。殷望有司籌善策，狂瀾力挽掃陰煙。

次唱：兩岸自由行

左 洪玉璋 先生選  
右 詞宗 康濟時

左元右十三

郭三河

兩岸三通任自由，喜悲參半論無休。繁榮經濟商家樂，社稷安全令眾憂。

右元左三十

杜美華

五紀分離兩岸憂，一朝開放自由遊。平台對等捐私見，莫蹈前車善導謀。

左眼右三二

劉清河

黃山景秀臺胞訪，陸客明潭作勝遊。畢竟濃情猶一脈，何須長久記恩仇。

右眼左三六

唐 羽

山海操戈甲子秋，如今一笑泯恩仇。競傳木馬屠城事，猶盼荒唐化杞憂。

左花右五

林松喬

三通肇啟熱交流，接踵摩肩暢自由。寶島風情欣體驗，施行民主最堪謳。

右花左三三

王尚義

揮別威嚴復自由，雲山如畫任遨遊。西風人去三千里，北地鷗來八月秋。

左四右六

張耀仁

推行民主勝神州，陸客來台喜自由。好是同文無隔閡，互榮互惠適時謀。

右四左三七

陳淑芬

兩岸開通互唱酬，山村野店任悠游。人文素質須培養，民主民生盾與矛。

左五右九

蔣夢龍

海峽封關六十秋，而今始得個人遊。滿街陸客興經濟，民主風潮鐵幕收。

左六右十九

許又勻

兩岸乖離數十秋，政爭肇禍萬家愁。今朝開放雖言好，古訓防人慎運籌。

左七右十六

蕭煥彩

兩岸三通歷幾秋，如今開放自由遊。去除統戰無拘束，互創雙贏策遠猷。

右七左十四

李晨姿

直航兩岸是潮流，陸客來臺許自由。政策寬鬆多著意，小心駛得萬年舟。

左八右十四

邱天來

一笑從前泯宿仇，更看兩岸熱交流。放寬陸客觀光策，要示蓬萊美政收。

右八左二九

陳保琳

兩岸觀光律法修，和平互重作交流。工商促進榮經濟，民主施行望早籌。

左九右三五

蔡業成

兩岸融冰已數秋，名山勝水樂遨遊。而今來往尤方便，結伴孤身任自由。

左十右二十

沈榮槐

兩岸烽煙已罷休，往來互惠展宏猷。征途絡繹添如意，百變行程樂自由。

右十左十八

李宗波

開放三通壯旅遊，商人笑面慶豐收。和盟本是康安事，隱隱騷翁覺有憂。

左十一

陳碧霞

兩岸舟行更自由，掀開寶島有何差。登瀛悲喜仍參半，敵友難分怎不愁。

右十一左二八

吳東晟

我欲乘風歷九州，聞君涉海四方遊。登瀛登陸皆無礙，兩岸行蹤漸自由。

左十二右十五

吳秀真

兩岸三通政策謀，行閒個旅最悠游。百行業績頻佳創，互動民風更自由。

右十二

黃天賜

今朝開放任遨遊，但願循規結善儔。兩岸相離陸拾載，尚須時日互交流。

左十三右二九

葉金全

海峽門關幾十秋，三通已啟破冰遊。今開陸客馳驅至，到處觀光任自由。

左十五右三十

王 前

開明政策合潮流，兩岸三通更自由。來往人民無制限，任教陸客作清遊。

左十六右二一

孫秀珠

一脈相連兩岸酬，炎黃手足共乘舟。工商迓客興經濟，臺海交通更自由。

左十七

洪淑珍

兩岸直航行自由，希望陸客莫違留。共興經濟觀光樂，創造雙贏副令猷。

右十七左二二

黃廖碧華

門戶全開任自由，觀光攬勝樂悠悠。危機四伏誰知曉？社稷難安百姓憂。

右十八左二四

楊東慶

兩國觀光締自由，蓬萊勝景暢遨遊。恢宏視野胸襟濶，民主人權遍九州。

左十九右三三

鄭貴真

一水重分卅八秋，見聞離斷互爭讎。今朝共識人來往，攝影存形卸戰鏖。

左二十右二四

翁正雄

兩岸親和統獨休，三通來往樂悠悠。名山勝水行吟遍，更喜聯婚作客留。

左二一右三四

甄寶玉

開放觀光更自由，歡迎陸客到瀛洲。今朝兩岸春風起，無限交融樂唱酬。

右二二

陳漢津

匡前楚漢棄鴻溝，踏浪行來任自由。雁塔聯名緣共祖，吟鞭賦忘隔暝仇。

左二三右二七

李政村

門開兩岸策重修，三五成行可自由。兩岸如今間咫尺，朝來夕返好優遊。

右二三左三一

游振鏗

喜聞兩岸自由遊，錦繡河山任縱眸。互惠方能經濟盛，共遵律法樂悠悠。

左二五右三八

周福南

風雨迎賓泯世仇，歡顏兩岸五湖秋。人文蒼萃祈民主，台海和平遍九州。

右二五左遊

洪玉璋

兩岸人民喜自由，不分台海與神州。今朝行旅全開放，勝水名山任我遊。

左二六

楊錦秀

時空隔斷六三秋，兩岸而今得自由。陸客滿街摩接踵，人文素養待謀求。

右二六左三八

陳麗華

無爭願景見良謀，兩岸融冰和氣遊。眾志成城人共識，三通經濟樂相酬。

左二七右三七

姚啟甲

兩岸行遊樂自由，北京台北益交流。觀光商旅開閒步，共邁大同通五洲。

右二八左三二

陳麗卿

兩岸融冰仗壯猷，相攜攬景任優遊。更開商旅新蹊徑，國運雍熙世莫儔。

右三一左三九

許秉行

兩岸三通任自由，乖離故怨放東流。交融文化財經輔，北去南來樂暢遊。

左三四右避

康濟時

雙方互往跨鴻溝，先啟觀光步自由。破繭交流民主後，再開大智化千憂。

左三五右三九

黃明輝

風香並與俊人遊，攬盡丰標物態收。兩岸客蹤能浴德，自來自去說清謳。

右三六

洪純義

兩岸長離隔幾秋，難逢開放自優遊。河山燦美任君賞，政府良方不用愁。

左四十

許哲雄

山川迎客禁重修，隔海東西任去留。咫尺蓬瀛今眼豁，無樊天地樂遨遊。

右四十

歐陽開代

大陸回攻昔日謳，今開國界自由遊。一家匈漢長城坼，漢武於天涕淚流。

## 中秋組例會

時間：一百年九月十一日

地點：吉祥樓

首唱：椿 庭

左 詞宗 林正三 先生選  
右 吳東晟

擬作

林正三

參天鬱鬱蔭庭隅，晨夕誰同鯉也趨。培棟培樑申古訓，為兒為女立宏謨。  
家風詩禮尼山孔，世業文章學士蘇。安得八千椿樹健，哀哀子道禱天衢。

擬作

陳欽財

恆星燦爛透青穹，共沐和光茁景融。誨讓椿庭揚庭誥，培忠乾德振家風。  
擁書朗朗三才教，覓句昭昭六藝攻。負荷折薪勤作室，千秋大義世欽崇。

左元右二三

蔣夢龍

海屋添籌氣象新，滿庭瑞藹護幽人。漆園椿樹三千歲，堂上嚴親九十春。  
自是道心長蘊毓，應知德業久清淳。且看靈鶴來棲隱，福壽無疆脫俗塵。

右元左六

許哲雄

德門仙種萬年榮，古木傳家孺慕生。奕奕階前追太極，依依膝下兆長庚。  
身同鐵幹風霜拙，材與冰心日月清。陟岵還期人不老，齊臻天壽報親情。

左眼

洪淑珍

模範曾膺一匾懸，大椿挺挺仰如天。為家忘我容顏悴，奉職不阿生計肩。  
友愛親鄰叮耳畔，謹修書禮勉堂前。幸無違背兒孫秀，康泰是祈清福緣。

右眼左十三

陳麗卿

靈椿院落鬱蔥蔥，緬憶先嚴大愛隆。仁孝傳家揚母訓，詩書勉學紹儒風。  
開荒本島心堅鐵，行道他邦相鑄銅。未得桑榆娛晚景，遑遑醒世振昏聩。

左花右十二

李宗波

松檜同儔質自堅，南山夏蔭不知年。萱花媲美琪花瑞，椿樹長榮寶樹聯。  
歲歷春秋相得地，恩沾雨露欲參天。一株獨秀凌雲勢，蒼翠祥徵壽八千。

右花左二七

蕭煥彩

大椿德範懋堂前，勇毅精神秉志堅。衛國服勤唯恐後，居家料理必爭先。  
登科五子成龍鳳，受教諸孫出俊賢。日省趨庭追孔鯉，一門忠孝至今傳。

左四右十一

陳麗華

浮生到老積勞薪，未許偷閒片刻身。教我虛心勤苦學，作人守節解甘貧。  
義方教子誠為美，梓里尊賢性是真。記得臨終猶訓喻，自摩傲骨勝金銀。

右四左二三

駱金榜

喜酬佳節憶當時，孝道弘揚共賦詩。鯉訓長昭心不懈，椿庭廣蔭志無移。  
黃香溫席千秋敬，閔子推車萬載垂。八八追思歌父愛，承歡菽水報烏私。

左五右三四

林政輝

椿樹中庭綠蔭濃，魁然屹立夏經冬。處身蓄念衣冠氣，作室關懷妻子容。  
晚歲原應含哺樂，西天卻已冊名封。可憐八八承歡日，敲斷思親午夜鐘。

右五左二八

郭三河

椿庭入憶總難忘，生我劬勞教義方。悵望雲天增愧怍，環觀墓草益悲惶。  
遺音再聽哀哀泣，往事追懷惘惘傷。正待回甘娛晚境，一朝棄養痛何長。

右六左二一

甄寶玉

秋月盈窗思悄然，父親往事感無邊。少時飄泊孤舟去，異地胼胝百苦煎。  
每寄家書情切切，老歸故里涕連連。吾將訴與兒孫曉，乃祖謀生血淚篇。

左七右二八

黃廖碧華

身出寒門欲效賢，時懷鴻鵠志凌天。農家樸實知求進，宦海浮沈勇向前。  
推廣稻糧千里赴，栽培子女一經傳。功成即退無塵慮，蔗境回甘福壽綿。

右七左三四

陳漢津

課賦題襟敘父君，家書筆載半聽聞。才華學府樊川杜，德範儒林宋瑞文。  
續約早生能繞膝，更求長命得承雲。椿庭樹動傳忠誥，仰止完人不世勳。

左八右二九

張民選

庭前睹物淚沾襟，父愛篇篇動我心。舐犢常為牛馬作，將雛不顧露塵侵。  
謀猷勤奮籌三飯，典範長留值萬金。憶到折薪艱困日，未能擔荷枉枯吟。

右八左十一

游振鏗

椿堂恩養愛拳拳，有酒眉開性樂天。示訓庭前勤學業，操勞日下耨禾田。  
助人勉我存心善，教禮親仁望子賢。蔗境今迎萱並茂，烏私以慰福祥麟。

左九右十九

李珮玉

古有靈椿壽八千，偏吾庭上隔人天。每逢節慶情翻怯，常憶音容淚即漣。  
教寫揮毫扶我手，兼差餬口負雙肩。浩恩欲報親何待，可否來生再續緣。

右九左十五

邱進丁

嚴傳厚道舊家風，訓我春耕事必躬。植桂盆蘭芳據北，栽松種柏偉屏東。  
敦親足範兒孫敬，睦友咸和里巷崇。白髮不愁天地老，培龍育鳳樂其中。

左十右十五

翁正雄

仙種蟠根雨露新，德門壽永仰嚴親。幾經霜雪長青樹，歷閱春秋不老身。  
八八節來開雅宴，年年禮敬祝佳辰。芳萱並茂兒孫秀，積善人家景福臻。

右十左十九

吳秀真

慈懷日月耀同林，舐犢之情感寸心。出嫁嚴椿頻訓誨，恪遵婦德且烹燂。  
家夫驟逝兒猶幼，偻父力扶恩自深。十載甘泉滋未斷，冀能行孝趁方今。

左十二右十六

賴添雲

日暖椿庭陋室暉，承歡憶幼暢心扉。燈前誨語聲猶在，陌上犁情影未晞。  
惜物知恩勤補拙，齊家勵學志宜威。如鐘誥訓青雲澈，髮已斑斑莫敢違。

右十三左十四

張耀仁

記得年輕困頓時，先君體弱雪霜欺。心中有德存三畏，腹內無文重四維。  
招股家山營礦業，集資村廟立神碑。堪誇揖揖兒孫秀，九十成仙草木悲。

右十四左二六

洪玉璋

靈根入地幹參天，葉戰風霜歲八千。不老枝橫蓬島外，長青傘展玉堦前。  
人間為父迎佳節，座上招賓當綺筵。吉旦欣逢瀛社慶，祥徵應與並遐年。

左十六右二一

楊錦秀

靈椿翳鬱聳雲天，雨沐風揉歷久堅。戴月披星蘭桂茂，傲霜勁節璧珠聯。  
蟠桃進果三仙樂，海屋添籌百歲延。慈貌嚴親長敬仰，滿堂祝嘏壽無邊。

左十七

余雪敏

少承祖業債隨身，顛沛多年歷苦辛。晚境清閑多福氣，尋幽訪勝享天倫。  
午眠忽逝家人慟，夜夢成仙笑意真。獨對萱堂思孝道，伴遊品茗定昏晨。

右十七左三二

黃天賜

每憶椿庭暗愴生，劬勞鞠育博家榮。壽高德厚人爭羨，福大仁深世共評。  
泣睹遺容空有淚，欲聞教訓杳無聲。招魂祭父知何處，墓草萋萋繫我情。

左十八右三一

蔡業成

八八佳辰頌父親，庭前椿樹八千春。教忠教讓傳家訓，希聖希賢養性真。  
承考克勤還克儉，奉先憂道不憂貧。循陔大義難能踐，轉眼臨頭白髮新。

右十八左三三

沈榮槐

靈椿道範永傳芳，丹桂花開瑞氣昂。喬梓一門歸眾望，賢愚同德綻餘香。  
教忠揚孝倫常顯，問寢趨庭情義彰。勝澤周流千萬載，人間有愛在飛揚。

左二十右三二

林松喬

靈椿鬱鬱翠蒼妍，覆蔭長榮不計年。樹歷春秋枝盛茂，葉霑雨露幹逾堅。  
氣凌霜雪知多少，身閱滄桑感萬千。且看今朝根永固，賡詩爭頌壽無邊。

右二十左三一

許又勻

八八佳辰憶父尊，辛勞克儉為兒孫。披星戴月耕新野，沐雨迎風護故園。  
面命仁和天地闊，耳提誠信族親敦。椿庭此刻音容杳，翹首西天般若門。

左二二右二六

洪世謀

每逢八八緬爹親，憶及兒時家境貧。戴月披星蠶食度，櫛風沐雨薄田巡。  
義方教我知誠信，鄉里尊賢學禮仁。嚴訓為銘常在耳，來生期再續天倫。

右二二

孫秀珠

每憶前塵倍感傷，如椿巨樹蔭庭芳。擎天葉茂遮風雨，凝露根深舉雪霜。  
昔鳥高低終展翅，今蟬上下俱哀吭。洪恩未報音容別，願佑兒孫耀祖光。

左二四右二五

林禎輝

椿庭長發善人香，世代相傳必久長。日日甘泉千日在，年年福運萬年疆。  
父慈子孝清風散，弟忍兄寬順氣湯。八八節逢今共慶，騷朋獻賀誦詩章。

右二四左二五

林李玲玲

家君矍鑠期頤望，偕老椿萱舉案前。繼晷焚膏探聖哲，知微慎獨貫人天。  
深情厚義真如此，重利輕離却未然。庭訓親書垂漢隸，子孫祈祐福齡延。

右二七

王 前

煙霞長伴柏松鄰，枝葉濃陰翠影新。歷盡風霜雖老態，常經雨露更精神。  
遐齡欲問無他樹，得地初知是此椿。聖訓窮探遵至孝，鯉庭過處禮嚴親。

左二九右三三

楊東慶

八七洪災肆虐狂，家園重建勇擔當。三餐不繼難糊口，四壁蕭然最感傷。  
鯉訓謹遵書味好，椿庭莫棄菜根香。劬勞鞠育恩如海，風木空懷欲斷腸。

左三十右三十

葉金全

先嚴伯叔樸農民，五畝耕耘極苦辛。蔬菜栽培餬眾口，田園灌溉滿禾困。  
長年養護山高德，一飯懷思海闊親。垂裕後昆樓廈蔭，箕裘克振報慈椿。

左三五

余美瑛

椿庭露冷梧桐月，一鎖年光六十秋。垂訓依稀盈耳目，篆香有信續箕裘。  
折衝商賈紅塵日，蘭桂書齋遁世舟。展軸時兼人子恨，風煙汐止夢春叟。  
自註：家父故居汐止。字夢春，擅書法，曾自刻石鎮，有夢春二字。

右三五

陳碧霞

功成回首鬢如銀，八八佳辰感慨頻。日月劬勞何怨悔，雨晴戮力不言辛。  
兒孫繞膝天倫享，菽水承歡四代親。椿蔭盈庭庥子女，箕裘克紹樂傳薪。

次唱：中秋即興

左 黃祖蔭 先生選  
右 詞宗 邱天來

左元右二二

蔣孟樛

百年建國賀中秋，瀛社興文集勝儔。更愛嫦娥今夜色，題詩合醉吉祥樓。

右元左眼

徐世澤

皓月清輝灑滿樓，家人團聚度中秋。蟾宮淨土無烽火，總覺嫦娥欠自由。

右眼左十

洪玉璋

當空皓魄一輪懸，三五良宵共擘箋。卻怪先生無雅趣，閉門推出月還天。

左花右十三

王尚義

玉宇無塵金鏡開，波光林影任徘徊。襟寒未忍遽歸去，皓魄當頭能幾回。

右花

陳素真

一輪寶鏡照江城，今夕嬋娟分外明。應是瑤臺歌舞盛，人間共享月華情。

左四右三六

林政輝

此日年年使我愁，怕聽絃管送溫柔。人間何處逃禪去，海角天涯總是秋。

右四左十二

洪淑珍

節近中秋玉宇清，仰看冰鏡十分明。鄉心萬里欣今夕，水調高吟繫我情。

左五右二四

唐 羽

歲序雖逢一色秋，依然炎熱使人愁。君家燒炭如無減，寰宇難逃轉廢丘。

右五

李晨姿

平分月色感秋寒，闔府團圓烤肉歡。墨客聯吟詩即興，杯中句得滿心安。

左六右十五

吳秀真

玉宇清輝耀九寰，中秋仰首展愁顏。相思欲藉嫦娥遞，一路馨心到故山。

右六左三五

蔡業成

香浮金粟酒盈杯，玉宇無塵寶鏡開。滿腹豪情催逸興，狂吟達旦亦悠哉。

左七右二六

翁正雄

瀛社聯吟氣勢彪，中秋待月詠新腔。爭詩幾對夫妻美，不羨天邊雁影雙。

右七左十八

陳淑芬

清宵書硯冷於秋，玉宇瓊樓倍覺愁。皓月當窗吟興發，青天碧海恨悠悠。

左八

鄭貴真

此日中秋弔舊魂，也曾網路覓啼痕。回思十載高樓劫，誰恤當年絕世冤。

右八左十九

楊錦秀

蘆白楓丹月色清，攤箋覓句續詩盟。團圓好景須珍惜，暢飲高吟萬里情。

左九右三三

黃天賜

欣逢佳節效先賢，月照南樓夜色妍。急興敲詩添逸趣，庭前暢飲樂陶然。

右九左十七

張耀仁

皎潔蟾光似水流，一年容易又中秋。登樓庾亮今何在，世事滄桑感不休。

右十左三十

楊東慶

詩酒聯歡逸興揚，平分秋色滿蟾光。塵囂拋卻詩情勃，人月共圓話短長。

左十一右二一

孫秀珠

人間處處桂飄香，皎月繁星共一堂。佳節鷗朋詩趣逸，吉祥樓裡儘和祥。

右十一左二一

王接桃

吉祥樓上美清宵，共賀中秋月色嬌。瀛社題詩開盛宴，飛觴醉詠樂逍遙。

右十二左三一

郭三河

勝賞娟娟玉鏡移，中秋夜色漏聲遲。花前月下歡相對，偶拾新詩得意時。

左十三

黃廖碧華

一輪明月燦中天，佇立門閭望眼穿。忽見孩兒頓欣喜，親情慰語暖心田。

左十四右十六

陳麗卿

人月中秋分外圓，登臺邀飲樂心田。瓊樓玉宇何須羨，水調歌吟曲曲傳。

右十四

蕭煥彩

辛卯中秋景象明，蟹肥酒美舉杯傾。親親最是團圓夜，萬里河山玉鏡盈。

左十五右二九

洪世謀

至晚瓊台分外明，通宵喜聽管絃聲。兒孫烤肉煙花放，趁興高吟逐月行。

左十六右三四

李珮玉

賞月中秋伴母行，基河蹀蹀好風迎。欣逢里辦同歡會，水畔歌揚笑語傾。

右十七左二九

王庚春

蟾光明照拂寒荷，趁月追星野興多。最是騷人情趣逸，我來舉酒伴嫦娥。

右十八

許哲雄

當頭月鏡滿清穹，露重輪圓萬里同。恰見九秋今夕半，一身吟骨樂無窮。

右十九左三八

王 前

辛卯中秋逸興長，今宵尚欠一分光。騷朋小集登樓望，覓句同傾菊酒觴。

左二十右三二

陳碧霞

銀盤再現展嬌妍，似鏡清暉月正圓。顧盼情深隨酒興，何需隱忍續前緣。

右二十

邱進丁

夜魄清輝耀九垓，光明遍照地球民。古今中外詩傳頌，雅俗千秋共一輪。

左二二右三十

李玲玲

飄香金粟透蟾精，人共蟬娟三五明。圓夢他鄉攀月桂，青輝千里寄遙情。

左二三

姚啟甲

鷗朋喜聚在今宵，共詠中秋皓月邀。酒斗十千詩緒湧，吉祥樓上正韶飄。

右二三

劉秋蘭

中秋涼爽接初冬，相約親朋聚碧峯。廚藝同人頻鬥巧，品香賞月興偏濃。

左二四

周福南

秋光桂魄九霄翰，玉宇瓊樓不勝寒。異地子孫千里共，舉杯邀月夢中看。

左二五右三七

葉金全

蟾光皎潔照蓬萊，夜靜清茶啜一杯。自覺無機心志定，闔家老少樂相偕。

右二五

游振鏗

蟾華十里映諸方，隱兔探頭覓酒香。兒女親朋同遣興，通宵對月醉歌長。

左二六

沈榮槐

叢菊迎風納晚涼，浮雲桂魄共韶光。舉杯邀飲穹蒼笑，也學青蓮樂輕狂。

左二七

林禎輝

中秋圓月湛憐賞，勝景人人喜自然。願得年年長得意，家家和順樂無邊。

右二七

張民選

萬里清光為我留，蟾華影裡鏡中遊。一年好夜牽佳興，得句鏗鏘酒獻酬。

左二八

吳東晟

焙炙烹茶炭火燠，何須舉目洞層雲。人間自有團圓節，哪管嬋娟屈十分。

右二八左三二

林松喬

中秋氣爽晚風徐，清賞邀朋逸興舒。欲向嫦娥相問訊，飛觴醉詠樂何如。

右三一

許又勻

金風明月映雲天，三五家家聚水邊。煙火繽紛孫逐笑，人間此刻最悠然。

左三三

陳欽財

情牽萬里憶家鄉，墨客纏氛即興狂。仰月中秋今夜甚，九霄燦爛亮清光。

左三四右三八

甄寶玉

小女于歸三載過，每逢秋節嘆銀河。今宵二老偏來興，琴瑟和鳴樂趣多。

右三五

駱金榜

清輝皓魄耀晴空，勝賞嫦娥樂不窮。即興中秋三五夜，優遊結伴廣寒宮。

左三六

余雪敏

多年異國弟歸來，慶我生辰競舉杯。秋節團圓增逸興，萱堂城戰笑顏開。

左三七

李宗波

節屆中秋月正明，吉祥樓上續詩盟。良宵莫負欣雅契，暢飲高吟把杯傾。

## 冬至組例會

時間：100年12月11日

地點：天祥路吉祥樓餐廳

首唱：題詠台北景點（詩題自訂。體：七律。韻：平聲韻任選）

左 詞宗 蔡業成 先生選  
右 洪玉璋

左元右二三 春日遊陽明山 翁正雄

陽明二月正花時，十里櫻紅入小詩。喜見園中飛紫蝶，忽聞枝上囀黃鸝。  
行春我愛追工部，載酒誰來效牧之。更轉晴天崗嘯傲，徜徉草地賦歸遲。

右元左二七 木柵動物園 張錦雲

園遷木柵代圓山，動物躍然生態還。教育題材新創意，導遊科技寓休閒。  
觀獅虎象分區吼，數鹿熊猿隔岸攀。最愛夜行魚獸館，珍禽和唱戲林間。

左眼右十六 詠草山 陳麗華

近市居然不受塵，況多景色足怡人。泉溫水滑三冬暖，鳥囀花香四季春。  
細瀑飛聲清有致，淡煙斂黛妙無倫。分明一幅王維畫，置入詩篇句句新。

右眼左二九 碧潭晚望 陳淑芬

輕煙微鎖索橋寒，暮景潭昏寂寞看。石壁沉江空泛影，魚龍隨雨盡翻瀾。  
老臨厭遠風波苦，久坐幽偏夜月殘。半日來遊閒觸忤，歉將愁緒對峰巒。

左花右二九 戀戀台北 陳麗卿

鵲城如畫冠瀛洲，欣作逍遙二日遊。詣聖龍峒文物盛，尋仙猴嶺利名休。  
群迷官邸花嬌豔，我戀礮鄉水滑柔。力倦興餘何處去，士林夜市飽珍饈。

右花左三一 木柵指南宮憶舊 邱天來

景擅蓬萊第一山，煙巒取次豁塵顏。尋真隨意千階上，遊賞能教萬慮刪。  
靈溯終南開覺路，夢祈仙祖示玄關。洞天福地詩情接，醉佛豪吟憶往還。

左四右四一 烏來觀瀑 林松喬

悠閒攬勝興無邊，破曉雲仙素練妍。銀漢倒懸飛峭壁，玉虹直瀉挂危巔。  
迎眸飽賞奔流霧，滴面親嚐瀆濺煙。大塊清幽舒望眼，儘收佳景入詩篇。

右四 淡水漁人碼頭 許哲雄

長堤抱海築龍池，孟浪波臣未敢窺。破曉腥風侵滬尾，連宵蟹氣漲三芝。  
津浮鷁首潮痕淺，岸立虹腰儷影癡。對對橫空求月老，莫將紅線作綸絲。

左五右十七 江城秋日風光 許欽南

滿徑黃花夕照明，江城秋日少人行。白雲出岫情懷澹，紅葉飄堤詩興盈。  
淡水江流波漾綠，觀音嶺色雨餘清。風光似此真佳絕，騷客吟哦樂自生。

右五左十八 詠台北城 張耀仁

首都如苑號鵲城，八達街衢歲月更。縱酒高樓樓壯麗，排攤夜市市熙榮。  
劍潭景物歸吟稿，關渡漁歌繫客情。最是東京堪媲美，天開此府統蓬瀛。

左六右三七 暮遊淡水漁人碼頭 甄寶玉

漁港欣聞景象新，邀朋聯袂淡江津。同觀落日霞光炫，還喜清濤鳥鷺親。  
暮色山巒猶待月，酒樓燈火已迎賓。買來魚獲隨烹煮，大眾爭嘗海味珍。

右六左四四 景美仙跡岩風景處 林禎輝

美極邀來訪客頻，百聞不若一看真。仙家腳印傳奇跡，世代吟聲讚古神。  
地載山河生大德，天瞻物景有長春。純心學道人清靜，處處和平悅至仁。

左七右三三 圓山風光

葉金全

圓山勝境素揚名，俯首中樞景色清。聳立朱樓招旅客，飛騰銀翼震雷聲。  
晨曦履步登岡樂，暮鼓焚香聽磬鳴。隨興常來遊不倦，園林契友喜同行。

右七左二四 大佳河濱公園

楊東慶

大佳親水譽瀛東，貝塚噴泉景點紅。多少煙雲秋色裡，從茲波浪夕陽中。  
山嵐隱隱藏朱閣，水幕層層映彩虹。好是全家騎鐵馬，逍遙快意樂無窮。

左八右避 圓山即景

洪玉璋

冒冷圓山事壯遊，躋尋貝塚穴清幽。斑斕土色原人住，凹凸苔痕過客留。  
轟酒暢吟頻晃腦，望洋興歎強登樓。乃知浩浩逶迤水，似練淡江天際流。

右八左十四 秋日訪林本源園邸

王尚義

秋葉離枝著意紅，緩尋幽趣步西東。榕池水榭橋能度，觀稼來青徑可通。  
樓閣巧雕驚絕品，園林配景歎神工。賞游到處皆詩境，逸興陶然若醉中。

左九右二八 陽明山景

徐世澤

櫻花鬥豔滿園紅，天際雲浮山色融。白練垂空聲似鼓，青嵐疊嶂勢如風。  
倚亭凝望林中鳥，臨澗遙看谷底楓。偶觸閒情思往事，謔詩動腦慰吾衷。

右九左四一 景美人權文化園區

王宥清

景美園區舊事探，人權史實細詳參。張張相片威權寫，頁頁悲情血淚含。  
時過境遷知教訓，未來前景共承擔。齊心奉獻台灣壯，再現桃源力莫耽。

左十右三二 台北街頭遊民

林瑞祥

我是京都山水郎，流雲南北任疏狂。蝶行何擬莊生志，悲賦依稀宋玉章。  
吟罷微言詩萬首，夢醒華露酒千觴。漢皇金屋何須慕，羨我穹衣大地床。

右十 基督教長老教會雙連分會 鄧 強

人讚馬偕醫理通，治痊病患德銘衷。語言舒暢音聲曉，書畫精良筆力工。  
學子聽經增福慧，牧師授課樹勳功。雙連教會巍峨聳，百載榮光氣概雄。

左十一 台北忠烈祠 王 前

員山山麓認前身，忠烈祠高面大屯。常耀靈光崇國士，長昭義魄仰完人。  
禮兵正步英姿煥，崗哨操鎗儀態神。客旅同聲誇特色，景收入鏡感清新。

右十一左十三 國立故宮博物院 張民選

馳名寰宇漢宮樓，藏寶迷人博古遊。散氏盤浮文濟世，肉形石鎮館驚眸。  
歷朝工藝扶王化，奕代圖書正帝猷。社教功能誰可比，五千年故事相酬。

左十二右二十 屯嶺眺望 游振鏗

屯嶺天清氣候新，登臨遍覽景怡人。磺煙漫處風騷涉，道院參時俎豆陳。  
目眩群峰嵐染黛，神迷淡海浪翻銀。偷閒我輩鴻留爪，檢付奚囊句最真。

右十二左四三 內湖科技園區 沈榮槐

碧山夾抱地靈多，如筍高樓繞巨河。空港隔鄰通四海，群商接踵湧餘波。  
經營跨國頻聯合，科技爭奇競琢磨。樞府櫺窗新寶地，八方讚譽樂謳歌。

右十三左二三 艋舺龍山寺 吳東晟

七爐香火篆煙升，心事喃喃上九層。佛子時因微願苦，帝君曾許巨波激。  
漢碑晉帖追淹雅，貝葉龜書問永恆。塵世泥洹俱執著，每逢聖誕點華燈。

右十四左三四 詠新北投 洪淑珍

地熱資源厚北投，磺煙含翠半空浮。溫存湯屋祛塵垢，探訪梅庭仰士流。  
普濟寺參諸念寂，吟松閣望一山幽。館藏文物規恢後，覽景更兼知性遊。

註：梅庭為草聖于右任避暑、避壽、避關說之寓所。

左十五右四四 植物園散策

周福南

荷塘散策葛衣行，南國林園映眼明。翠蓋鴛鴦追玉露，嬌容菡萏溢香精。  
芳菲滿地浮生樂，修竹參天勁節呈。佈政衙門人已杳，最憐飛鼠戲童聲。

右十五 失落的西門町

林政輝

迷你裙腰不畏寒，青春活潑樂團團。西門盛景疑重現，昔日繁華說更難。  
電影院前情意鬧，紅包場內舞衣寬。可憐老大朱顏改，六十餘年蠟炬殘。

左十六右四二 台北城懷古

蔣孟樑

憑欄眺望水西流，屯嶽觀音氣象猷。驅虜猶懷劉壯肅，殘垣尚有北門樓。  
淡江暮色琴音妙，聖廟朝曦古蹟幽。歷劫復興誇勝地，凌霄大廈照吟眸。

左十七右十九 台北景点

李宗波

鵲城勝地早名馳，橐筆探幽四季宜。舉世高樓新景點，淡江飛艇逐漣漪。  
龍山寺裡隆香火，慈惠堂前盛典儀。絕好陽明峯上路，朱櫻如畫喜題詩。

右十八左三五 遊大屯山自然公園

吳秀真

金風薄靄吻屯山，碧柳紅芒抹水顏。交頸鴛鴦相戲趣，穿花蜂蝶尚飛環。  
丹楓競艷粧園景，翠嶺常瑰傲宇寰。莫管夕陽沉速急，鷗朋共樂戀清閒。

左十九右三八 題詠台北景點

邱進丁

雙潭映日泛金波，忠烈祠前兵礪戈。淡水夕陽霞燦爛，故宮文物藝包羅。  
烏來每有溫泉客，木柵鮮無雪羽鵝。景美四時遊不盡，樓高零一地標阿。

左二十 華山文創園

蕭煥彩

昔時酒廠又逢春，文化華山創意頻。展業多方憑智慧，生財有道見精神。  
土洋才藝無軒輊，雅俗題材並列陳。但使新枝能吐蕊，揚名國際夢成真。

左二一

木柵巡禮

楊錦秀

鵑城捷運美名揚，廟闕崔巍聳碧蒼。動物園中遊客鬧，杏花林裏引蜂忙。  
猴山遠眺情何限，勝地徐行興自長。木柵尋幽春意漾，貓空品茗煮黃梁。

右二一左三三

登芝山岩有感

李玲玲

屹立北台龍虎蟠，先人屏障八芝蘭。鵑城遠望繁華景，鯤島難窺諫諍官。  
應似孤岩通鎖鑰，不分群族瀝胸肝。漳泉械鬥前車鑑，藍綠權爭興未闌？

左二二

題詠貓空

洪龍溪

貓空毓秀早馳名，新建纜車來客迎。似鯽遊人添勝境，如痴鷺侶動吟情。  
居高果嶺千重翠，臨下茶園萬頃榮。鋼索盤旋時輾轉，觀光發展孰能京。

右二二左避

淡水紅毛城

蔡業成

西班牙建署紅毛，雉堞依山遠市囂。整座層樓堅壁壘，六尊火炮向波濤。  
戍台夕照馳名久，港口晨曦飲譽高。煙雨滄桑三百載，一流古蹟萃風騷。

右二四左二六

走讀江城

陳賢儒

詩描都會淡江天，走訪芝山考史前。存契一張開拓墾，臨摹古廟證桑田。  
貴陽興起三街盛，迪化南來北貨全。艋舺稻埕榮市早，新樓城內聳綿延。

左二五右二七

台北捷運

駱金榜

稻江捷運疾如風，街道縱橫蛛網同。多謝有司興建設，更聞當局廣交通。  
觀光賓客將無盡，購物人潮總不窮。開展鴻猷今已見，業垂千古憶黃公。

右二五

晨登軍艦岩

陳碧霞

威靈頓內捲簾移，絡繹登臨浴曙曦。艦上縱觀人語早，澗濱飛步我來遲。  
嬌櫻怒放頻迎客，藍鵲階行若識誰。現世溫情何所有？下山猶及備晨炊。

右二六左四十 訪大稻埕

孫秀珠

舊市新容韻未休，聞名南北貨囊搜。江山樓改餘風月，永樂行存有鷺鷥。  
堤外鳥稀悲水淺，城中景盛喜川流。琴歌還奏斯人遠，一瓦斜陽古渡頭。

左二八 台北景點

李政村

台都大廈雅高揚，整潔街容景物昌。關渡平原車滿道，碧潭水上艇爭航。  
陽明山秀花馨艷，動物園觀獸巧良。恩主公靈香火盛，頻來旅客利營商。

左三十右三十 陽明山小油坑

賴添雲

嫋嫋青煙上碧天，根通百里底深淵。遙思噴火蒸雲史，佇閱流漿造岳篇。  
土裂靈逃聲恍在，河填海湧景猶前。風飛目汁硫黃味，觸動縈懷幾世緣。

右三一 登圓通寺

歐陽開代

鵲城秋末出郊鄉，古寺圓通幽境望。磬調悠悠舒積鬱，檀香裊裊逸愁腸。  
大雄寶殿諸神鎮，七級塔樓千魄藏。今日招魂三代泣，他時我去淚誰滂。

左三二 歷史博物館

姚啟甲

巍巍彩閣映荷池，歷史標名訪昔宜。文物千秋猶對面，經綸百世是良師。  
悠然倚檻芙蓉笑，更可安凭絲管隨。汝欲功成應鑒古，逍遙此館最堪期。

右三四 台北古今

葛佑民

鵲城凱達格蘭莊，八面峯巒水一汪。滄海桑田成陸渚，青山菊圃敞平洋。  
中樞善政千商富，市集繁榮百業昌。四季如春花織錦，樓臺櫛比競輝煌。

右三五左三六 大屯山記遊

杜美華

一覽淡江湖海吞，暢懷喜得妙乾坤。柱筇騷客賞芒跡，回首紅塵戀夕痕。  
遠水山青開眼界，近峰煙白湧泉溫。北臺生態天然景，點檢奚囊記大屯。

右三六

北投

陳保琳

北投烟景色幽清，典雅和風饒趣情。玩賞多元迷客旅，交通便利爽遊程。  
溫泉水滑傳佳譽，熱谷氤氳享盛名。好似桃源仙境處，悠然走訪寸心傾。

左三七

大屯山

黃祖蔭

大屯山前遇畫師，難揮彩筆是仙居。相傳故壘今仍在，有見幽浮降落時。  
太子登臨曾失跡，觀音側臥或詳知。諸多掌故來名嘴，我則賡歌誌此奇。

左三八右四五 士林官邸

洪世謀

士林官邸菊花芳，紅紫重重間艷黃。遊客萬千頻歎賞，名園內外好徜徉。  
昔時寂寞威權地，今日繁華休憩場。十月天晴如素節，來將美景入奚囊。

左三九

冬乘貓纜有懷

康濟時

冬上貓空雨又晴，樹冠若毯腳前生。乘雲一覽猴山小，撥霧重尋淡水清。  
日短無痕傷自在，歲寒有忝愧毋成。蓬壺何計陰霾掃，翻轉乾坤伏眾英。

右三九左四二 歌吟三角湧

許又勻

三峽河濱夕照幽，老街巡覽思悠悠。山川毓秀民淳樸，梓里清平物阜稠。  
鳶嶺晨操迎鳥語，橫溪晚釣羨鱗游。良朋志合情愜切，結伴行吟踏暮秋。

右四十左四五 軍艦岩

郭三河

曳杖城郊十里長，名岩晨訪見初陽。千階石磴沾煙潤，一路春花帶露香。  
經雨山容如畫譜，迎暉野色入詩囊。巧逢舊識欣無限，乘興豪吟賦百章。

右四三

北門

余美瑛

古堞紅牆門北固，百年形勝鎖城津。頽碑半倚空庭角，碧蘚長封帝闕塵。  
衢道縱橫環四壁，江山歲月侷三春。客途幾度萍浮過，寥落鄉心識鳳麟。

次唱：白髮

左 黃祖蔭  
右 詞宗 邱天來 先生選

左避右三十

黃祖蔭

銀絲漸少似飛蓬，粒食依人乏寸功。嘆老嗟卑無益世，糊塗苟活可憐蟲。

右避左二一

邱天來

難勝簪處欠蒙茸，牽掛頭顱感不窮。幾縷吟愁禪榻畔，看來向老讓花紅。

左元右七

吳東晟

崢嶸面目豈衰翁，髮自星星氣自雄。最愛頭顱生雪色，滔滔濁浪戰寒風。

右元

余美瑛

誰言此物智圓融，碌碌平生色亦同。伍氏奔逃斯命保，方知白髮奪奇功。

左眼

張民選

斑斑雪鬢閑叟翁，似水年華感慨中。自覺壯心歸野鶴，一枰棋局伴松風。

右眼左七

洪玉璋

髮為詩催白已窮，最難落筆句求工。徒嗟壇坫無年少，徵逐浮名盡老翁。

左花右十一

郭三河

偶來騷客集樓東，髮白相逢感不窮。回首不堪談往事，一樽濁酒醉冬風。

右花左三四

許欽南

滿頭雪白老斯翁，呼伯呼公任野童。我願靈台常活潑，管他霜髮已盈中。

左四右三四

陳欽財

遐齡矍鑠白髮充，燦爛堆雲茁亂蓬。易老人生雖感慨，沉詩志畫享春風。

右四左三三

陳麗卿

髮莖如雪鶴髦同，笄飾難簪恨靡窮。老境合應詩境轉，悠然心性自圓通。

左五右二三

楊錦秀

鶴髮蒼蒼一老翁，滄桑歷盡氣猶雄。潁川洗耳甘歸隱，倦聽沿街選戰風。

右五左十七

許又勻

明眸皓齒喜顏紅，飛逝青春在夢中。鬢髮斑斑明鏡裡，猶欣日日課孩童。

左六右二五

蔣孟樛

丹心矍鑠白頭翁，皓首窮經萬卷中。老氣橫秋爭一席，龍鍾鶴髮志猶雄。

右六左十五

張錦雲

少年未識老年衰，變色三千強說同。不覺絲如秋暮草，雖稀卻喜智登豐。

左八右十四

唐羽

舉目群儕頂鶴嵩，吾心惟信志猶雄。馳騁南北尋常事，何遜當年入市東。

右八左三八

駱金榜

蒼蒼皓首眾欽崇，齒德俱尊物望隆。願藉鉢聲添福壽，方知國寶主人翁。

左九右三七

陳淑芬

彈指流光幾轉蓬，寒鴉爭噪醉西風。燈殘強欲催霜鬢，恨有詩情苦未工。

右九左十二

蔡業成

八十年華志未窮，滿頭白髮對秋風。星星點點光能鑑，閱盡滄桑不老翁。

左十右四十

蕭煥彩

頭頂蒼蒼氣自雄，吟情未老似頑童。風流不讓青衫客，杜牧同邀太白翁。

右十左三九

孫秀珠

鉢韻頻催白髮充，搔頭自省竟無功。任他戰鼓揚門外，急煞樓中未老翁。

左十一

賴添雲

營生追夢碌無終，竟是銀絲搶首功。日日寂聲違我意，支支白劍指天穹。

右十二

王尚義

漸遠眼光快樂翁，不輕酒量膽猶雄。身心卻喜年康健，但恨霜花亂髮叢。

左十三右二二

許秉行

落寞塵寰尚古風，歸田遯世隱茅蓬。江河日下傷銀髮，始信青春轉已空。

右十三左三二

黃廖碧華

飛霜染髮白頭翁，歲月無情志不窮。勤練瑤箏學詩畫，精神百倍老還童。

左十四右二九

陳碧霞

年華漸逝水流東，霜鬢滋多造化同。髮短心長珍福澤，豪情落日夕陽紅。

右十五左二七

王 前

催人髮鬢雨兼風，歲月痕留各不同。處世惟求腰腳健，何須慨嘆白頭翁。

左十六右三一

林松喬

髮白如銀一老翁，皤然豐鑠氣猶雄。韶光駒隙何傷感，歸隱修心野鶴同。

右十六

沈榮槐

漸老年華歲不同，堆雲逐白斬雄風。容顏變異身猶樂，長抱青春肺腑中。

右十七

李玲玲

三千煩惱豈終窮，雲鬢偏愁入鏡中。何不執除心自在，童顏鶴髮一仙翁。

左十八

詩敲鶴髮是誰雄，與會高齡志一同。昔日豪情全不減，師娘妙筆勝師公。

邱進丁

右十八

飛揚白髮共秋風，琢句詩書夢未空。但得丹心長自在，老來猶是似楓紅。

甄寶玉

左十九右三三

榆景看臨感不窮，如梭歲月莫論功。今惟金石閒情寄，霜鬢雖斑酒興雄。

游振鏗

右十九左二九

如雪新抽百感同，呼翁呼伯契詩翁。堅心尚在吾寧老，肯向人前嘆鬢空。

李宗波

左二十右三五

兩鬢如霜寒鏡中，欣開榆景道窮通。閒心自抱紛華外，情寄林泉興更雄。

洪淑珍

右二十左二六

煩惱無邊萬古同，回春染液建奇功。性天朗化心何老，皓髮興周有太公。

楊東慶

右二一左二二

落筆輕盈愧我衷，詩懷淡淡氣雄雄。青絲騷盡難成句，白髮吟來韻啟聾。

古自立

左二三

少年逕逐醉顏紅，中歲方知問窮通。一朝攬鏡驚誰影，金昔風華大不同。

鄭貴真

左二四

髮疏頭白一騷翁，立業無成萬事空。但願台灣開盛世，笙歌翠合共甘同。

張耀仁

右二四

烏絲轉眼鬢霜同，懷擁稚心追曉風。智長善循禪裡悟，暮冬春色詠無窮。

吳秀真

左二五

銀鬢最愛培青壯，雅會長吟契老翁。聚首開懷頻勸酒，探驪暢飲狀元紅。

陳賢儒

右二六

黃天賜

回首滄桑白髮翁，舒懷嶺上嘯冬風。相逢莫問前塵事，依舊山川夕照紅。

右二七左三一

周福南

人生七十太忽忽，彈鋏書空感慨中。一枕鳥聲殘夢裡，寄情白髮爽吟衷。

左二八右二八

葉金全

鶴齡矍鑠態和融，銀髮飛揚一老翁。不識山蹊時邂逅，早安互道沐晨風。

左三十右三二

杜美華

倚杖衰顏白髮翁，莫嗤鬢雪失天驄。胸中詞藻爭元眼，氣節猶堪建一功。

左三五

王庚春

蘆間舞疇白頭翁，不嘆星星喚伴逢。疑是咸池化外客，羨傾塵世白毛公。

左三六

陳保琳

歲月如梭過似風，無成半事使人忡。生來只換盈頭雪，是否表徵智慧同。

右三六

王宥清

退休心覺忽然空，未竟生涯活動充。相約出遊銀髮族，滿車皆是白頭翁。

左三七右三九

鄧 強

皓首精神尚雅風，康強體魄志豪雄。老成生態千莖雪，兩鬢凝霜意氣融。

右三八

林禎輝

白髮人生萬物同，心中靜淨自然通。時時快樂無煩惱，事事光明總為公。

左四十

康濟時

三千黑髮因隨白，分寸丹心為社紅。一掌瀛壖膺六歲，贏來霜滿月明中。

壬辰（101）

第三屆第一次會員大會

時間：101年3月4日

地點：天祥路吉祥樓餐廳

收稿：56件            參加人數：68人

首唱：題目自訂（就台北捷運各站或附近景點作題詠）

左    劉清河先生選  
詞宗  
右    賴欣陽

左元右四            碧湖春

陳淑芬

湖光水色澹空濛，萬點花開翠靄中。小徑雲山櫻沐雨，一簾春絮柳扶風。  
平生筆墨真非計，滿眼詩書不復功。游賞何當奮淵默，也從談笑學沖融。

右元左廿八        滬尾帆影

蔡業成

鯨波萬里水翻花，滬尾牙檣繞亂鴉。吞吐江心千纜穩，浮沉海面數帆斜。  
休憐逐浪營生計，應羨乘風向彩霞。知否中流曾擊楫，凱歌高唱到天涯。

左眼右十二        陽明煙景

許欽南

韶光三月柳千條，春滿陽明景物饒。曲徑風輕鶯語滑，芳園雨過燕聲嬌。  
優遊泉石襟懷爽，放曠煙霞鬱悶消。大塊文章隨處是，溪山勝狀細心描。

右眼                淡水捷運站賣藝人

林瑞祥

平生縱把七絃琴，潦倒斜暉快活林。水闊芳枝容異鳥，天涯明月共初心。  
陌頭青柳總虛席，絃上黃鸝空好音。不畏流途知遇少，逍遙閭里自高吟。

左花

新店旅情

楊錦秀

新店來遊誇捷運，風光激盪眾謳歌。一潭春水環優境，兩岸扁舟擢碧波。  
王粲登樓思故里，夢機麗藻動江河。吊橋徙倚憑欄望，今古滄桑變化多。  
註：張夢機教授住「新店中國玫瑰城」。

右花左九

古亭捷運站采風

周福南

先賢築埠螢橋畔，擊鼓防番設古亭。捷運逍遙通淡海，碧潭解慍看流星。  
人文拔萃三台領，學苑笙歌百歲經。古剎禪修開覺路，吾鄉韻事永留馨。

左四右卅四

捷運大湖站

沈榮槐

白鷺山前白鷺飛，翠湖煙湧錦鱗肥。尋幽野釣心同樂，攬境歡歌興與歸。  
捷運搭來親綠海，輕車騁至探芳菲。園林勝景長環抱，到此流連可忘機。

左五右廿六

捷運站 國父紀念館遊樂

甄寶玉

飛簷宏館世名揚，捷運奔馳客八方。錦繡華姿生圃苑，巍峨樓影幻池塘。  
觀看煙火繽紛燦，欣賞花燈逸興長。最是人潮洶湧至，地龍腹滿往來忙。

右五左卅四

芝山岩懷古

許秉行

幽幽拾級芝山路，懷感登臨樹鬱蒼。倭賊侵台時事渺，日文教帳史情忘。  
千秋勝地遺碑在，萬里征塵舊恨長。來客低徊尋故跡，滄桑無語弔斜陽。

左六

捷運芝山站

黃明輝

都市叢林不雀羅，門穿捷運似車河。芝山石豎雙溪畔，福國街橫大廈阿。  
半里路人饒色異，三間百貨並鄰和。斯家只合居天母，到站歸民顧盼多。

右六左廿四

剝皮寮

陳漢津

兩百年來舊市場，廣州街上再重光。養生問景尋茶藝，皓鶴沉思述夢梁。  
過客曾臨羅綺店，時人能辨女兒牆。板南捷運龍山寺，一路綿延藥草香。

左七

春遊北投

陳保琳

春來何處賞芳柔，意愜驅車向北投。曼暖溫泉怡浸浴，氤氳熱谷樂遨遊。  
人文物態資源富，鳥語風情地理優。四顧煙姿心自喜，如圖勝景爽吟眸。

右七

捷運站

余美瑛

銀龍掣電飛馳速，予予留連此地看。促走奔行爭日月，南來北往少盤桓。  
環巡館站雖鱗次，駐送梯階卻雁單。熙攘人生千百態，天涯過客暫安寬。

左八右避

題北投溫泉

賴欣陽

地憐凍骨湧溫泉，脈注青巒起白煙。水滑潤膚營氣暢，山幽滌慮俗情捐。  
勘疏清吏曾攀嶺，浮海孤臣欲補天。笙曲而今繞雲霧，誰思寒巷涕漣漣。

右八左廿六

遊內湖-碧湖公園

王啟文

湖光獵豔畫山青，醉景臨風暗步停。白鷺雙飛移遠處，青蛉萬點繞長亭。  
人居鬧市賒心靜，鳥宿高枝盼夜寧。九曲橋邊觀夕照，幾隨楊柳舞娉婷。

右九左十一

春遊成天禪寺

許又勻

櫻飛柳翠惠風揚，尋徑蜿蜒謁佛鄉。日映悲樓深院暖，梅依慈閣小庭芳。  
明心解養人天法，見性能傳智慧光。聖者廣師垂典範，今朝參禮動詩腸。

左十

捷運萬芳站

張錦雲

網狀輪通網路標，萬芳站利就醫潮。南行靜享文山美，北轉宏觀淡水嬌。  
縮距飛奔穿地道，浮磁快駛順天橋。悠遊一卡全能化，接駁聯營智獨超。

右十左卅七

劍潭站

洪淑珍

型似龍舟泊半天，獨教捷運逐風前。水潭寶劍隨蛟杳，車站令名將史傳。  
縱目圓山形勝秀，扶邛曲逕景光妍。待看夜市華燈上，遊逛人來盡快然。

右十一左卅八 圓山遊

黃祖蔭

宛若遊龍一溜煙，鵲城滿眼地行仙。扶梯款款毋勞步，刷卡悠悠自斡旋。  
太古巢成新景點，原神社變貴賓筵。茶商舊邸風光好，美館經常結畫緣。

左十二右四一 冬日北投渡假

翁正雄

聞名中外好泉源，冬日天寒水更溫。渡假泡湯多旅館，休閒親子有公園。  
磺煙瀾漫風光美，松閣朦朧月色昏。法藏寺前晨眺望，觀音山秀擁江門。  
註：吟松閣不遠處有法藏寺，為北投著名古刹，在此可眺望地熱谷、觀音山、淡水河風光。

左十三右廿九 春遊北投溫泉鄉

姚啟甲

輕乘捷運訪泉鄉，二月磺煙四處揚。水暖池幽欣濯背，櫻嬌柳嫩好傾觴。  
鶯啼蝶舞眸凝醉，浴罷塵消體帶香。莫羨華清誰得寵，何如享此美人漿。

右十三左廿九 艋舺風情

張耀仁

北台開發得機先，造埠通商數百年。大漢溪灣興水運，龍山寺古盛爐煙。  
而今酒戶西街列，往昔江波貨艇遷。勝地風光依舊媚，客如蜂擁市區旋。

左十四右廿一 捷運景點-北投

林李玲玲

一卡悠遊台北城，梅庭翠嶺綻紅櫻。磺泉玉霧鴛鴦浴，綺讌金樽鷗鷺盟。  
昔日溫柔迷醉眼，今時文物發幽情。酣觴中聖無妨也，捷運歸來將我迎。

右十四 中山紀念公園

賴添雲

東山浮壁照高簷，映水荷亭鯉影熾。偉偉楹堂懸博愛，昭昭勒石感餘炎。  
修園馥蔭常懷憶，建國宏功肅仰瞻。鬧市稠樓留勝地，舒心養志夢天蟾。

左十五右廿七 捷運動物園站

郭三河

新春雨後暖悠悠，捷運輕乘訪碧邱。上下人潮如蟻聚，往來賓客似川流。  
左行貓纜烹茶去，右轉園區賞物遊。興致怡然時不待，舉頭已見暮雲收。

右十五左卅一 詠大湖公園捷運站之大湖公園 陳麗華

近市園開一望中，湖山雙攬興何窮。畫橋九曲波搖影，水榭三間樹引風。  
花氣氤氳翻暗葉，鳥聲宛轉出幽叢。劇憐捷運鄰新站，杳去紛來過客匆。

左十六右廿三 北捷之旅

陳麗卿

飛龍迅抵八芝蘭，出站迎眸畫一般。風軟基河方漾碧，花濃官邸正燃丹。  
故宮寶物供流覽，夜市珍饈恣飽餐。有限韶光難縮住，無涯勝境樂盤桓。

右十六 烏來春旅

吳秀真

夾道紅櫻展麗姿，燕鶯啼語頌春時。清風漫拂溪邊柳，翠竹頻敲勝景詩。  
竟享溫泉神有韻，遍遊樂地興無涯。烏來仙境天然鑿，我自逍遙自攬奇。

左十七

佇足捷運看跨年新風潮

楊志堅

捷運時潮別有天，人人旅次現君前。讀書貫注神終倦，行樂吟哦意更堅。  
遊興邀朋分秒急，忘機笑我夕朝顛。學生歲首新流派，佇見斯風獨占先。

右十七左四二 西門

吳東晟

青春士女逐潮流，靚影纖姿一望收。街景常年追亮麗，人生此刻愛輕浮。  
名媛不羨東區貴，遊客還增西町稠。小坐偶然登舊鋪，更知時尚未曾休。

左十八右四三 台北捷運附近景點

李宗波

首都景點久馳名，古蹟頻探逸興生。開放機場人絡繹，往來車站眾歡迎。  
松山捷運連南港，淡水交通抵北城。更有層樓一零一，萬商雲集冠東瀛。

右十九左四一 淡江鐵馬行

王庚春

淡水灣湄別有天，徜徉鐵馬走翩翩。竹圍高仰觀音霧，八里遙看大遯煙。  
紅樹林陰花跳舞，綠蕪叢上密婆翹。霞收坐向咸池望，滿載幽情得古篇。

按：捷運竹圍站，紅樹林站，淡水站及淡水河左岸鐵馬逍遙遊。

觀音霧：空嶺吐霧。花跳：彈塗魚。密婆：日婆，蝙蝠。

左十九 淡江春曉 蔣孟樸

淡江春曉美無邊，遠眺蒼茫一色天。屯嶺雄奇龍脈秀，觀音環列海雲妍。  
護臺壯肅驅強擄，救世馬偕如聖仙。捷運流通誇迅速，碼頭徙倚弔先賢。

右十九左廿一 新詠關渡自然濕地公園 許哲雄

平皋濕浦淡江經，水止觀音分渭涇。紅樹林邊橋半月，綠茈叢外羽千翎。  
聞鐘古廟探源遠，賞鳥芳園寓教馨。闢此天然清淨地，猶將閩苑置中庭。

左二十 台北捷運一日遊 陳碧霞

喜乘捷運自由行，一日悠遊樂事盈。美食熱茶鍾木柵，青山綠水選土城。  
攜家帶眷輕鬆逛，賞景登岩便利征。週末全家花費省，人人盡興踏歸程。

右二十左四四 圓山捷運站景點 葉金全

車過民權出地來，凌空軌道豁然開。圓山飯店朱簷聳，美術公園翠竹栽。  
孔子廟前瞻聖德，保安宮裡擲神杯。觀光到此悠遊便，擁擠人潮滿月臺。

左廿三右卅六 關渡公園采風 邱天來

名園勝概信多妍，關渡平原別有天。草澤四圍回萬綠，芳塘一水織輕煙。  
猶存濕地饒生態，更重資源返自然。飛鳥游魚皆得所，逗人雅趣許留連。

右二 北捷泛詠 王 前

北台風物冠瀛洲，勝槩之多孰匹儔。若問士林推夜市，要登貓纜豁吟眸。  
龍山寺望神光耀，中正堂高氣象幽。輻輳交通誇捷運，長年客訪似川流。

左廿三 過中正紀念堂有感 孫秀珠

民族救星開自由，大中至正復登樓。干戈半世烽煙止，戎馬一生書冊收。  
百卉庭園知冷暖，兩廳劇院續春秋。昔時矢志今人弔，隔岸鄉音身後酬。

右廿四左四十 關 渡

杜美華

一抹虹橋跨碧洋，海天融色傲滄浪。江心水鳥迎風戲，波岸潮螯弄穴藏。  
綠意埤塘環保景，紅林濕地自然芳。暢遊別具幽情在，生態觀光野趣長。

左廿五 中和捷運

洪世謀

工程艱巨竟全功，帶動繁榮人意融。南勢角區房市漲，景安站埠店商隆。  
踏青訪古圓通寺，頂禮求財福德宮。勝蹟倍多文史重，自緣便捷拉長紅。

右廿五 捷運龍山寺站

游振鏗

潛通捷運網蛛絲，遐赴龍山晚梵時。三邑祠臺遊子夢，一龕香火裕民儀。  
闕前連站公園靜，廓後環街夜市奇。寺古楹聯多翰跡，臨河學海課書詩。

左廿七右卅三 北投巡禮

林松喬

北投攬勝趁春正，心曠神怡捷運行。遠望屯山迷靄靄，近看淡水醉澄泓。  
溫泉暖溜塵埃淨，關廟崔巍聖澤宏。最是曦霞光絢麗，倍增逸興喜詩成。

右廿八左四三 北捷木柵動物園站

洪龍溪

北都捷運客歡迎，動物園區設站明。飽玩貓空新景點，喜來木柵古茶棚。  
凝眸遠眺峰巒翠，豎耳聆聽鳥陣鳴。俯瞰仙公宮殿聳，人山人海日繁榮。

左三十右卅九 台北捷運站

林禎輝

電動交通似網張，眾人稱便樂無疆。等車準點皆欣喜，辦事依時不急忙。  
世界於今科技化，北城此日運輸強。文明發展何窮盡，捷速飛騰達四方。

右三十左卅六 陽明山看花有作

洪玉璋

興因行賞去來之，如畫名山景特奇。松榦翠迎饒俊士，櫻花豔引盡娥眉。  
交交黃鳥春催夢，陣陣清香客賦詩。滿眼杜鵑紅孕血，化人淚濺感傷時。

右卅一 捷運新莊站景點 邱進丁

快捷新莊一路通，尋幽古寺時空中。文昌勵學千秋頌，武聖修真萬代崇。  
體館球場多賽事，廟街夜市現流風。西園戲偶傳承久，三月酬神媽祖宮。

左卅二右四十 捷運台北車站 李珮玉

閘門一啟湧人潮，上下匆忙暮與朝。三鐵搭乘多便利，四方走訪好逍遙。  
閒來地下商街遛，興起攤前百貨挑。最是中樞車線集，悠遊各處不迢迢。

右卅二 士林風情 蕭煥彩

捷運士林人氣紅，無邊佳景入詩中。暢遊官邸花爭放，樂賞名園感靡窮。  
夜市紛開連鎖店，商街營造異邦風。舊時魚路今猶在，台北更深月色籠。

左卅三右卅五 捷運圓山站憶舊 余雪敏

夫家祖籍大龍峒，捷運於今四面通。孔廟清幽消俗慮，保宮蜂炮映天紅。  
因緣變作他鄉客，恍惚時懷舊夢中。回首半生如幻境，每談往事付東風。

左卅五 輔大捷運通 鄧強

科技運輸充競爭，新莊便捷利人行。輔仁大學培賢哲，丹鳳高中育俊英。  
相約上班歡績效，奔馳放假暢遊情。堪誇縮地功能著，善政興邦日向榮。

右卅七 文湖捷運線木柵覽勝 駱金榜

指南宮闕聳山巔，政大名聞中外前。動物奇觀敦社教，貓空麗景耀雲天。  
茶香品茗身心爽，筍脆涼甜氣味鮮。捷運文湖千載繼，覽遊木柵勝神仙。

右卅八 捷運市府站風光 陳欽財

捷運人潮擠滿場，尤其市府站頻忙。繽紛景點鵲城頌，輻輳交通錫口揚。  
書局輝煌文化雅，餐廳燦爛饕餮香。宛如紐約風情畫，上國衣冠習尚光。

左卅九右四五 台北捷運新店站

黃廖碧華

搭乘捷運碧潭遊，峭壁懸崖耀眼眸。異草綺花沾玉露，吊橋奇石綴溪頭。  
林間漫步迎曦日，亭內吟哦賞晚舟。身在桃源塵世外，心清氣爽復何求。

右四二

捷運善導寺站風情

歐陽開代

板南南港永寧連，善導寺關中道沿。層殿檀香聞遠磬，五星飯店宿群賢。  
烈陽似父催耕急，柔月如娘疲倦憐。此域藍雲長澈日，何時綠鳥九霄翩。

右四四左四五 捷運忠孝復興站

黃天賜

忠孝街頭雨後晴，新春無事一身輕。交衢站上人繁擁，商肆門庭客滿盈。  
連結西東高運轉，貫穿南北利經營。四方發展通郊市，萬物流行世可榮。

## 元春組例會

時間：101年4月29日

地點：吉祥樓

收稿：五十件

首唱：瘦肉精風波

左 詞宗 邱天來 先生選  
右 余美瑛

左元右廿二

陳麗華

明察窮追眼似鷹，精添瘦肉法須懲。那堪美售催方急，為利邦交拒未能。  
毒害恐難防入口，忿悃漸積欲填膺。何如共減茹葷味，有市無沽最可憑。  
左詞宗評：鋪陳有序，轉結規警淵永有味。

右元左六

周福南

美牛壓境風雷起，蠱測超標瘦肉精。防疫破功漫毒素，有司惶恐匿真情。  
悖離人道千秋禍，驟失商機百業驚。鯤島何辜蒙浩劫，廟堂喪志累蒼生。

左眼右三十

洪龍溪

美國牛含瘦肉精，外銷世界令人驚。奸商惡劣時時見，政府無能處處明。  
食品風波侵萬象，貨源焚毀護蒼生。中央即速嚴刑罰，確保民康受好評。  
左詞宗評：瘦肉精遺害無窮，法宜嚴竣，可保安康，語無泛設。

右眼左七

洪世謀

去年塑化鬼神驚，今歲還憂瘦肉精。受害黎民知有弊，稱能政府竟無聲。  
那堪談判堅開放，致使串連掀抗爭。朝野相期同督促，食安第一創雙贏。

左花右五

蔣孟樑

由來瘦肉毒心身，政治風波更擾人。色味香能迷本性，貪瞋癡可損元神。  
眾生設使甘茹素，百姓應無苦受辛。口業而今干國運，省思共勉靖囂塵。  
左詞宗評：次聯曲折寫出，口業有干國運，於微見著，自是作手。

右花左十三

李玲玲

強權日逼國基危，對應無能後世嗤。鳥為食亡誠可鑑，君違民意實堪悲。  
肉精毒害人傷體，業者利空腸斷時。只嘆朝中多酷吏，唏噓黎庶悔猶遲。

左四右廿三

李政村

美牛進口旨經陳，食不安心感慨頻。國盛傾消施霸道，力微驚恐懼強秦。  
衛生局懶疏臨檢，瘦肉精侵帶病因。貿易平衡嚴訂約，行知立德護人民。

右四左廿九

陳淑芬

丕變人心道已淪，即今誰是國之樁？美牛一出群情起，政策三苛猛虎狺。  
輕忽食天緣利益，堪嗟主事飽經綸。強權凌弱誠無奈，廣拓桃源力避秦。

左五

張錦雲

豬牛飼料拌精丹，瘦肉餐長害肺肝。美畜傾銷商欲闖，台人執法律當關。  
共珍環保天然味，公佈投機惡毒欄。東亞病夫遺恨醒，身康國固子孫安。

右六左十九

林政輝

選前禁放說雌黃，選後開關失立場。拍馬高官朱紱佩，貪財美帝黑心將。  
生民篤厚欺瞞易，瘦肉甘甜毒害長。終極原由君覺否，吾家綠卡畏燈光。

右七左卅四

孫秀珠

沉淪世道幾時休，私藥居然瘦豕牛。商譽不堪貪賈劫，食安豈僅賤民憂。  
淳風吹古仁為本，峻法推今德以脩。力挽人心期府院，把關嚴正解千愁。

左八右二十

邱進丁

瘦肉風波撼美牛，健康危害眾擔憂。台灣消費安全失，異國財團暴利牟。  
恐有貪婪官瀆職，豈無疏忽政含羞。能誰肯把高標準，朝野攻防滾雪球。

右八左三十

許又勻

人心不古鬼神瞋，利字當頭善性泯。鷄鴨肉精參飼料，豕牛抗素注軀身。  
哀哉道失官僚惰，嘆息貪萌毒販淪。鼎鼐應勤安食檢，莫教黎眾怨尤頻。

左九右十七

杜美華

瘦肉風波鬧不勝，揚揚沸沸氣氛蒸。食來不啻魚吞餌，開放更如蛾撲燈。  
部長難為憑智慧，官員慎察共擔承。解紛謀福黎民幸，思化干戈履薄冰。

右九左廿四

黃天賜

含精瘦肉惹風波，食物公安似著魔。為害無形防不及，因疏致損罪如何。  
怨聲載道悲情重，累月謀方意見多。罔顧健康朝野憤，豈堪敗德入詩歌。

左十右十六

洪淑珍

毒素新添瘦肉精，全臺駭動忿難平。又傳密策關簽證，若畏強權便不情。  
牛豕何辜移物性，政商交利禍民生。今惟拒食安康保，管控期能嚴執行。

右十

許哲雄

牧野芻菁自古然，汰腴投劑已違天。腐腸殘毒儒流誠，啄肉餘香客店傳。  
饕餮耽珍憎引鑑，官衙翦害勸吞涎。若緘饞口寧無德，捨爾餐精禍起漣。

左十一右二七

王 前

美牛風暴震蓬瀛，萬姓懷憂瘦肉精。官府紛紛商對策，論壇擾擾發高評。  
攸關世貿來時路，安撫人民且免驚。遺毒嚴防祈縝密，身心確保自無聲。

右十一左四十

康濟時

萊克多巴胺不安，美牛開放起波瀾。莫衷一是交征利，各飾其非檢認瞞。  
激素雌酚前鑑在，肉精風險後防難。鯁言司政行王道，民食為天勿小看。

左十二右廿六

陳漢津

花蹄豨養犯疑猜，瘦蟲增精背道來。未效張騫通異域，偏隨美國騙全臺。  
焉知輔宰安誰土，怎讓貪蠻奪我財。豈為免簽頻割地，毒流瀛海則徐哀。

右十二左十四

陳麗卿

瘦肉精牛禁解開，釀成風暴禍蓬萊。顛預腐吏甘人宰，穀鯁愚民任美裁。  
食毒不防身毒作，他生未卜此生隕。噬臍之策餘深痛，累及兒孫白骨堆。

右十三左廿三

葉金全

美牛壓境擾臺灣，嚴管條文緊把關。瘦肉精含多毒素，浸毛鳩害遍人間。  
但為府院開門戶，罔顧生民作草菅。惹起風波難止息，安心啖食幾時還。

右十四左卅五

楊錦秀

瘦肉原來有毒精，風波湧起亂蓬瀛。牽連政治關經濟，損壞心身值論評。  
奉勸國人多素口，真修佛道渡蒼生。狂瀾共勉邦家福，不食美牛平鬥爭。

左十五右廿五

陳欽財

風波沸沸萬民驚，萊劑基因惹激爭。土畜安全無確意，美牛標準有疑聲。  
腎萎害命千徵起，心悸傷身百病呈。仿照歐盟嚴進口，歡騰社稷樂蒼生。

右十五左四一

歐陽開代

三牲戶戶好燉烹，含否瘦精標未明。守舊西歐加料禁，望新北美減肥迎。  
財經四海仍風浪，朝野孤鯤費舌鎗。葷食脂高羸脈絡，何當翻素倍餘庚。

左十六右十九

林松喬

美牛開放最紛爭，飼料添加瘦肉精。劇毒柔腸興禍害，珍饈爽口起悲情。  
違仁悖道無公理，失職當權欠共鳴。畢竟病常從口入，自求多福自調羹。

左十七

郭三河

疑毒驚醒舉世人，含精瘦肉惹傷身。害人利己仁何在，誤政失譽信已淪。  
食品公安當務實，物源管理莫因循。諄諄寄語司權者，正視民生執法真。

左十八右廿八

張耀仁

美牛瘦肉毒台疆，惹起風波撻伐強。政府分心除禍患，人民在意保安康。  
扶興畜牧餐豐足，輔盛農漁庫滿藏。食品衛生須立法，登高呼促絕荒唐。

右十八左廿一

李宗波

執政官方未檢真，豬牛瘦肉禍全民。一人為利施奸計，百姓無知却害身。  
失信商場名譽損，難堪國際罵聲頻。傷天逆理終須報，論罪追查判果因。

左二十右卅八

洪玉璋

何事政商渾一團，美牛進口變多端。只因瘦肉精含毒，未許肥雞脆上餐。  
佐酒愁教腸易病，延賓恐惹腹難安。驗豬鵝鴨都傳染，衛控無方孰問官。

右廿一左卅二

張民選

牧畜增添瘦肉精，圖求暴利早生成。貪饞後患留人痛，惡意前愆舉國驚。  
市面蕭條停買賣，民心怨背動遊行。當朝政府除門禁，黎庶無辜祭作牲。

左廿二

姚啟甲

美味牛排市賈迎，乍聞含毒客心驚。昔時不嚼揚州鶴，今日盲吞瘦肉精。  
最恨官商名利醉，那堪筋骸健康傾。何如共享清齋樂，炊黍蒸藜體自輕。

右廿四左避

邱天來

美牛開禁惹爭端，瘦肉精爭亂一團。貿易對談嗟草率，官僚心眼欠宏觀，  
肥甘失質饞多忌，賣相非天食不安。有礙健康同蠱毒，當權管控莫欺瞞。

左廿五右卅七

林禎輝

當今混亂最難平，電視宣傳各惡聲。瘦肉精災人競說，傷人體質病來生。  
國家設想安民樂，大眾希求息事鳴。至好真心同協議，自然漸漸使圓成。

左廿六右卅三

林玉枝

瘦肉精加飼料中，今知有害怎裝聾。美牛壓境官顏綠，百姓祈天淚眼紅。  
舉國嚴宣宜勵守，全民拒購不驚攻。先行避毒災殃解，再議商機論世雄。

左廿七右卅五

賴添雲

美牛霸道眾心寒，瘦肉精摻毒入餐。政策無方寧屈服，衛生有漏竟欺瞞。  
全民受害情何忍，兩黨相爭誰可安。沸沸傳媒群意怨，悽悽寶島似刀剗。

左廿八右卅四

黃明輝

愚民票選出無能，毒肉風波怨苦凌。三桂衝冠清狗引，獨驄暗服美牛登。  
馬鞍光照遊邦國，意氣驕浮唾友朋。何事寧招名共滅，不參百姓冷心凝。

右廿九左卅三

蕭煥彩

瘦肉精災禍已知，安民保健不能遲。專家信誓低風險，政府把關嚴尺規。  
仍見反潮疑慮湧，但祈良策澤恩垂。美牛無毒方開禁，貿易雙邊善護持。

左卅一右避

余美瑛

何由怒火連天起，頂戴強銷瘦肉精。一意廟堂圖逼陣，無心鼎鼐鄙民情。  
明君立牧人為貴，黎庶孳繁國本榮。豈欲生前沽譽事，徒令後代斷芳菁。

右卅一左卅八

古自立

境處台灣嘆可悲，任人刀俎苦難離。關鬆瘦肉精牛進，政縱禽流感疫弛。  
拋棄健康求利益，哄抬物價亂收支。官無善策民當壯，谷底翻身在此時。

右卅二左卅六

王宥清

加料美牛催長成，台灣進口眾疑驚。食傷人體關難把，售反商規法未明。  
黎庶無辜權益損，官員失職怨尤生。欲將政府沉痾治，對症奇方瘦肉精。

右卅六左卅七

吳秀真

毒害全台瘦肉精，群心憂懼怨聲鳴。無能政府強權屈，弱勢黎民王道爭。  
齊漲物資薪更薄，雙飆油電罪非輕。食安睡穩何其渺，寶島虛名步步營。

左卅九

徐世澤

萊克多巴胺甚香，美牛肉內少脂肪。歐盟宣布將傷胃，山姆自稱不損腸。  
韓日認同能進口，台灣抗議莫輕嚙。降低膽固醇高病，詳定安容標處方。

右卅九左四二

駱金榜

健康動物優成長，減少脂肪瘦肉強。破壞心胸兼血管，摧殘肝肺及身腸。  
培林喘氣能流暢，農會標規合準章。中外豬牛嚴檢驗，免留餘毒致人亡。

右四十

黃祖蔭

飼料頻添瘦肉精，便宜其事害其生。饗飧戒食屠場靜，悔恨貪肴病榻聲。  
衛署官員忙不迭，家庭主婦怨何盛。無辜畜類先蒙罪，治國誰如作小烹。

次唱：懸崖勒馬

左 王 前  
右 詞宗 康濟時 先生選

左元

葉金全

馬躍中原志九霄，行空萬里路迢遙。安全駕御瞻前景，步步為營禍害消。

右元左四

黃廖碧華

物資波動已成潮，良策難謀百姓焦。若不懸崖知勒馬，民心思變國傾搖。

左眼右十二

蔣孟樛

龍驤千騎欲干霄，絕頂狂奔氣勢囂。總是危崖知勒馬，多留餘地百災消。

右眼左二五

王宥清

語帶天真性帶驕，不知時局已蕭條。賦詩祈諫當權醒，勒馬離危創富饒。

左花右三二

蔡業成

千尋峭壁勢凌霄，一騎如飛萬里遙。馳到懸崖期勒馬，縱然剎住亦魂消。

右花左二七

唐 羽

施政由來里路遙，何能一蹴達雲霄。青苗舊事君須記，勒馬懸崖諫國朝。

右四左四四

余美瑛

革新戈戟似塵驍，鯤島哀鳴遍市朝。不食人煙施錯帖，唯今勒馬仰芳椒。

左五右十七

陳麗卿

物價齊飛怨怒燒，如流民意捲狂潮。國人生計艱難甚，馬勒崖前政績昭。

右五左七

楊錦秀

絕頂懸崖聳碧霄，居高思險自逍遙。回頭勒馬知時務，萬劫紅塵應可消。

左六右避

康濟時

失策無能物價飆，苦民之苦蔚風潮。及時勒住臨崖馬，翻轉人心創富饒。

右六左十二

許哲雄

追風踏雪莫矜驕，指鹿終難絕壁超。一旦臨崖繯弗縱，還將驥尾媿驕驕。

右七左十

甄寶玉

全球經濟陷低潮，物價齊升民怨招。安得良謀知勒馬，同心協力破蕭條。

左八右十八

張耀仁

物價飛騰百業凋，人民受苦怨冲霄。懸崖勒馬猶能救，否則邦家似火燒。

右八左三十

蕭煥彩

財經積弊要除消，改革之途千萬條。面對懸崖多險阻，當先勒馬免民凋。

左九右二六

孫秀珠

凌風踏雪任狂飆，不見芳華足下凋。勒馬崖前回首望，為營步步在今朝。

右九左四二

張建華

太平假相不須描，燥進誰知遇斷橋。勸汝廟堂多士輩，為邦且莫向前超。

右十左二三

邱天來

民生經濟感蕭條，油電何堪向上挑。十里路行憑馬力，危崖勒住盼當朝。

左十一右三三

林松喬

雄心壯志氣如霄，一躍飛騰欲奪標。萬丈深淵無限險，應知勒馬更高超。

右十一左十八

李玲玲

指鹿司權社稷挑，路遙馬力識今朝。臨崖馳騁前蹄失，緊勒回頭眼界遙。

左十三右十六

張民選

權行新政馬蹄驕，無顧民生物價飆。道向懸崖猶不覺，愁籠寶島眾心焦。

右十三左三四

沈榮槐

奔馳萬里逐風潮，路斷崖深醉意消。冷汗攻心何處去，莫如回馬樂逍遙。

左十四右十四

陳保琳

傾中政策惹驚潮，怕落深淵不得饒。渴望懸崖能勒馬，全民鬱結百憂消。

左十五右三七

翁正雄

騷翁神駿志高超，何用機心出絕招。誠信待人知進退，行吟萬里馬蹄驕。

右十五左三二

許又勻

油電齊揚百業凋，群黎困頓蘊心焦。於今執政招民怨，回首運籌善策調。

左十六

林政輝

踏上金鞍舞綠腰，橫行無阻比天驕。莫誇日走三千里，碎骨紛飛在此朝。

左十七右三八

吳秀真

盛氣凌人悍語飆，禍因易惹怨聲招。宜修心口無嗔恨，萬事圓融瑞氣饒。

左十九右二七

李宗波

國家機制感蕭條，油電民生萬項颯。縟節繁文須革弊，懸崖勒馬化心焦。

右十九左三七

黃祖蔭

水盡山窮勿再飆，千行百業面臨凋。層峯若悉基層苦，改善民生急孔昭。

左二十

游振鏗

民情不恤業蕭條，一躍龍門霸又驕。油電齊揚生計苦，何由百姓一肩挑。

右二十

賴添雲

油電雙騰泛怒潮，全台物漲眾浮焦。當朝應速求良策，勒馬安民止怨燄。

左二一右四十

陳碧霞

存心藐視遇狂潮，昨是今非氣勢驕。似景前程終破滅，懸崖趁早脫塵囂。

右二一左避

王 前

南征北討馬蹄驕，坐勝狂吹得意簫。寄語崖前須勒轡，莫教失足禍來招。

左二二右三十

杜美華

利祿功名鬼魅邀，世間誰信是天驕。臨淵險惡應知止，勒馬懸崖劫運消。

右二二左四五

洪淑珍

危崖慎避馬蕭蕭，風入霜蹄意氣饒。行事尤當先三思，前途朗朗萬民要。

右二三左三六

周福南

油電齊升百業凋，群黎怒氣達雲霄。廟堂勒馬民心護，共渡時艱日月昭。

左二四

林禎輝

懸崖馬勒勇和調，事事深思不可驕。正義為公多協議，長教萬眾樂逍遙。

右二四左二六

姚啟甲

駑馬狂馳四野凋，政衰財弱眾心焦。當思赤兔懸厓阻，極待清平望帝堯。

右二五左三三

張錦雲

空前蹇政歷寒潮，盲向懸崖國險招。失業炒房生計漲，何如勒馬效唐堯。

左二八右四四

陳漢津

砌月栽雲好騁遙，民生罔顧愛吹簫。三家四聖詩猶盛，賦送蟠龍入九霄。

右二八

陳欽財

懸崖直瀉百危挑，勒馬臨時海濶朝。民主恆當民最貴，聞聲救苦德仁昭。

左二九右四一

洪世謀

辰年百業更蕭條，政府緣何水電飄。不恤民情生計苦，燃眉速解怨方消。

右二九左三九

歐陽開代

連綿烽火萬魂凋，歸罪王侯失足燒。倘若懸崖君勒馬，團圓戶戶子孫驕。

左三一右三九

駱金榜

危惡高山險步超，旅遊賓客樂逍遙。懸崖勒馬名成語，學者諸君喜想描。

右三一左四三

林瑞祥

氣霸江山一片嬌，高崖盡處斷魂橋。殘民治國如懸馬，常引英雄競折腰。

右三四左四一

郭三河

公營雙漲必蕭條，物價飛揚吃不消。得放手時須放手，懸崖勒馬自逍遙。

左三五右三六

陳淑芬

傲嘯人間氣燄燒，興來馳騁趁風潮。駕凌絕頂應旋止，俯仰雲山不易描。

右三五

黃天賜

雙漲公營引怒潮，國家經濟必蕭條。順民行事回甘味，他日春風一担挑。

左三八右四五

陳素真

追風逐影覓高標，世路臨淵步履搖。放下虛名身度外，無憂高臥自逍遙。

左四十右四二

李政村

雄心萬丈計謀刁，恥笑紛爭志氣要。世局人情多變化，名山隱避樂逍遙。

右四三

黃明輝

未秋但見棘千條，氣結盲行斷壁腰。耆老多悲求勒馬，金羈自飾自情驕。

## 端陽組例會

時間：101年7月1日

地點：天祥路吉祥樓餐廳

首唱：台灣願景

左 詞宗 翁正雄 先生選  
右 魏秋信

左元右九

許哲雄

千萬生家寄海東，彈丸孤嶼盼和戎。蝸蟻世局囂囂裡，眇睽鄉關郁郁中。  
兩岸連心原侈望，三臺一志乃深衷。政壇冰炭欣能化，所禱蒸蒸國運隆。

右元左二一

蔣孟樛

自古蓬萊勝跡妍，雄圖願景美無邊。三臺科技人才盛，兩岸交流貨物全。  
政治清明興建設，庶民安樂薦名賢。調和藍綠平爭鬪，璀璨榮途在眼前。

左眼右十六

鄧 強

鯤瀛文運壯千秋，訓育英才會勝流。願禱騷人揚雅士，聯盟藝苑萃賢儔。  
民權得主中華國，聖教同宣大陸洲。維護自然生態美，節能減碳境清幽。

右眼左二三

洪玉璋

萬島氤氳紫氣騰，台澎金馬卜祥徵。外交突破雄圖展，內政推新景命膺。  
力振工商財滾滾，精研科技業蒸蒸。更期朝野心聯手，黎庶奚愁國不興。

左花右十三

陳麗卿

民不聊生物價騰，勵精圖治策中興。財經發展宜權變，水土保持尤戰兢。  
藍握乾坤膺重任，綠提韜略贊高層。時艱一體瀾成見，願景蓬萊紫氣凝。

右花左二九

洪世謀

行看寶島好山川，敦厚民情文教全。開發觀光宏遠景，深耕科技著先鞭。  
心驚國政梟雄染，意恐朝綱法治眠。但盼廟堂拏魄力，振興經建步堯天。

左四右三一

連珊屏

臺灣寶島嬾天堂，氣候溫和百業昌。為黨爭權趨變態，因私失德轉輕狂。  
革新政治全民願，舉拔人才護國疆。且看雲開浮瑞象，生機璀璨耀邦光。

右四左八

杜美華

朱明當世繼清朝，羈客東來似海潮。一島風情稱薈萃，多方文化盡招邀。  
宏觀國際接新軌，廣納人才去惡僚。兩岸睦修期共勉，蓬瀛願景效唐堯。

左五右十八

葉金全

寶島從來儉樸淳，農工百業盡勤辛。嚴苛賦稅歸公庫，暴漲油鹽損薄薪。  
樽節資源除浪費，籌謀善策免沉淪。若能體念蒼生苦，長願清廉顧萬民。

右五左三十

林玉枝

中華百業締高薪，寶島繁榮日創新。國聘慈賢興社稷，官邀德慧護黎民。  
廉能掛帥文風振，禮教為基鷺侶珍。朝野和諧同改革，財經騰達永如春。

左六右二二

賴欣陽

先人華路啟山林，仙島蓬萊海客臨。萬里風帆輻湊至，千尋玉嶺礦藏深。  
幾修憲法民為主，頻改成規利塞心。勿忘艱辛開闢道，幽蘭空谷待佳音。

右六左十七

王 前

咸誇寶島四時春，物產豐腴景象新。族性勤勞情獨厚，友邦商賈喜為鄰。  
交通便捷臨鄉鎮，經濟繁榮縮富貧。國譽蒸蒸揚世界，直看瑞氣迫江津。

左七

蠻觸之爭可早休，莫燃箕豆共榮謀。違心政客摻戈歇，翹首賢君郅治求。  
富裕猶思興教化，和諧更冀創新猷。行看鯤島堯天近，雅韻迎風萬事悠。

姚啟甲

右七左十二

自由寶島四時妍，文化興邦國祚綿。政治清明無污吏，財經盛旺有高賢。  
心期朝野能攜手，願望勞資共並肩。環保觀光揚四海，安和好禮富年年。

蕭煥彩

右八左十三

靈山秀水勝丹丘，物產豐饒景色優。地利觀光勤拓展，才專科技力籌謀。  
工商運變開新局，朝野和諧棄舊仇。兩岸紛爭停戰鼓，安居敬業樂何求。

張民選

左九

電機資訊著蓬萊，威震全球龍虎摧。眾傑鑽研歐美勝，三權分立桂蘭栽。  
文儒聖道薰諸族，科技新珍積兆財。民主興邦中外羨，玉山瑤景襯櫻梅。

歐陽開代

左十

鯤瀛四季百花香，砥柱中流鎮海疆。南國騷風留采藻，玉山齋雪兆禎祥。  
安邦執戟江河固，民主人權日月昌。廉吏宏才謀國富，東方瑞士自由鄉。

周福南

右十左十六

兆民咸賴願心描，八德興教著首招。善俗移風文武勵，精忠愛國利名超。  
商機配合財經策，生態護維環保標。廉政一針功見血，溫情寶島樂豐饒。

張錦雲

左十一右三十

自古經綸氣象雄，覃敷德政濟時功。賢才薦拔逢其位，俊彥圖維厲自躬。  
國得嘉猷民不怨，心能逸樂眾爭從。綠藍自鬥摧廊廟，願乞東寧安泰中。

陳麗華

右十一左二四

洪淑珍

蕞爾臺灣兀海隅，隆興經貿拓前途。肥貓社鼠期消滅，科技人文要比驅。  
民富政清尤怨弭，風調雨順禍災無。家家樂業居安定，四境昇平景氣蘇。

右十二左三一

陳保琳

世局翻新蛻變中，自由民主蔚成風。加強建設財經勃，注重人文教育蓬。  
固守家園憑眾志，提昇國格仗元戎。和平郅治當欣見，社會安寧第一功。

左十四右二五

余美瑛

披堅執銳行王道，襟帶遠東雄略營。文武經綸持藻鑑，工商平準濟鈞衡。  
安居甘食饒民牧，樽節開源眾業閔。非核鯤臺君子國，煙溪疊翠畫圖呈。

右十四左十九

黃廖碧華

台灣政治亂多秋，景氣蕭條百姓憂。水電頻增招眾怨，物資波動惹人愁。  
但祈元首施良策，更盼諸公獻善謀。若解危機救經濟，工商發展願能酬。

左十五右二九

駱金榜

社會繁榮水乳融，族群團結氣如虹。推行國策嘉猶獻，擴展邦交幸運隆。  
互惠和平登兩岸，拓開經濟策三通。台灣願景施民主，寶島將來進大同。

右十五左十八

蔡業成

如春四季氣祥和，勝景天然願景多。文物鍾靈堆錦繡，山川秀麗舞婆娑。  
自由法治千秋頌，民主人權萬代歌。兩岸交流新局創，大同世界息干戈。

右十七左三三

郭三河

連朝梅雨虐瀛東，久凍薪津萬庶窮。困頓財經誰振起，高昂歐債詎消融。  
兆民切望匡時主，百業期收救弊功。朝野昌謀同盡力，調和鼎鼐賴元戎。

右十九左三四

楊錦秀

仙鄉寶島擬蓬萊，四季花香氣象恢。願景應須科技展，宏謀更待貿商來。  
賢能當政雄圖壯，貨物盈豐建設開。兩岸流通興世界，前途璀璨廣招徠。

左二十右二三

甄寶玉

全球景氣久低迴，霜凍蓬瀛百事哀。已見寒風飆物價，更傷豪雨釀天災。  
財經籌劃陰霾散，朝野和諧霽色開。願得賢能三吐哺，堅貞共濟待春來。

右二十左二五

盧麗美

油電齊揚百業難，權門止憤挽狂瀾。繁榮股市民心盼，穩定金融國步安。  
經濟提昇開願景，政風廉潔自天寬。請君立足屯山望，片片祥雲絢可觀。

右二一左三五

黃天賜

豪雨連綿異昔時，崩流土石苦創痍。農災補貼當難得，路損重修實可期。  
社會安寧需警力，財經改善賴商資。科園產業全球譽，上下營謀壯國基。

左二二右二六

陳欽財

台灣願景擾詩腸，墨客祈天降瑞祥。瘦肉精滋心百慮，禽流感發體多傷。  
人人有業三綱振，處處無私六義匡。社稷臨春迎國泰，貞觀郅治樂洋洋。

右二四左三二

游振鏗

自由獨立譽名垂，寶島風光異昔時。興利當先除弊陋，執權端要樹猷為。  
環評加重商機失，文創繁開景氣期。朝野同心經濟計，小龍可望見雍熙。

左二六右二七

林松喬

哀鴻遍野嘆聲深，為政當須細察尋。黨閥紛爭虛國本，財經失策痛民心。  
安和樂利羣黎望，郅治宏開萬戶欽。殷盼秉鈞謀大略，台灣奇蹟又光臨。

左二七

黃祖蔭

地位胡言未定論，先驅懇此曰埋冤。連橫備述臺灣史，日本歸還禹甸門。  
民主自由揚大陸，聖人媽祖祀瀛垣。新潮激發誇文創，道統綿延重寶存。

左二八右三三

張耀仁

選舉公平眾志催，輪流執政府門開。傾中屈膝將淪野，擁獨興邦合上臺。  
保護人權修法制，繁榮經濟仗賢才。蓬壺富庶黃金島，更願光明豈讓猜。

右二八

沈榮槐

四面汪洋峻嶺高，地寡人稠怎自豪。經貿來興通海外，科文重振引風騷。  
生民樂利開新運，世態安平落彩毫。放眼環球連兩岸，盼成蓋世一金鰲。

右三二

李宗波

採納良言順水行，方能改革肇昇平。深耕護士千秋計，減稅豐民萬載盛。  
吐葉從柯真植繼，伸枝發鬱顯崢嶸。中央政策謀而動，朝野齊求奕世名。

右三四

吳東晟

隆中高士亦無言，十載河清敢妄論。杖遍一鄉皆父老，債留萬世累兒孫。  
攘災佇待欲心息，養德可能生意繁。不與頂峰爭卓越，但存仁義在乾坤。

右三五

林忠義

歐債洶洶漲似潮，全球影響業蕭條。宏揚聖道頽風挽，處理危機毅力超。  
科技創新多策勵，財經懋績眾肩挑。昇平政比桃源地，願景欣成樂富饒。

次唱：暴雨

左 詞宗 蔡業成 先生選  
右 洪玉璋

左元右十三

黃天賜

暴雨成災黎庶辛，匡時治水免沈淪。狂瀾倒挽吾儕責，朝野同心福國民。

右元左十一

黃廖碧華

狂風雷電雨頻頻，遍地成災信有因。治水無方怨聲起，急謀良策拯黎民。

左眼右二九

林松喬

傾河倒海釀沉淪，土石淹流遍地湮。拯救瘡痍謀善策，當權有責息哀民。

右眼

游振鏗

傾盆暴雨劫江濱，流石摧橋斷路瀕。田畝村鄰成澤國，千千積潦苦全民。

左花右十

王尚義

驟雨滂沱日夜頻，低斜屋困水皮呻。豪門那識窮家苦，百尺高樓品上珍。

右花左六

甄寶玉

滂沱急雨漫村鄰，連夜成災困島民。朝野一心謀計策，同舟企盼濟鄉親。

左四右三十

邱天來

沛然急處洒江濱，直似人情變幻頻。何不成霖除旱魃，來沾好雨惠黎民。

右四左十四

連珊屏

潑墨傾盆水漲頻，路沈屋毀慟哀呻。吾儕共策防災變，確保家邦事可珍。

左五右七

張民選

猛雨傾盆日夜頻，堤崩道斷遍災民。長年治水功何在？嫁禍蒼天騙國人。

右五左二十

鄞 強

偃草風飄倒屋頻，雨師橫掃害人身。眾宜防犯洪濤捲，減免天災護庶民。

右六左十八

王 前

蓬瀛梅雨落連旬，突變天容暴戾頻。地裂山崩流土石，風號水漲苦蒸民。

左七

張耀仁

翻盆倒海落凡塵，果菜逢災活計貧。政府無能農受苦，何時革弊救全民。

左八右十五

蔣夢樑

蓬萊暴雨虐經旬，土石奔流苦眾民。減碳節能消瘴氣，風和日麗靜囂塵。

右八左二三

陳麗卿

俄然沛雨勢力鉤，土石成流市野湮。屋毀稼傷程險阻，綢繆善後累官民。

左九

姚啟甲

傾盆驟雨淨烟塵，紫電狂風鬼怪呻。惡豹貪狼聞喪膽，深祈潤物澤鄉鄰。

右九左三二

蕭煥彩

傾盆倒雨發天嗔，暴裂山洪禍害頻。一夕淹台何處訴，上蒼憐我可回春。

左十

陳淑芬

極端氣候最關身，大雨來臨似暴秦。環保節能成首要，地球清淨煥如新。

右十一

林禎輝

暴雨施威掠劫塵，流災一發稻沈淪。農夫解困多金助，長計堪忘治水新。

左十二右三四

楊錦秀

忽來暴雨虐紅塵，土石奔流困眾民。舜海堯天唯在此，節能減碳護天鈞。

右十二左二六

陳碧霞

電閃雷轟眾畜呻，沛然雨勢禍災頻。山崩地裂終需究，府院無方更畏神。

左十三右十六

郭三河

連朝暴雨使人瞋，土石洪流掠劫塵。寄語當權施濟急，莫教災者入沈淪。

右十四

施得勝

淋鈴入世惡無垠，困感黑雲龍降瞋。物我誰無安樂意，莫隨暴亂作波臣。

左十五右二四

林忠義

底事天容一變真，連朝暴雨苦黎民。平衡生態當前急，趁早綢繆助比鄰。

左十六右十七

陳欽財

滂沱大雨暴行頻，土石流延禍四鄰。馬路成河財命毀，祈天庇佑保鄉親。

左十七右避

洪玉璋

狂風颯電猛雷陳，雨勢盆傾海漲頻。土石流淹田舍毀，有誰憐憫老農民。

右十八左三十

洪世謀

黑雲罩頂雨驚人，一霎家園看委淪。天帝如何毋憫恤，為霖時候盼懷仁。

左十九右二十

盧麗美

橫天疾雨襲來頻，淹沒房車泣鬼神。土石如河奔日夜，防災共策救黎民。

右十九左二八

賴欣陽

傾盆天水沒黎民，玉帝猶思動海鱗。破碎山河倩誰補，烏雲掃盡一朝新。

左二一

周福南

聖嬰暖化轉天垠，驀地風雲起怒瞋。驟雨狂流摧沃野，疏洪治水好安民。

右二一

許又勻

燄陽如火更蒸人，倏忽漫空急雨頻。雷震山河天地動，頓教暑滌豁吟身。

左二二

吳秀真

滂沱一雨灑江濱，積澇連番害我人。天意何當詢眾意，農家畎畝最堪珍。

右二二左避

蔡業成

傾盆暴雨夜連晨，捲地敲窗驚四鄰。好夢難尋人亦倦，鄉心滴破最傷神。

右二三左二七

吳東晟

水滿通衢見渡津，雨傷禾稼委泥塵。匝旬災沴無甘旨，如此天心太不仁。

左二四右三二

杜美華

霹靂經旬毀八垠，全台處處水漫塵。難知天算黎民苦，祈換甘霖莫虐人。

左二五

余雪敏

郊行避暑路徒辛，暴雨來臨若洗塵。大地回春逢德澤，及時潤物護生民。

右二五

陳保琳

當空幕蓋黑雲屯，雨驟傾盆窪地淪。慎戒山洪如猛獸，嚴防災變護人民。

右二六左三四

葉金全

氣候無端暴雨頻，沿河堤決漫村鄰。稻田倒穗老農苦，淚向蒼天何處申。

右二八左二九

洪淑珍

滂沱急雨下天津，俄爾汪洋市若齋。傷稼淹園災禍痛，如何疏導護全民。

左三一

賴添雲

山崩屋倒水汪垠，惡吏欺鄉難萬民。造禍有因天意逆，拋私節慾化祥津。

右三一

李晨姿

驟雨傾盆泥滾滾，摧來雷鼓響頻頻。期能改善祥和氣，撥得雲開見草茵。

左三三右三五

張錦雲

傾盆若聚力千鈞，國壘鬆侵防滾輪。警報百災隨暴雨，知時應策護黎民。

右三三

李宗波

傾盆直瀉滿街人，滌盡炎威在水濱。恰似天河能洗馬，鄉心滴碎本性真。

## 中秋組例會

時間：101年10月13日

地點：天祥路吉祥樓餐廳

首唱：懷詩聖杜甫

左 詞宗 蔣孟樛 先生選  
右 蕭煥彩

左元右廿四

葉金全

精深史筆浩汪洋，詩聖宏篇振大唐。百世吟情懷子美，千秋碩望仰襄陽。  
稻江鼓唱知音賞，瀛社薪傳演講揚。昔日草堂雖困乏，浣花溪畔永流芳。

右元左十一

許欽南

自期稷契志堪欽，世亂家貧只苦吟。憂國多艱花濺淚，憫民三別鳥驚心。  
生時詩史孤忠在，死後文星萬古沉。憑仗騷章垂宇宙，尊稱詩聖到如今。

左眼右廿三

蔡業成

少陵野老憶從前，轉瞬一千三百年。愛國丹心昭日月，憂時騷句遍山川。  
佳辰感賦懷詩聖，雅會豪吟萃謫仙。遣興衣冠來濟濟，文風鼓吹筆如椽。

右眼左七

許又勻

緬懷工部思悠悠，國破騷人萬斛愁。天末朝昏嗟李白，庭前月夜憶鄜州。  
題襟吐鳳詞如錦，握管雕龍曲似流。最是文章驚四海，名標詩聖頌千秋。

左花右四

洪世謀

才高筆健敵揚雄，萬古流傳杜律工。望重士林同李白，賦驚帝闕友嚴公。  
忠君愛國干戈際，老境孤舟涕淚中。茅屋秋風仁性在，少陵典範值推崇。

右花

張民選

春秋大筆史留詩，滿腹經綸不得時。境域干戈窮厄困，天涯骨肉苦流離。  
文材傑出君臣愛，命運衰微今古悲。律切精深矜後輩，草堂萬世聖名垂。

左四右七

余雪敏

盛唐杜甫譽如天，史筆留芳不計篇。昔日草堂松鬱茂，祇今溪畔客流連。  
蓬萊島上懷詩聖，瀛社筵中解鄭箋。憂國憂民如蜀相，古今中外仰才賢。

左五右十九

黃天賜

杜陵史筆共高瞻，詩聖文章格律嚴。唐世齊名惟李白，葩經遺意匹陶潛。  
任官鎮蜀聲名著，望嶽憂民涕淚沾。風疾舟中書伏枕，可憐子美歎時淹。

右五左廿四

翁正雄

杜甫追懷何處尋，吉祥樓上此登臨。曲江二首花飛滅，蓬島千秋賦感深。  
句賞莫流今日淚，詩題遙繫故園心。憂民憂國憂天下，秋興聯章一朗吟。

左六右避

蕭煥彩

憂民更甚屈原愁，杜甫追思共一樓。千載詩章傳海嶠，八篇秋興憶夔州。  
哀時有感王孫賦，述志無邪鷗鷺儔。望嶽會當凌絕頂，詠懷不愛佞公侯。

右六左二十

楊錦秀

浣溪拜謁仰高風，詩聖篇章氣似虹。夔府悲秋吟八首，曲江對酒歎無窮。  
河山兵火飄零淚，治亂興衰感慨衷。天地沙鷗飛萬里，忠貞愛國世尊崇。

左八右廿六

王 前

會啟鵲城契鷺鷗，緬懷詩聖歲時悠。揚風挖雅無其右，鑑古觀今少與儔。  
曠世才名山嶽動，驚天史筆鬼神愁。老來律細真堪仰，匡正興衰總不休。

右八左卅一

洪淑珍

奉儒入仕志難酬，文采曾經動冕旒。愛國忠君情懇切，傷時感事句傳留。  
草堂安處欣愁解，秋興吟來引淚流。格律精嚴詩載史，大成為聖譽千秋。

左九右十五

郭三河

憂國傷時思緒深，直言疏救嘆浮沉。詩能稱聖生何愧，志抱忠君死不禁。  
白帝哀吟秋興發，草堂窮處歲寒侵。可憐離亂遭安史，苦旅欣逢嚴武心。

右九左卅二

陳麗華

忠賢歌哭為黔黎，觸我長懷子美詩。國輔十年心有道，文雄一世筆無私。  
展才失意空銷骨，事主承恩不遇時。吟動江關天亦泣，真堪萬古姓名垂。

左十右十

徐世澤

杜陵戰亂一貧翁，絕妙鴻裁句益工。善律連篇稱獨步，長奔入蜀見沉雄。  
騷人氣節匡時策，文士聲華警世鐘。萬古宏才垂教化，永懷詩聖蔚成風。

右十一左十三

康濟時

誕若開元日展新，亂經天寶筆如神。百花潭畔人安在，萬里橋邊堂尚珍。  
拓意拓型尤拓境，憂時憂國更憂民。地天難隔懷詩聖，蓬島猶霑風雅津。

左十二右十八

陳麗卿

遙思子美不躋攀，古道依循繼孔顏。蒿目民生批政亂，繫懷君國拯時艱。  
詞精律細心聲斥，學瞻才奇姓氏頒。沉鬱雄渾工詠史，贏來詩聖燦人寰。

右十二左十九

鄧強

緬憶儒家有作為，杜公才調卓風旗。王維匹敵揚騷雅，李白齊驅讚禮儀。  
筆抒華章心化眾，題留俊語志匡時。一千三百齡冥誕，詩聖胸懷萬世師。

右十三

周福南

河山藻繪奪天工，亂世飄零骨氣雄。夔府哀吟秋興發，草堂沉鬱暮歸空。  
拾遺薄宦仁民淚，騷客清詞勁節風。詩史長留千載仰，少陵野老一孤忠。

左十四右十六

林松喬

曠代奇才史頌揚，一千三百歲週長。忠貞憂國何其壯，傲骨高風不可當。  
沉鬱悲吟秋興句，抒懷哀詠曲江章。名齊李白稱詩聖，藻彩騷壇萬世昌。

右十四左廿六

吳東晟

澄清志與聖賢鄰，三代可期風俗醇。忍見胡兵馳禹土，時逢漢厄望堯臣。  
還鄉相喚青春伴，停酒誰憐老病身？白首惟餘詩筆健，江山搖落句驚神。

左十五右卅一

邱進丁

兵荒馬亂餓妻兒，杜甫生平我亦悲。獻賦謀官猶不遇，懷才避禍歷流離。  
丹青易寫乘黃貌，古柏難伸造化枝。史筆篇呈當代事，騷壇莫愧此良師。

左十六右十七

陳淑芬

杜陵稱聖大詩雄，千載無人越此公。孽海悲吟憂社稷，劫波史冊撼蒼穹。  
草堂遺韻文瀾壯，世路多歧藻思豐。天地沙鷗飛更遠，江流自在夕陽紅。

左十七

吳秀真

憂國憂民工部郎，半生潦倒志難彰。棲身亂世悲情慟，述史佳詩後代揚。  
躑躅陶潛遺別意，才同李白譽詞鄉。騷壇稱聖千年歷，今古贏來一瓣香。

左十八右三十

杜美華

一千三百紀詩宗，憂國憂民奕代崇。憾別家山安史亂，潛居巴蜀草堂融。  
悲秋萬里情幽絕，麗句一生才靡窮。天下興亡公不怠，永懷聖哲仰高風。

右二十左廿五

洪龍溪

杜公冥誕孰能忘，紀念千三齊舉觴。啟化蒼生扶社稷，重興禮樂護家鄉。  
文才武略乾坤壯，詩聖儒宗日月長。不朽英名垂竹帛，緬懷勳業史留芳。

左廿一

賴添雲

生逢亂世兵車行，三別佳人三吏烹。句句情文神鬼泣，篇篇賦詠海河驚。  
心懷李白憐才傲，字諫玄宗憂國傾。漢魄詩魂留萬冊，傳吟千載撼天城。

右廿一

洪玉璋

白也齊名列聖仙，古今贏得頌聲賢。官依嚴武承推荐，職為房瑄被斥連。  
愛國詩題嘔心句，憂民筆寫斷腸篇。西南漂泊悲何似，讀爾文章憶爾憐。

左廿二

黃祖蔭

耳順猶差享聖名，詩流百代孰能爭。官微似豆稱工部，韻響如鐘可撼城。  
痛國危疑曾幾死，憂民疾苦共聊生。天涯橐筆誅三吏，不諱錐心念五行。

右廿二

李珮玉

佳人愛詠少年時，歲長方明杜甫詩。抒志言情憂國破，託文記史發人思。  
從來律句稱工整，最是天才世特奇。今日舉觴懷子美，策鞭奮起聖名追。

左廿三

林玉枝

一千三百享聲譽，句動山河富五車。宦海傷懷秋興筆，英才孤憤草堂居。  
雄文奇古騷壇仰，詩聖留芳偉蹟儲。詞律超羣嚴格調，蕩胸絕唱使人舒。

右廿五左廿八

張耀仁

泣古驚今子美篇，憂民憂國聖門賢。才高八斗無人敵，詩絕三都萬口傳。  
宿府吟成燈影下，登樓賦就酒杯前。途窮白髮哀貧病，騷客懷思淚灑箋。

左廿七

林禎輝

向來稱聖百千年，佳作高吟潤我田。夜晚深思陵野老，晨時又憶李詩仙。  
書詞絕妙同欣賞，頑劣歡愉欲效賢。由古至今勤學習，留傳萬世久名宣。

右廿七左避

蔣孟樑

草堂徙倚仰高風，一代騷翁萬世崇。詩史宛如真冊史，詞雄自是大英雄。  
家山涕淚千言壯，秋興悲吟八首融。愛國忠貞懷往聖，準繩格律建豐功。

右廿八左卅四

謝鳴鳳

杜詩何以盛名留，正氣凜然誰比侔。毅色時吟宗廟難，蒼顏長賦庶民愁。  
千鈞筆力旋天地，萬古忠心寫國仇。神賜人間真聖哲，固窮砥節不低頭。

左廿九右卅二

王啟文

憶古懷才性本真，除如杜甫有誰人？詩評愛國傳今世，孝悌言情慮遠親。  
爽直行書鞭亂政，憂煩戰事憫災民。終生逐夢悲天苦，坦蕩謳歌不計身。

右廿九

許哲雄

幾落孫山名益馳，何人不識少陵詩。才情殊絕千秋仰，仕路乖違三甲遺。  
累帙稱魁嗟釣渭，雕蟲奪錦學巢箕。古今無盡青衫客，孰得文章萬世垂。

左三十右卅三

駱金榜

千三百歲慶生辰，聖壽無疆歷久親。勤儉戒奢傳美德，憂民愛國顯精神。  
道承孟子千秋澤，學繼儒家萬代珍。工部才高殊貢獻，堪稱命世大詩人。

左卅三

邱天來

詩國巍巍以聖名，陳香夢裡是前生。鎔裁漢魏賡前緒，壯闊波瀾見老成。  
時繫黔黎真性在，筆關忠愛皓天爭。草堂神往心香薦，未廢江河有定評。

右卅四

余美瑛

乾坤騁筆皆青史，詩卷長留繼楚謳。亂世山河孤野老，飄零天地一沙鷗。  
仁心宅厚千秋聖，賦分鋪陳百代猷。拈藻登樓思哲影，詠懷諸將寫今愁。

左卅五

賴欣陽

致君堯舜志無倫，子美清吟接雅神。世亂憐民征役苦，朝安助國俗風淳。  
一生顛沛詩沈鬱，半世支離骨緇磷。天地未迴身竟沒，文留千古動星辰。

右卅五

陳欽財

崢嶸詩聖麒麟閣，瀟灑詞宗虎豹行。脫手清新風雨撼，匠心俊逸珮環噉。  
是非一世江花寄，忠義全身史筆揚。偕念騷壇縈百姓，追懷杜甫煥三唐。

## 冬至組例會

時間：101年12月23日

地點：天祥路吉祥樓餐廳

首唱：勞工保險論見

左 詞宗 許哲雄 先生選  
右 洪玉璋

左元右七

陳麗卿

勞保驚聞破產瀕，難平政府削頻頻。祇今糊口官何富，而後養家工獨貧。  
股市亂投餘幻夢，金融慎理指迷津。奚須特厚軍公教，占盡台灣第一春。

右元

李宗波

百業蕭條視等閒，年金制度幾時刪。勞工有感停薪職，立院無能似石頑。  
弊政誤民心憤怒，庸才亂世淚頻潸。終身保險須防老，改革財經挽國艱。

左眼

陳漢津

為護尊嚴保半生，險金勞退迫更程。如遺政策寬齡給，怎解財經永歲衡。  
得法萬均穿燕舞，失能三兩阻風行。柘落眠花終老影，陋房樑柱嘆空橫。

右眼左十八

林松喬

勞工疾苦禍相侵，執政無能怯費心。經濟蕭條緣底事，基金虧損究何深。  
輿情但願層峰聽，民意休教大海沉。保險崩盤滋亂象，得謀良策萬方欽。

左花右避

洪玉璋

勞工保險陷危機，久矣無從得解圍。爭議軍公都不是，協談朝野已全非。  
休關窮族庶民瘦，只任富商官吏肥。寄語由先開國會，集思廣益固邦畿。

右花左二三

蔣孟樑

勞工職業最艱辛，政府應該護庶民。時局蕭條長嘆息，基金虧損溯原因。  
高層宜聽專家議，學界同研福利均。保險豈容呈亂象，謹謀良策共維新。

左四

孫秀珠

為保身家老病傷，勞資點滴積營倉。憂無善計方施政，恐有悲風欲噬糧。  
碩鼠恣行均可捕，三春勤墾尚賡揚。存菁闢建蓬萊島，經濟人文閒適鄉。

右四左七

陳麗華

苦力勞心何所求？但祈至死百無憂。半生寄望驚相負，終老安閒愴已休。  
政策未全官塞責，方針不定禍臨頭。為民保障誠非易，國乏英才乏智謀。

左五右六

葉金全

勞工繳納退休金，巨款挪營損失深。股市千坑空挹注，商場百億盡銷沉。  
保期保費連升漲，儲本儲錢漸蝕侵。期盼公平能養老，基層生活始安心。

右五左十三

張耀仁

弱勢勞工怨幾庚，無能政府硬偏傾。安貧愛命難安業，保險交錢不保生。  
亂紀高官貪暴利，遵規百姓誤前程。邦危奮起追公義，功奏欣看樂太平。

左六右九

許又勻

台灣經濟倚工商，保險年金猛削傷。學運連連何日泯，勞爭屢屢幾時央。  
誠開國是籌良策，敦請人才獻妙方。莫使悽惶危社稷，蒸民福利速規章。

左八右二九

游振鏗

大局笑隨農變工，勞方合力建奇功。昔年經濟龍飛起，今日民安國富豐。  
保險審時修法則，安邦樂業感心衷。酬金養老誠良策，管理投資慎秉公。

右八左二二

楊錦秀

原思報國享瓊芝，怎奈勞工晚歲悲。經濟蕭條無對策，基金耗損有偏司。  
輿情直諫祈天聽，世局丕更挽勢危。保險豈能當賭注，開源節約奠邦基。

左九右二五

陳保琳

未雨綢繆合本衷，餘生得靠護勞工。危機意識人該具，保險精神眾所崇。  
主政能廉興盛世，基層勤奮少哀鴻。資源共享持平酌，福澤全民造化功。

左十右十五

施得勝

丘蟻儲糧思養老，力微形小志相同。方欣垂暮咸延壽，可歎新青少哺童。  
坐食見空倉乏入，圖謀充實策難通。忍吞賣命辛酸淚，還向墳頭操舊工。

右十左二七

杜美華

普天之下莫非民，農教工商本共親。半世劬勞圖逸老，一心德政振仁倫。  
廟堂切究基金事，業界深研保險均。順應輿情安社稷，祈迎朝野萬家勻。

左十一右十二

徐世澤

勞工辛苦基金足，退職還鄉靠俸錢。委會投資須慎重，人頭炒股不容偏。  
官方創意賢才出，立院成規道統傳。保險誠心歸至善，合情合理感蒼天。

右十一左三十

邱天來

滋蔓難圖未可輕，勞工勞保亂蓬瀛。基金怎得投機用，積弊何無改革情。  
新制通盤宜共識，報酬替代秉公平。要當後盾中樞策，破產流言弭謗聲。

左十二右二十

黃廖碧華

勞工保險世稱珍，年邁還能領薄薪。百姓何須求富貴，三餐可得享清貧。  
職災生育皆償補，疾病傷亡准請申。籌劃基金增利益，含飴渡日笑頻頻。

右十三左二一

李玲玲

社稷繁榮眾所期，勞工歷險壯青時。日愁年邁力難繼，長保久安財可持。  
但繳微金好終老，忽聞延退不勝悲。分明無義人心失，有識明君豈妄為。

左十四右二一

林禎輝

勞工保險本和平，事事安然亂不生。國會無能難策定，眾言有意起紛爭。  
邦家改革應求妥，上下支持好奉行。齊為全民除痛苦，盡人感謝讚揚聲。

右十四

黃祖蔭

反共毋傷馬克思，勞工意識賴葳蕤。安全制度新文化，契約公平眾志為。  
道在人弘須政舉，云何主義合時宜。祥和社會皆翹首，笨伯原來執袴兒。

左十五右二八

洪世謀

驚聞破產庶民憂，政府無能老境愁。全國工商皆困苦，滿朝文武卻閒遊。  
維新立法貪官滅，吸引投資企業留。九百萬人崗位駐，年金不復望西酬。

左十六

陳欽財

勞工汗績黔黎仰，保險馨心寶島望。圓缺陰晴皆有數，老生病死總無常。  
公平事事人人樂，正義時時處處祥。振國安全廣百世，興家利益締三陽。

右十六左二八

余美瑛

公義口中常掛帥，年金罄澀策虛懸。王侯竊國皆翻手，鼎鼐箴言盡舊篇。  
變革當朝安老病，波瀾舉世怎餐眠。千秋定位知何仰，仕宦低頭學聖賢。

左十七右二三

余雪敏

勞工辛苦護家庭，儉蓄年金盼晚馨。經濟蕭條猶守責，基金虧損太離經。  
低層民眾悲延退，高位貪官樂永齡。朝野同心思對策，但祈社稷共安寧。

右十七左二十

姚啟甲

勞工保險本良謀，照顧終身眾遠愁。濟事安心無恐懼，退休持俸自清幽。  
透支國庫基金缺，搶救危機制度修。變法澤民端此舉，瀛台美景創新猷。

右十八

郭三河

基金破產引旋風，黯淡勞工怒氣沖。事致恐慌驚未定，人來擠領恨無窮。  
國家修法迷初醒，保險前途論可攻。朝野同心謀對策，退休養老歲常豐。

左十九

洪淑珍

勞保施行立意良，審時修法合應當。基金管理謀長利，弱勢關懷添一章。  
必設專司嚴督察，莫令貪吏逞猖狂。提高替代率為要，養老無憂民所望。

右十九

張民選

基金虧損令心驚，舉國勞工憤抗爭。老本渺茫憂晚景，當朝冷淡獻虛情。  
階層比較風波起，辛苦憑依怨氣生。民主自由標榜地，豈能制度不公平。

右二二左避

許哲雄

百工勞碌險途臨，辟禍有門傳德音。養老嘉猷隆晚節，浮生儉物蓄年金。  
安榮共享私情誠，厄難分攤眾力任。願諫司曹知抱恥，興財保本護蒼黔。

左二四右二七

陳碧霞

媒體喧囂論不休，危機遽現急籌謀。操盤私利基金損，選票惟思財政憂。  
撥補虧空除畏悚，評量保額破疑愁。族群怨懟增興嘆，何日勞工夙願酬。

右二四左三二

黃天賜

破產基金列眼前，人潮擠領有誰憐。勞工苦苦心傷盡，政客糟糟策敗連。  
急待當權新法擬，勤謀善計解民懸。時艱共體難關渡，保險餘生樂晚年。

左二五右二六

吳秀真

工作艱辛鮮怨聲，仰其勞保老安行。資金管理籌謀劣，政府投儲監督盲。  
放任奸捐擒暴利，犧牲黎庶啜藜羹。今祈企業相援助，總統敦商必可成。

左二六右三一

邱進丁

景氣低迷已屬尤，基金失血萬人憂。長期不稅軍公教，鎮日難防盜賊偷。  
國庫虧空誰監察，勞工苛賦虐耕牛。徒增保費公平缺，正本清源上上謀。

左二九右三十

尤錫輝

勞工保險惠餘年，美意一椿疑失偏。暴說基金難負荷，傳言費率欠周全。  
官家律制須遵守，百姓怨嗟何處宣。朝野同心謀對策，綢繆儘在雨風前。

左三一

鄞 強

日夜辛勤正氣存，勞工團體雨風奔。有心金諾前緣契，如願石交夙義敦。  
百里相期盟友弟，千秋共策護兒孫。家庭國事同推展，力挽狂瀾楚客魂。

右三二

周福南

基金匱乏眾憂危，經濟蕭條市井悲。佞吏虧空無法紀，勞工權益應扶持。  
醫療生育黔黎寄，傷病安災政府支。朝野共謀更預算，民心確保護邦畿。

次唱：臘月抒懷

左 詞宗 黃祖蔭 先生選  
右 蔣孟樑

左元右四

林正三

迎寒百卉歷凋傷，唯臘山梅格尚昂。際此殘冬休喪志，須臾放眼盡春陽。

右元左六

洪世謀

梅訊遲遲臘鼓颺，入眸寒景總心傷。公權委地憑誰挽，書就窮文感慨長。

左二右二四

王尚義

年華似水感滄桑，苦嘆浮生盡歷霜。往事那堪回首憶，生憎寒雨滴愁腸。

右眼左十二

洪玉璋

舊新年逼滯他鄉，旅況肅然老更傷。不忍少陵詩又讀，憂家憂國肯能忘。

左三右二六

姚啟甲

不畏寒風臘月藏，惜餘拾卷享書香。白頭催老童真返，共待青陽雅韻揚。

右花

翁正雄

臘月聯吟瀛社昌，緬懷先輩立綱常。溫柔敦厚崇詩教，鷗鷺賢來共舉觴。

左四右二十

杜美華

浮生匆過一年將，臘月詩家藻思昂。末日預言徒戲謔，欣迎新歲作新章。

左五右十八

賴欣陽

暮靄重重細雨長，又逢冬至客愁傷。雲天目盡霜風緊，且守梅枝待暖陽。

右五左十六

張耀仁

湯丸臘味拜高堂，卒歲思親憶故鄉。暢飲三杯詩興發，殘生只盼壽而康。

右六左避

黃祖蔭

末日安然未有殃，寒流接續又當場。誰憐近日多街友，自顧無暇豈解囊。

左七右三一

徐世澤

末日未臨喜氣揚，寒流來襲逛商場。薪津凍結心情悶，物價高抬難解囊。

右七左二七

林松喬

臘鼓頻催感慨長，寒流凜冽撼臺疆。凝眸處處山容瘦，但看回春國運昌。

左八右十九

劉清河

冬至誰云世界亡，霜欺冷雨苦難當。集團詐騙成風尚，那個人心不設防。

右八左三二

楊錦秀

頻催臘鼓景蒼涼，朝野紛紛亦可傷。世運循環終不竭，前途有待起賢良。

左九右十一

陳麗卿

途窮年暮政蝸蟻，經濟艱難暗自傷。企盼元戎昏睡醒，速謀國計向康莊。

右九左二一

許又勻

天寒地肅綻梅香，一線清芬引憶長。歲杪思兒千萬里，何時團聚共稱觴。

左十右二七

余美瑛

壬辰滯雨並嚴霜，轉眄湯團又泛香。朝野集思安國鼎，蟄龍騰起業齊昌。

右十左二九

邱進丁

高山白雪勵冰霜，策杖騷人氣獨昂。筆競瀛臺呈萬象，天心點化大文章。

左十一右三四

許哲雄

鼓報歲道詩債惶，左鄰炊粥我搜腸。天心豈識文心苦，不任梅邊一筆香。

右十二左三三

黃天賜

陰雨連朝始見陽，臘梅初綻逞黃芳。繁花爛熳迎風笑，惹得遊人滿袖香。

左十三右二三

孫秀珠

龍年飛逝歲寒傷，馬齒徒增志未揚。惟願詩書伴吾醉，人生自是有芬芳。

右十三左十八

余雪敏

霏霏久雨歎時長，勞苦民間生計忙。末日預言徒困擾，今朝新紀迓冬陽。

左十四右三二

邱天來

時當臘月興何長，吟會頻頻嘔肺腸。的是北臺鷗鷺侶，可教人認是詩狂。

右十四左三十

蕭煥彩

歲寒喜見臘梅香，感歎財經景氣涼。鷗鷺詩吟當濟世，更祈國泰永隆昌。

左十五右避

蔣孟樛

臘鼓頻催覺夜長，老梅綻放傲嚴霜。惟祈歲暮迎新歲，寶島人民廣運昌。

右十五左二四

洪淑珍

皚皚臘鼓促梅香，庸碌頻年兩鬢霜。科稅聞增生計拙，慨歎官吏鐵心腸。

右十六

葉金全

歲逢殘臘候春陽，仰望東風煦我鄉。汲汲營生多困苦，儉勤度日愈堅強。

左十七

鄧強

雅契群賢頌壽康，吉祥樓主日呈祥。探花梅共知春近，緬懷親朋賦錦章。

右十七左二二

游振鏗

臘鼓頻催鬢已霜，困難經濟物資揚。滿增街友如何是，渴盼元戎計議長。

左十九右二二

李宗波

催花逼歲遍梅場，除夕將臨感慨長。褒貶龍翻三尺浪，淵淵聲裡待東方。

左二十右三五

王 前

序入寒冬寄意長，一窗雪白暗飄香。親朋別去緣如盡，獨捲思潮付酒觴。

右二一左二五

周福南

臘鼓催寒夜色長，尋梅煮茗啟吟觴。新詞一卷祈家國，筆健迎春道益彰。

左二三右三十

黃廖碧華

欣逢臘月意悠長，邀約良朋逛畫廊。百幅丹青任君賞，心胸一暢兩眉揚。

右二五左二八

郭三河

連天陰雨見朝陽，裙屐舒心興自長。山氣衝寒香暗送，臘梅繁放百花香。

左二六右二八

張民選

殘冬冷濕懶洋洋，每日蹉跎酒興長。詩思渺茫難下筆，一年詩課枉徜徉。

右二九

賴添雲

搔首回看歲未遑，營生鬧市困身疆。天河大漠雄青志，應只黃梁夢一場。

左三一

吳秀真

臘月時寒心亦霜，薪資物價等無方。低迷景氣何能振，朝野齊謀盼策匡。

右三三左三四

陳保琳

臘鼓乍聞神慟傷，心憂國祚倍徬徨。主權經濟衰微甚，何日台灣頭可昂。

左三五

施得勝

十年瀟灑少年郎，忽悟原來身滿瘡。何時經霜爭破臘，凡情搖落自飄香。

## 癸巳（102）

### 第三屆第一次會員大會

時間：102年3月24日

地點：天祥路吉祥樓餐廳

收稿：50件            參加人數：61人

### 首唱：題詠雙北市景點【題目自訂】

左    詞宗   翁正雄   先生選  
右           黃鶴仁

#### 訪土城承天禪寺（左元右元）

甄寶玉

寶剎承天翠色含，白牆綠瓦擁晴嵐。虔心禮佛深深拜，俯首朝山步步參。  
有道有緣曾造訪，無來無去幾研探。每年五月桐花燦，如雪紛飛入此庵。

#### 石碇老街巡禮（左眼右十五）

許哲雄

拳山堡史細心看，古道穿庄貫淡蘭。萬壽橋存茶市杳，雙溪水憶染坊殘。  
採煤遺跡堪羅雀，弔腳懸樓暫住鞍。依舊長廊天不見，已無紅粉倚欄干。

#### 戀戀雙北市（右眼左十三）

陳麗卿

遊跡特來雙北城，穠春到處景紛呈。淡江濤韻時盈耳，草嶺花光不轉睛。  
心戀七星山月朗，神迷八里晚霞赭。如斯風物如斯境，邀侶復排三日程。

#### 明志書院（左花右三二）

邱進丁

泰山義塾北臺先，從此讀書休外遷。朱子致知詩禮繼，胡生興學宅田捐。  
文風丕振能窮理，典範長存重啟賢。憑弔繁華雖不復，當時志士道心堅。

淡江晚眺（右花左十四）

游振鏗

繽紛霞彩半浮空，眺遠人來逸興雄。淡水河清光激灑，觀音山秀景矇矓。  
幾聲短笛催歸鳥，十里長堤送晚風。慣惜潮生潮又落，榮衰物景是天工。

春遊南山福德宮（左四右七）

洪玉璋

好趁花朝霽色開，客如蜂擁逐香來。烘爐地熱藏靈氣，福德宮幽淨俗埃。  
娛目數歸雲外鶴，賞心旋望嶺頭梅。余欣七一生辰度，直把南山作壽杯。

詠汐止大尖山風景（右四左八）

余雪敏

青山綠水任登臨，四季皆宜耐客尋。春賞緋櫻橫翠嶺，夏觀飛瀑濺青林。  
秋楓紅艷斜陽外，冬霧迷濛曉色深。最是清幽天道院，煮茶食素樂行吟。

蘆洲李氏古厝（左五右二十）

張民選

花牆朱瓦歷春秋，深院重門勢尚浮。四馬拖車廳室壯，七星下地座形優。  
人文探討功無息，教化傳承價莫酬。古蹟輸捐民感頌，千編故事引高遊。

中和烘爐地福德宮（右五左二三）

洪世謀

廟中有廟自康熙，福德神恩四境披。殿立南山宏氣象，門迎北斗仰威儀。  
嵐光極炫春岑麗，鳥語平添景色怡。接踵人來朝聖地，求財訪勝乞籤詩。

二重疏洪道跳蚤市場（左六右三七）

葉金全

疏洪道上眾聲歡，早市人潮跳蚤攤。百貨推銷隨客選，四方緩步細心看。  
常來購得前郵票，幾次搜回古算盤。舊物重修猶可用，庶民儉樸喜參觀。

探金字碑古道（右六左九）

洪淑珍

曳杖穿雲古道遊，綠陰粘袖思悠悠。林中斷續幽禽囀，鞍部登望遐景收。  
削壁為碑雄氣概，題詩刻篆好風流。總兵武略文才備，韻事長教後代謳。

註：古道位於新北市瑞芳區三貂嶺內，為清台灣鎮總兵劉明燈於1867年冬巡視宜蘭所題並命人磨峭壁為碑，以篆文鐫刻詩其上。碑文，高約240公分，寬143公分。邊框以蓮花條紋雕飾，碑額以雙龍托珠圖案襯托。據說碑文與碑龕皆以金箔黏貼，於是人稱為「金字碑」。古道最高處鞍部有「探幽亭」，1985年公告為國家三級古蹟。

佛山尋春（左七右八）

許又勻

尋春踏翠佛山行，勝地林泉照眼明。東苑蝶嬌親馥蕊，南塘柳韉映紅櫻。  
僧樓避世炎涼泯，石徑潛蹤煩慮清。兀坐寧心聆萬籟，欣欣大塊展風情。

註：佛山位居新北市三峽區有木里，境內的重山峻嶺之巔。

仙跡岩（右九左二五）

張錦雲

洞賓印石跡留鞋，傳說降妖岩趣佳。長壽梯登仙祖廟，逍遙亭下景華街。  
花繁樹翠多芬撲，鵲舞鷹梭萬籟諧。古蹟級三銘引思，鵲城遠眺境無涯。

北海岸采風（左十右二五）

張耀仁

滔滔白浪舞春風，北望無涯海接東。列隊漁舟忙出港，成行雁陣忽穿空。  
金山媽祖香煙盛，野柳仙鞋歲月窮。鷺侶驅車遊勝地，遙看映岸夕陽紅。

台北市府沈葆楨廳（右十左三三）

駱金榜

市府中廳沈葆楨，經文緯武治台澎。撫番闢地人爭頌，築壘屯兵氣自橫。  
億載金城防禦備，萬流砥柱守攻成。千秋詞賦懷文肅，一代賢臣百世名。

謁三峽祖師廟（左十一右十一） 蔣孟樛

安溪神蹟衍蓬萊，清水靈巖亦壯哉。顯赫祖師昭四海，信誠檀越遍三臺。  
刻雕藝術精工妙，廟殿崔巍氣象恢。寶地經營憶梅樹，豐功懋績仰雄才。

春晴遊天元宮（左十二右二八） 林松喬

駘蕩和風逸興長，馳車攬勝北新莊。天元宮宇遊人樂，吉野櫻花引蝶忙。  
莫笑牧之貪景色，更懷陶侃惜韶光。悠然展步尋詩句，拾得春芳入錦囊。

憶士林官邸（右十二左二九） 洪龍溪

士林官邸憶從前，總統蔣公居住權。警衛森嚴圍四面，兵維秘密護多邊。  
昔時景色人難覽，今日風光客遍傳。民主潮流添勝地，交通發達萃群賢。

淡江大學淡水校區（右十三） 陳欽財

大屯嶺下新潮創，五虎崗邊學苑成。玉立宮燈昭燦爛，雄亭彩閣佈崢嶸。  
山光旖旎文商探，水色繽紛法理耕。共仰絃歌扶社稷，同瞻科技護長城。

晨搭捷運過大湖公園（右十四左三八） 王尚義

捷車代步幾經年，最戀環馳湖岸邊。朝旭浮峰呈瑞彩，霜禽掠水起寒煙。  
棲山人吸氤氳氣，出岫雲移浩蕩天。觸目風光渾似畫，閒情領略媿神仙。

觀植物園欽差行臺遺物感懷（左十五） 楊志堅

巡撫銘傳建我疆，割臺事愧李鴻章。景崧偃鼓狐偏樂，資紀興師馬正忙。  
國共談和存懦弱，民親論戰欠堅強。風中一再任飄絮，孰忍唏噓不感傷？  
註：植物園「布政使司」已考證為「欽差行臺」遺物。

木柵動物園（左十六右十六）

黃廖碧華

動物園中一日遊，家人相伴共尋幽。花間百鳥啼無歇，樹上群猿嘯不休。  
可愛熊貓消俗慮，天真松鼠解塵憂。靜觀禽獸余心樂，忽覺年輕二十秋。

觀北投海芋（左十七右三八）

陳茶花

北投錦繡古今傳，植物欣榮景色妍。乾地山櫻枝似鐵，濕區海芋蕊如蓮。  
根尖有毒人人懼，葉大多紋處處懸。秋夏花開仙境媲，賓來一賞盡留連。

台北花卉中心賞茶花（右十七左三五） 陳麗華

聽說茶花爛熳開，驅車我亦踏春來。妍姿異種人稀見，豔色何因雨正摧。  
意愜林中多燕雀，人幽物外少塵埃。尋芳莫到香消盡，倏忽韶華去不回。

淡水風情（左十八右二九）

徐世澤

淡新捷運疾如風，城屬紅毛一世雄。碧水輕飛翻海上，青山秀挺聳雲中。  
老街店舖遊人眾，大廈園林住戶空。極目遙天何所見，漁舟暮靄混朦朧。

湖原關渡（右十八）

賴添雲

百頃荒原雁築窩，沙洲浪退蟹招螺。舟浮淡水河清麗，霧擁觀音嶺峻峨。  
迤邐岸堤閒鳥盛，天然沼沛育靈多。千姿盡展昌生態，物我神怡奏籟歌。

九份暮色（左十九右三六）

杜美華

歸舟向晚載波間，九份華燈初爛斑。隱隱青煙輕欲邈，幽幽素月淡如閒。  
莫論小鎮悲情事，但見笙歌歡樂顏。戲夢人生終有盡，流金歲月幻千般。

故宮博物院（右十九左三四）

吳秀真

緬古觀今在故宮，漢邦文物世推崇。陶瓷字畫奇珍見，鐘鼎衣冠史跡充。  
客至流連生意趣，吾於觀賞觸吟衷。千秋韻事千秋夢，盡入詩人橐笥中。

南雅奇石（左二十）

陳淑芬

海潮萬頃捲雲天，造物珍奇說也玄。石狀螺鈿紋理現，沙平島嶼日輪圓。  
還同飛鳥輕銜水，但恐銀花激暮年。縱便閒居心懶散，長歌擊節立翛然。

復興岡櫻花隧道（左二一右二六）

王 前

北台好景復興岡，嶺路蜿蜒換豔粧。桃蕊春山爭爛漫，櫻花隧道發芬芳。  
林巒迥翠飛雲靜，禪寺題詩寶篆香。賞玩如潮人接踵，客來句剪滿奚囊。

詠觀音山（右二一左三六）

陳保琳

八里坌山芳景妍，詩情畫意客流連。觀音吐霧漫雲嶺，滬尾斜陽燦海天。  
疊嶂風光多變化，空靈寶氣永留傳。優遊古剎迎神祚，去厄消災福運綿。

相約梅庭、愛戀久久（左二二）

陳碧霞

梅庭重啟見芳叢，戀侶網聯打卡瘋。木造閣樓留韻事，石堆城堞訝神工。  
俯瞰溪澗潺湲緩，遠眺群山滃鬱朦。草聖墨遺除俗慮，溫馨靜謐念于翁。  
註：北投梅庭日式宅院，曾是于右任院長舊居，今年情人節重新開放。

馬偕醫院（右二二）

鄧 強

世讚馬偕醫理通，治痊病患感銘衷。日皇神社圓山側，民主人心聖殿崇。  
上帝垂慈天界護，凡間修善地方隆。雙連教會巍峨聳，百載榮光氣概雄。

新北市首都展望（右二三左三二） 李宗波

新北首都譽板橋，別開生面見今朝。工商拓展交通暢，經濟繁榮景物饒。  
薈萃人文歌郅治，興隆市井趁時潮。輝煌建設頻翹望，錦綉前程達九霄。

陽明山夢幻湖（左二四右二七） 蔡業成

霧鎖雲封夢幻湖，風光恍似輞川圖。碧波激豔長無敵，綠岫峻嶒永不孤。  
水韭浮沉迎玉兔，鴨池清淺浴金烏。深山獨處忘年月，只有青峰伴小姑。

台北故宮（右二四左三七） 尤錫輝

玲瓏文物耀雙瞳，彷彿入時光隧道中。書畫典藏無與比，鼎盜珍聚世推崇。  
先民筆路耕華廈，彥聖用心興故宮。遊客慕名途不絕，觀瞻寶殿奪天工。

坪林一日遊（左二六右三一） 楊錦秀

勝景坪林一日遊，山川毓秀氣清幽。魚蝦保育盈溪谷，鷗鷺飛翔享自由。  
品茗虛亭飄馥郁，題詩妙句覺溫柔。水源寶地如仙境，亦擬移居作隱謀。

總統府（左二七右三四） 歐陽開代

頂立鵑城鎮國魁，松山東望稻江隈。昔時郊外希人影，今日市中盈傑才。  
櫻片盡凋秋露冷，桐花却放島雲開。中原爭帝千年盪，民選至尊惟一台。

川端橋畔（左二八） 黃祖蔭

川端橋畔夏陽垂，錯落茶棚噪昔時。若聚新亭哀豕客，然聞里曲謝歌姬。  
江風拂醒騷人夢，月色鈎魂樹影姿。我亦曾來陪品茗，而今老矣景難追。

註1：川端橋位于詔安街頭。

註2：歌姬指紫薇 1930~1989曾在南京夫子廟歌廳駐唱。

台北市南機場夜市（左三十）

李佩玉

中華路側夜長歡，公寓成排萬首攢。昔是操兵騎馬所，今為煮食品銷攤。  
山東水餃人龍候，彰化肉圓滋味漫。最喜眷村翻建宅，南機場有景新觀。

花時過士林官邸（右三十）

邱天來

一局風雲視九州，福山依舊枕山頭。園探香草芳菲耿，碑認蘭亭歲序悠。  
官邸幸民分賞趣，士林有老得閒遊。襲人花氣真堪戀，花海盈盈作小留。

紹興社區（左三一右三五）

吳東晟

陋巷低簷舊里閭，飄萍泛梗久安居。址臨學府因書富，家在城區據法虛。  
圈地都更寧太過，經年教改復何如。老終幼長非奢願，佇盼清流保世譽。

遊饒河街觀光夜市（右三三）

孫秀珠

慈祐宮前夜未央，星燈霓彩比肩揚。衣旗換掛千花樣，爐火炮烹十里香。  
鼎沸街頭聞下馬，羹餘桌面走飛殤。琳琅百貨留人處，國際名馳錫口莊。

次唱：早春

左 詞宗 劉清河 先生選  
右 康濟時

左元右二五

楊錦秀

氣暖風和嫩綠茵，小園初日鳥聲新。東皇到處施恩澤，大塊文章早繪春。

右元左二九

吳秀真

何須凜烈怨寒辰，訝見殘枝一朵新。寂野綠披渾不覺，芳妝早綴振精神。

左眼右十三

洪淑珍

青陽返駕啟洪鈞，煖氣潛舒鶯韻新。一片生機翻景象，時和可兆福全民。

右眼左十七

邱進丁

人間尚未迓春神，嶺上枝頭一蕊新。自是梅花先百卉，霜風傲骨有芳辰。

左花右十六

陳麗卿

臘後人來淡海濱，迎眸光景一番新。桃腮乍破鶯初出，淑氣潛回萬物春。

右花

歐陽開代

癸巳異常來早春，幾鶯高處頌氤氳。危機核電群民怨，何日風平雪化塵。

左四右三五

游振鏗

暖回大地物華新，柳眼舒青草色勻。桃杏破腮鶯語嫩，尋芳老我長精神。

右臚左三十

洪世謀

癸巳迎門景象新，先回淑氣百花親。山青江碧三陽布，最是桃紅早會春。

左五右二三

張錦雲

梅開綺景歲時新，鳥語花嬌契雅人。曠野尋詩韶境麗，騷朋和唱樂相親。

右翰左十五

邱天來

粘天芳草一翻新，吉語爭題有雅人。解凍好春先到眼，呵成七字筆傳神。

左六右十九

蔣孟樑

金蛇值歲早迎春，滿眼山櫻醉野人。氣暖風和開盛景，題詩花下正精神。

右六左二三

陳麗華

但看物色逐時新，淑氣先回遍九垓。逗暖鶯聲潛報柳，且攜吟筆訪初春。

左七右二一

楊志堅

換歲乾坤冷未泯，青苔留雪臥牆身。誰家玉笛吟心怨，看見鵝黃上柳新。

右七左十二

杜美華

啼鳥緋花報早春，和風暖雨醉行人。一年之計宜先立，青帝懷中振氣神。

左八右二十

許又勻

郊原萬象一番新，綠草萌芽錦似茵。踏翠尋春遊紫陌，芬芳淑氣豁心神。

右八左十六

林瑞祥

冬眠萬物不知辰，料峭東風四狩巡。塘外輕雷初響處，夢中驚起一枝新。

左九右二八

周福南

東皇造化轉鴻鈞，曠野花香點綴新。蝶戲鶯啼催淑氣，大千藻繪慶芳辰。

右九左十一

黃廖碧華

梅花競放迓新春，飄逸清香不染塵。點綴庭園獨稱秀，焉知羨煞幾多人。

左十右十七

張民選

東風回暖逐時新，柳眼先開報入春。嬌燕初歸鶯急出，韶光雖淺亦迷人。

右十左二五

陳淑芬

陽回歲去氣輪囷，斜路幽花漫野濱。翦翦餘寒清意味，枝頭抽換鳥聲新。

右十一

許哲雄

雪檐初化綠迷津，鴨暖先知逐藻鱗。雖見鶯遷猶料峭，一痕桃浪正逢春。

右十二左二一

林政輝

東園乳鴨識新春，後院山櫻已出塵。懶慢村人猶未覺，袒胸美女最精神。

左十三右十八

李晨姿

東風解凍草如茵，十里長堤入眼新。蝶舞鶯飛生氣滿，騷壇鬪句有精神。

左十四

賴添雲

青帝宣回萬物新，迎眸花發鳥聲親。探芳我入煙光麗，勝景收來樂老身。

右十四

陳欽財

碎紅嫩綠一番新，冰解風和墨客珍。節近三三寒減半，鴨知鶯覺迓萌春。

右十五左二八

施得勝

和日無溫不欲伸，棉衣依舊困吾身。寒梅早嫁東風去，偷折一枝留探春。

左十八右二六

王 前

嶺梅殘蕊似飛塵，鶯渡疎林叫喚頻。桃李苞含風漸暖，簷前燕子築巢新。

左十九右三三

沈榮槐

雪殘水暖逐芳塵，楊柳風迎物候新。久歷冬眠千萬眾，紛紛喚起見精神。

左二十右三四

駱金榜

韶光旖旎可怡人，鳥語花香鷺侶親。萬象回春涵淑氣，爭妍百卉逐時新。

左二二右二四

甄寶玉

微寒乍暖某清晨，不意推軒淑氣新。忽見梅花開一蕊，方知大地已回春。

右二二

林禎輝

早開處處占先春，滿地花香吸引人。近水依山能漸樂，無如清靜養吾神。

左二四

鄭貴真

山巔水畔景如茵，鵠立時知舊轉新。最愛今朝顏色麗，東君自是有情人。

左二六右三一

鄧 強

梅粧媚景逐時新，品茗題詩樂雅人。綺麗韶光風日好，花香鳥語證芳辰。

左二七

簡龍昇

梅白桃紅草似茵，鴨飛入水迓新春。尋芳把酒斜陽照，唯有吟哦樂最真。

右二七

徐世澤

沿途風景逐時新，群鴨下河水自春。湖畔柳枝垂翠綠，山坡嫩草出沙塵。

右二九左三四

李宗波

東皇造化顯威頻，芳草茸茸一煥新。極望江山風日好，大千藻繪筆傳神。

右三十左三三

黃鶴仁

紅櫻得氣及芳辰，梅蕊含香過上辛。自是天工能點染，承平世界共維新。

左三一

葉金全

萬物欣欣百草新，早梅綻放喜迎春。虔祈社稷平安過，雨澤蓬萊仰眾神。

左三二

孫秀珠

料峭枝頭嫩葉新，繁花落盡又迎春。青山煙景多迷眼，持杖臨風忘世塵。

右三二左三五

李佩玉

乍見櫻紅一蕊陳，方驚冬去柳條新。陰霾不再天回暖，最喜登山好訪春。

劉清河

寒流幾度老難支，始信陽回不算遲。春到人間人未覺，柏油路畔草先知。

## 元春組例會

時間：一〇二年四月二十八日

地點：天祥路吉祥樓餐廳

收稿：四十六件

首唱：春興

左 詞宗 洪玉璋 先生選  
右 陳麗華

左元右二一

陳麗卿

黃鸝哀囀雨煙濛，似訴邇來憂靡窮。禽感疫情方曼衍，朝鮮核武未銷融。  
元君應展經綸手，群吏當懷耿直衷。太息韶光如轉瞬，期開新局壯瀛東。  
左評：專從大意落筆，章法之妙是爲此題絕唱。

右元左花

許欽南

桃李欣欣柳拂牆，小園燦爛鎖春光。壺中有酒常邀月，圃內無花不溢香。  
性淡猶嫌紅杏艷，心閑反笑白雲忙。唐詩普帖晨昏伴，似與先賢聚一堂。  
左評：妙在五六兩句，令人百看不厭。  
右評：轉結皆好，讀來流暢，詩句不特意雕琢卻更讓人覺得一股清流。

左眼右八

洪淑珍

出岫雲華淡抹岑，芳菲織錦柳搖金。歌謳大塊成天物，情寄清流慰素心。  
弊案爭如春筍發，廉名虛抱鳳池沉。蓬萊煙景誰加損，懇請東皇下六箴。  
左評：對時政寄予無限感慨。

右眼左九

張耀仁

島國春回景物妍，江山入畫賦佳篇。興來不厭三杯酒，時易重評一政權。  
此地公平皆失落，何年正義再流傳？貪官惡法勾成串，塗炭生靈淚欲漣。  
右評：一、二句描景、第三句寫興，第四句拋出寫政治，轉得我覺得是如此自然，這是我該學習的地方。

右花左避

洪玉璋

萬千紅紫鬧三春，處處芳叢色正勻。好是江山堪入畫，其如花鳥最娛人。  
閒來便覺詩方趣，老去何辭酒更親。莫使韶光容易過，一觴一詠句傳神。  
右評：用虛字串連讀來活潑，景色與情俱全。

左四

邱天來

流麗溪山引興多，幾將心力讓消磨。扶春紅綠誰同賞，向暮年顏感逝波。  
爭席固知無骨相，沉吟空歎著詩魔。浴沂有趣還堪戀，老不如人自放歌。  
右評：紅綠對年顏，同賞對逝波不工。

右四左六

林松喬

遙山破睡淡雲籠，踏遍郊原錦繡中。澗澗溪光依水碧，嬌嬌花色襯霞紅。  
尋芳遣興心先醉，賞景抒懷意欲融。滿眼繁華留不住，大千藻繪入詩筒。  
右評：起句不錯，句法變換皆佳。

左五右五

王 前

緩步芳郊獨倚筇，青山含笑樹葱蘢。愁隨出岫閒雲去，興逐飛花帶露濃。  
歸燕啣泥欣有主，啼鶯倩影隱無蹤。韶光十里翻新象，載筆人來藻思溶。  
右評：整體景和意都不錯。

右六左二六

洪世謀

大地風和柳絮飛，高樓櫺比矗京畿。江心滉漾群鷗戲，簷下呢喃雙燕依。  
冷暖人情思不解，浮沉世事歎多違。無如領略韶光麗，醉在芳辰幾忘歸。

右評：寫景有自己的思想和情..好。

左七右避

陳麗華

喜得身閒景亦清，恣遊物外有高情。曉林步逐花間蝶，寒谷歌隨樹上鶯。  
拾翠更耽詩與酒，踏青不待雨還晴。儒流興在吟風月，採掇芳春筆墨輕。

右七左十二

甄寶玉

經歷風霜凜冽侵，書齋伏案意幽沉。乍看裊裊含煙柳，又聽關關出谷音。  
逆旅人生何嘆息，晚晴韶景自追尋。鶯花爛漫春無限，一醒冬寒寂寞心。

右評：一醒冬寒寂寞心 好。

左八右三一

林禎輝

春來興起見春情，綠樹紅花滿地生。萬物望天長發育，四時秉氣自調行。  
慎終追遠民歸德，立志修身眾仰誠。世世兒孫知孝道，祖宗永在必傳名。

右九左二四

鄧 強

三月櫻花落更開，草山佳景迓人來。觀音嶺峻祥光綸，紗帽峰巍瑞氣催。  
得意騷朋欣雅契，怡情遊客樂親陪。吾儕懷抱匡時志，社運蒸蒸育俊才。

左十

許又勻

甘霖解旱沃春田，萬物咸滋兆有年。品茗停杯空毀譽，賞蘭兀坐泯媿妍。  
風柔悄悄身心逸，草綠茸茸郊野鮮。起興踏青穿紫陌，鶯梭燕剪共陶然。

右評：品茗停杯、空毀譽。賞蘭兀坐、泯媿妍。前四字接後三字我看不懂其間的關係和想表達的意思。

右十左二三

王尚義

萬紫千紅爛漫開，于飛舊燕喜歸來。人隨風沐香花際，心倚雲翔翠嶺隈。  
得福古今原有數，成名僥倖豈論才。塵緣早悟修身訣，淡泊生涯志不灰。

左十一

陳碧霞

燕舞鶯歌旖旎天，百花添媚景無邊。東皇起早施靈雨，道侶持齋種福田。  
德慧親情猶日月，功名勢利似雲煙。何如拾卷兼身健，莫負韶光又一年。

右十一左十六

洪龍溪

相邀鷺友出郊坰，大好風光遍地青。墨客詩情同杜甫，騷人酒興過劉伶。  
鵲城煙景誇三月，瀛社吟聲響八溟。一片繁榮新氣象，千秋韻事繼蘭亭。

右十二左三四

林玉枝

應候知時瑞氣張，春回大地醉歌長。千嬌怒放催人賞，萬象更新覓句忙。  
願遂情豐吟麗景，神馳意雅詠仙鄉。題襟拾趣穿花徑，樂得良辰興正揚。

左十三

游振鏗

群山含笑碧煙籠，韶景宜人暖氣融。策杖林泉遲日下，成蹊桃杏映眸中。  
津津生意情無限，勃勃吟情興不窮。慨歎芳辰如過隙，繁華寶惜答東風。

右評：情字重出。真是可惜，整首詩真的不錯。

右十三左十四

李玲玲

鵲城萬戶沐春暉，鯤島繁櫻橫翠微。競放群芳均雨露，爭鳴百鳥亂庭闈。  
金樽銀燭笙歌沸，綠柳紅花蛺蝶飛。景氣迷離猶料峭，公卿宴樂不知歸。

右十四左三七

許秉行

別夢浮華酒一樽，吟遊興起遠塵源。雲山織雨催詩緒，玉硯飄香染墨痕。  
草密鶯歌啼百囀，花開蝶戲舞千番。宜人春景堪欣賞，雅韻清新解俗煩。

左十五右二三

周福南

東皇淑氣彌天地，暖日尋芳舞袖斜。蝶戲鶯啼迷秀野，桃紅柳綠到誰家。  
淡江水岸逍遙騁，虎字碑銘歲月遐。澹蕩風懷人欲醉，生春潤物濯年華。  
右評：因這是擊鉢詩，首句須要押韻，閒詠當然可以。請以後注意一下。

右十五左三九

張錦雲

千里鶯啼雨潤茵，客心琢句惜芳辰。豪雄正氣奸欣諫，山谷迴音志共伸。  
莫問東皇留幾刻，且將杯酒酌三春。半醒半醉吟情勃，誰步興懷杜牧塵。  
右評：整體詩很好，結句我也喜歡，但東皇對杯酒不是很工整，故名次排在十名以外。

右十六左二十

余雪敏

暫拋家務共尋芳，歐式山城矗碧蒼。小徑蜿蜒煙浥翠，群花蓊鬱露凝香。  
精油療浴舒筋骨，夜雨清談接夢鄉。翌日徘徊興難盡，但求何日續韶光？  
右評：筋骨對夢鄉不太工整。但整首詩我喜歡。

左十七

姚啟甲

黃鶯千囀接春陽，雲淡風輕感慨長。雙蝶遲飛琴韻潤，百花雖艷菜根香。  
盍簪互勵騷壇壯，物候翻新國運昌。莫畏吟身將老至，忘憂忘食惜韶光。  
右評：雙蝶遲飛+琴韻潤，百花雖艷+菜根香。我看不懂之間的關係。

右十七左三十

張民選

綠楊紅杏碧彌天，燦爛江山畫色妍。蝶舞鶯啼情附會，花嬌人醉樂留連。  
良辰引興吟鞭動，淑景追歡酒令延。萬象咸熙生氣滿，春心壯志並還年。

左十八右二六

蔡業成

陽春三月百花香，麗日和風引興長。杜牧詩心鋪錦繡，王維畫意放光芒。  
吟邊景物飄千里，望裏河山醉百觴。拾翠踏青情繾綣，不爭名利自芬芳。

右十八左十九

蔣孟樛

和風萬里蕩瀛洲，草木欣欣氣轉幽。海峽波瀾看定靜，蓬萊雨露更溫柔。  
興詩且共騷朋契，弘道追隨古哲修。大塊芳辰無限好，滿園桃李燦江頭。

右十九左三八

康濟時

東君駐馬毓溪山，競秀青紅催屐攀。滿島芳菲香市野，三農潤濕水潺湲。  
任緣覓句增風雅，即景生情醒鷺頑。騷氣應隨春氣暖，誓將詩種播臺灣。

右二十左三五

許哲雄

喜見陽和斗轉天，滿園桃李燭機先。殷勤蜂蝶芳菲逐，縹緲山河錦繡連。  
草木回生敷粉黛，風花弄色抹丹鉛。欲勞青鳥通消息，共約束君作散仙。

右評：回生對弄色不是很好。

左二一右三三

賴添雲

沛雨春溪沒褐苔，庭榕早去嫩芽開。秧田雁鷺梳閑羽，漬壁蝸螺飾篆埃。  
興插香瓶陪墨案，情隨烟景上雲臺。荒園半畝催翻種，豆蔓攀棚早結胎。

右評：篆埃？

左二二右三十

葉金全

清明忽雨溼山林，乘興郊原翠色尋。遍野濃雲行客少，沿途淖積泥侵。  
初春苦旱禾田坼，今日甘霖水庫深。喜得清泉堪夠用，還祈樽節答天心。

右二二左四十

楊錦秀

結伴尋幽遠市塵，芳園勝概任留連。幾回看竹沿三徑，偶欲探花共一天。  
放得山川開眼界，不妨吟嘯競詩篇。東皇最是柔情意，春色又添錦繡箋。

右二四左二八

余美瑛

三月千花爭碧色，煙江雨歇數峰青。漫山幽意生詩句，終日沉吟寓影形。  
盡覺垂楊拋寂寞，更無歸燕寄伶仃。思期世局承春力，洞鑑人天不獨醒。

右評：幽意對沉吟不工。

右二五左三二

邱進丁

春霖滴響市樓窗，節後紛紛入淡江。寶島群山添綠意，蘭潭過客賦新腔。  
叢林且喜和風沐，水庫尤歡大雨龐。上位無功安逸享，民生困頓怎興邦。

左二七右三四

黃祖蔭

春神浩蕩果君臨，綠野連天草木深。豔色添香花勃發，抒情試唱鳥賡吟。  
生靈並育毋相碍，祭典遵循大可歆。啄飲蓬萊該惜福，無懷氏代不須尋。

註：生靈指清華大學治癒校園受傷松鼠。又李鴻源拆霸，使國寶魚大量復育。祭典指清明掃墓及媽祖出巡。

右評：添香對試唱不好。我看不懂果君臨。

右二七左二五

黃廖碧華

千紅萬紫生春興，忽望悠雲倍念爹。雁字北飛歸故里，女兒南下返娘家。  
敲詩作樂煎香茗，屈膝承歡賞杏花。骨肉親情稀世寶，天倫同享喜無涯。  
右評：因這是擊鉢詩，首句須要押韻，閒詠當然可以。請以後注意一下。

右二八

徐世澤

正值櫻花怒放時，陽明山景展新姿。欲乘野色窮千里，喜把垂楊插一枝。  
老病何堪肢動慢，貪玩轉恐體難支。踏青興至新詩出，今歲元宵燈亦奇。

左二九

陳淑芬

草氣逢春細雨纖，黃梅半熟翠香拈。漫勞車馬雲山外，就近郊區屐齒黏。  
投老計荒耕筆硯，深居才拙愧驢黔。寬心遣興從詩酒，莫問寒窗與凍檐。  
右評：黔驢倒裝成驢黔是不可的。

右二九

吳秀真

遠峰橫翠染嵐光，大地回春抹艷妝。迎面桃花追舞蝶，含情綠柳撫泱塘。  
騷朋策杖同遊賞，逸興盈懷盡展翔。行樂及時應記取，剪裁精采入詩囊。

左三一

陳漢津

歲星披繞小龍鱗，鄴苑吟聲頌紫宸。吐信澤蒔芳草令，啐涎恩沃綺羅春。  
風流祖道槐煙淡，雨潤仙臺玉蕊新。巷調錫簫催社鼓，杏桃顏色更精神。

右三二左三六

杜美華

氣轉乾坤綠滿林，惠風時雨降甘霖。新桃陌上凝丹笑，野鳥山中鼓舌吟。  
絕好文章臨大地，融和天色悅禪心。春光逸興詩情健，欲掇珠璣豁翠襟。  
右評：凝丹對鼓舌，文章對天色不好。

左三三右三五

陳欽財

草山旖旎千紅燦，野柳繽紛萬客狂。撲蝶桐花苗粟祭，鬧蛾海樂墾丁方。  
柔風清淑盈頭翠，暖日舒和滿手香。竭智稿成參鉢會，吉祥樓契沐春光。  
右評：因這是擊鉢詩，首句須要押韻，閒詠當然可以，請以後注意一下。

右三六

歐陽開代

春陰料峭覆京城，漠漠菲微濕眾生。愁聽淒歌黃瘦鳥，誰憐薄命赤飄櫻。  
東風無力停烽火，青帝懶朝疏世情。台起萋雲何處匿，一山紅綠淚珠縈。

次唱：詩味

左 詞宗 劉清河 先生選  
右 邱天來

左元右元

洪玉璋

無邪三百興吟之，咀嚼精華味獨奇。領略箇中真妙趣，涵濡學子樂忘疲。

左眼右十六

鄭中中

胸中壘塊發為詞，字煉真情豈畫皮。見得本心無上法，幾行濃淡不爭奇。

右眼左避

劉清河

大自然中筆下思，句能去俗便稱奇。酸甜苦辣原多味，始信人間到處詩。

左花

李晨姿

夜來燈下自敲詩，枕上吟成病可醫。好句舒胸除俗氣，酸甘苦澀少人知。

右花左六

吳秀真

真味天成妙趣馳，自能善美蘊佳詩。禪機証悟修心性，種得靈根意出奇。

左四右三九

余雪敏

訪翠尋幽為賦詩，山中翳鬱意神馳。但憐香郁隨風散，那管東皇已誤期。

右四左十四

林正三

道名道意各隨宜，出口尋常便是詩。味外味兼言外趣，言筌迴脫冠當時。

左五

林松喬

長伴芳園日賦詩，撚鬚搔首郁氣馳。嘔餘心血渾忘倦，濃淡嚙來只自知。

右五

蔣孟樸

珠璣馥郁發芳時，麗句雄文鬱海湄。咀嚼原來真有味，參禪妙契吐清辭。

右六左三五

蔡業成

聯珠唱玉少陵詩，俊逸清新絕妙辭。廣品粗嘗皆有味，語圓律細可為師。

左七右三一

許今珍

孜孜典籍拜明師，勤習騷文樂望疲。下筆雖無千古句，清香喜已入新詞。

右七

林政輝

一番咀嚼一番奇，口齒生津是勝飴。字外功夫真氣味，平平淡淡亦佳辭。

左八右避

邱天來

摹宋規唐筆一枝，箇中韻味領絲絲。酸鹹旨愛回甘後，適口充腸任笑痴。

右八左二十

葉金全

蓬萊四季似春時，百景拈來盡好詩。真是箇中誰識得，推敲回味費尋思。

左九右九

楊錦秀

英華咀嚼自心知，齒頰留香啖玉芝。天地神遊唐宋句，芳園細剪入清辭。

左十右三二

游振鏗

振筆騷壇志不移，南山忽見引遐思。靈心常共詩心運，佳句琢磨元亮追。

右十

甄寶玉

陳言堆砌不為師，嚼臚如同實可悲。寫出真情兼活句，迷人芳郁樂心怡。

左十一右十四

余美瑛

字字寧非雅逸辭，吟懷布出句清奇。眼前多少紅塵事，盡入餘香不盡時。

右十一左十六

鄭貴真

賦就吟來百味滋，茹文琢句必銖錙。除非有意聞禪息，字海翻騰孰不知。

左十二右四十

黃天賜

遣懷抒鬱賦新詩，遍索枯腸日影移。執筆拋書尋逸興，山中處處有蘭芝。

右十二左二二

洪世謀

英華久嚼似瓊芝，句步六朝風雅披。七字吟成絃外意，得探造化妙奚疑。

左十三右二四

許又勻

雲低野潤柳絲垂，搖曳清波映艷枝。靜憩天鵝增畫境，吟情氣盪盡於茲。

右十三左三四

姚啟甲

春來何處好敲詩，心靜參禪句自滋。吾欲詞章增韻味，常研李杜聖賢追。

左十五

陳漢津

鼎盛文風賦有期，吟堂氣息總無欺。楚歌落魄葩經薄，眼底聲光索異奇。

右十五

陳麗華

一味清新入韻奇，遣懷作句盡含思。筆花香裡猶言志，自有風情意興馳。

左十七

唐羽

尋吟綴句正芳時，泥古喻今不適宜。崇尚品題參妙味，莫淪文字歎幽思。

右十七左二六

李玲玲

蘊藉珠璣德教施，細陳六義暢詩脾。意深言淺無窮盡，餘韻味長安可期。

左十八

邱進丁

輕雲過嶺暖風吹，翠入蓮塘日影移。綠竹春來鮮筍出，蘭幽絕色現丰姿。

右十八

鄞 強

群書穎悟像羲之，活潑鏗鏘抒妙詞。意義高深能穩顯，箇中禪味景觀奇。

左十九

林禎輝

苦讀書文勤學詩，寫來妙句有誰知，千言萬語心中意，一一玄音自在馳。

右十九左三九

許哲雄

筆吐珠璣芳且飴，騷人飽墨最開脾。青蓮許我醍醐灌，香臭酸甘杜李知。

右二十左四十

陳碧霞

當今世俗猛追奇，經典文詞富巧思。遣興真情弦外意，無窮韻味有心為。

左二一右二七

陳麗卿

染雲作賦嚼來奇，風雅涵融繫我思。頑懦今能蒙點石，得吟禪句喜滋滋。

右二一

高清文

春寒有句妙心馳，攬卷聞馨只自知。好似含飴甜徹骨，文房稚子笑爺癡。

右二二

張耀仁

幾度狂吟興不支，風流杜牧賦歌姬。大才白也芳樽飲，韻味殊高是好詩。

左二三右三五

王尚義

為汝推敲屢廢時，晨昏苦覓妙禪詞。胸中少蓄詩書氣，神韻何能到筆眉。

右二三左三十

賴添雲

雲泥化雨性無離，艷蕊成文各有姿。一首低吟搔斷髮，何曾蛺蝶到書池。

左二四右三三

徐世澤

韻在唐時立大規，森嚴格律展新姿。風花雪月多情味，奕世傳來總覺奇。

左二五

歐陽開代

五腑一清敲李詩，鏗鏘悅耳賦王維。風流典雅傳千古，隨意高吟媛士怡。

右二五左二八

周福南

行吟覓句寸心知，李杜才高九陌馳。月朗星輝雄八斗，騷風千古繫人思。

右二六左三六

黃廖碧華

文章萬卷古來垂，美藻盈篇費所思。若是全無詩味在，焉能留世得揚眉。

左二七右二九

張錦雲

有味無邪筆氣滋，吟聲泌及韻開脾。共鳴每為靈犀句，動我真情善美詩。

右二八

陳素真

芬芳閑倚賦文思，風雅篇篇筆下隨。抱石攬雲皆有味，騷章麗句獨清奇。

左二九

陳欽財

聯珠韻味畫情垂，詩賦千家繼口碑。李杜傳揚能樂活，芬芳瀛社吉祥隨。

右三十

黃祖蔭

自古騷壇聚太痴，心肝嘔盡血絲絲。風花雪月都囊括，卻道情人是謬思。

左三一右三六

許欽南

淡雅文章別有姿，參軍俊逸庾清怡。靈心恰共春心轉，細剪香花入句奇。

左三二

杜美華

蓬島吟香四海馳，芳華大塊吐瑰詞。方塘一鑒清如許，自蘊幽芬化神奇。

左三三右三四

王 前

平生踪跡尚無期，猶作吟奴為一詩。妻問何需來自苦，箇中三昧有誰知。

左三七

張民選

日吟宵詠百篇詩，澀苦如荼仍不時。似菊清香曾有覺，千端韻味感依誰。

右三七左三八

洪淑珍

三百篇章無復疑，維摩奧境耐敲推。揮毫不用驚人句，意致深藏委婉辭。

右三八

許秉行

搔首撚鬚句忍施，嘔餘心血漸持奇。縱然一字推敲苦，濃淡嘗來志未移。

## 端陽組例會

時間：102年7月24日

地點：天祥路吉祥樓餐廳

首唱：防颱

左 詞宗 陳國威 先生選  
右 陳國勝

左元右一三

黃廖碧華

台灣四面海為鄰，強烈颱風暴雨頻。土石奔流埋屋路，果蔬傷毀怨天神。  
栽培樹木山坡護，疏濬溪河水道伸。電器瓦斯常檢驗，慎防災變救黎民。

右元左九

洪淑珍

封姨肆虐忒猖狂，殷鑑連年豈可忘。鞏固家園溝道暢，聽聞氣象食糧藏。  
遷村有策應圖計，主政抗災先備防。朝野時時存警覺，颱風過境不驚惶。

左眼右十

陳漢津

嚴防一向聖心殫，濫墾從來抑禍難。廣植參森綿絕嶺，禁開便道接危巒。  
江湖樹樹皆填色，壑廓山山不漏殘。號怒縱然興百尺，輸洪豈堵蓼莪灘。

右眼左二五

李玲玲

風狂雨橫卷雲天，財產身家難保全。肆虐無情奔土石，綢繆有策轉坤乾。  
愛民治國宜躬踐，防患避災非口懸。詭譎環流颱莫測，時時警備莫遲延。

左花右二八

許又勻

時臨夏月慎防颱，莫使家園屢陷災。水道清淤河港濬，山林植樹嶺巖栽。  
風颯大地無傷害，雨濺生靈弗慟哀。海國由來多苦難，居朝鼎鼐重良才。

右花左十九

邱天來

氣象傳媒報導詳，飛簾作勢迫台疆。門窗緊閉防災害，溝洫疏通少損傷。  
應變電停宜備燭，更思炊斷有餘糧。警民共禦當前患，風雨同舟護梓桑。

左四右二一

許欽南

巨風豪雨欲侵臺，預測中心警報來。屋破樓傾餘病畜，天翻地覆起悲哀。  
宜興養樹培源氣，繼築強堤固水隈。應把防颱當大事，多些禦備少些災。

右四左二四

楊錦秀

夏秋鯤海颶風狂，氣象收聽早預防。調節閘門疏水患，莫教暴雨致民傷。  
橋崩路斷交通阻，人禍災成救濟忙。豆腐工程應格辦，中樞落實固城鄉。

左五右十七

陳碧霞

屋倒牆傾樹石奔，風姨肆虐命財吞。天災莫測無情擊，地變難防驚懼存。  
水土保持添歲月，山林復育守乾坤。綢繆遠勝勤修補，有備能教減禍根。

右五左二九

洪玉璋

氣象俄聞警報中，封姨走向力無窮。流沙滾滾溝防塞，崩土轟轟路阻通。  
海漲驚傳鮫鼓浪，石飛愁睹燕翻風。預將窗戶牢關鎖，莫使颱來一掃空。

左六右九

周福南

風姨潑辣海東侵，朝野綢繆費苦心。溼地疏洪培水土，危坡補固護山林。  
牽蘿修牖防災禍，備藥儲糧似澤霖。寄語仁人施濟急，同舟協力勝千金。

右六左十四

洪世謀

颶風夏至好侵臺，防患未然能避災。主守水門無弛怠，聽聞氣象不驚猜。  
山民疏散危坡遠，鷹架堅牢大樹栽。預蓄乾糧人畜護，提高警戒保家財。

左七右二九

陳淑芬

鯤島防颶第一先，民間政府力齊肩。禦災猶恐強風襲，嚴陣還驚猛浪旋。  
植樹丘陵深土石，關心黎庶護桑田。東南國境饒薰氣，美好家園在眼前。

右七左十

杜美華

掀天捲地鬧娑婆，熱帶風旋氣壓多。濫墾摧林災禍至，慎防妙策自然和。  
溝渠疏濬開通道，屋宇維堅勢擋波。府院精研推善策，進行建設救沉痾。

左八

賴添雲

狂颶暴雨浪掏基，樹倒房淹早避危。築壩造橋嚴督策，栽林護土畢勤施。  
溝長患堵常疏浚，幹萎防傷速鋸離。官腐商貪家國難，同舟互濟遠災悲。

右八左二一

陳保琳

颶風暴雨賽刀兵，狂掃摧殘觸目驚。戶牖安牢強結構，招牌固定避頽傾。  
燈光蔬果乾糧備，水路溝渠雜物清。肯信綢繆爲首要，防災應變護蒼生。

左十一右二七

張民選

年年境宇颶風侵，揭地掀天島欲沉。濫墾成災南接北，偷工養患古延今。  
防颶演練淪為戲，治水圖謀枉費金。對策疏遲離變化，應追根本作良箴。

右十一左十二

余詠櫻

颶颶序至思防務，無雨成災雨亦災。安任濫耕違土石，能教筆路固樑材。  
平居不悖山林策，民牧時兼圳道開。手抉資源京邑濟，何愁海若犯鯤台。

右十二

王 前

熱低氣壓變無常，醞釀成颶威力強。通令全民高警戒，週邊各地要嚴防。  
溝渠疏浚人人責，窗牖維修戶戶忙。未雨綢繆遵古訓，減輕災害護家鄉。

左十三右十四

甄寶玉

颶襲瀛洲景況淒，暴風豪雨漲河溪。橋崩路斷淹洪水，田毀村亡覆土泥。  
濫墾嚴懲施鐵腕，疏渠急待濟群黎。今能預測知天氣，良計綢繆手共攜。

左十五右十九

吳秀真

每至狂颶危報傳，群黎懼恐禍災延。蒼心難測焉迎患？早備如俱可抗天。  
慎戒捲龍風倒屋，嚴防潰石雨淹田。人間幻化無常理，福德增修養吉年。

右十五左二三

林松喬

遇颶侵襲必成災，萬物生靈浩劫來。路塌山崩禽牧毀，人亡屋倒果蔬摧。  
殷期防範悽惶狀，更待居安遠慮哀。未雨綢繆當務急，永除憂患笑顏開。

左十六右二五

康濟時

新聞又報颶臨臺，驚憶封姨恣意摧。黎庶險如風裡葉，閣樓殆若海中桅。  
預知禍害先謀法，早備安危遠劫灰。思患國家循此例，防微杜漸靖蓬萊。

右十六左二二

游振鏗

颶風過境使人惶，未雨綢繆是正當。固岸遷村先警戒，清淤補漏更加強。  
周嚴成立防災署，謹慎規為避難場。氣象關心糧食蓄，身家確保萬民望。

左十七右二十

張錦雲

知時應策患何憂，協力防災智共謀。救急水糧先準備，止淹牖戶慎查修。  
山河固暢嚴勘責，人畜安全保護賙。警覺強颶風眼道，官民機動助呼求。

左十八右二六

鄧 強

首要防颶計密周，吾儕未雨慎綢繆，門窗穩固同無患，屋壁堅牢自解憂。  
爾我相扶携手護，邦家應協寄情投，安居些少天災害，黎庶康強擊壤謳。

右十八

李晨姿

颶風有警即將來，挾雨滂沱百姓哀。土石奔流情記省，工寮掩蓋命難回。  
低窪積水人呼渡，高處搖衣待救災。預作防患多戒備，不因大意損全臺。

左二十

徐世澤

一年數度報颶風，暴雨伴來掩碧空。儲備乾糧防斷電，勤修橋柱便排洪。  
嚴查樹木遭枝折，清洗陰溝讓水通。欲想減輕災害苦，全民奮起氣如虹。

右二二

許哲雄

飛廉析屋踏山遊，群策安居豫為籌。霹靂難消因淺慮，雷霆可弭賴先憂。  
智摧風伯翻雲計，技破波臣借箸謀。若識征天人有術，四時高枕豈奢求。

右二三左二八

陳麗華

耳裡如聞萬馬聲，颱風過境鎖愁城。山崩鬼哭心驚懾，雨漲人悲海倒傾。  
不待災來先劃策，猶防禍起復徵兵。通溝備水修窗戶，共守家園倍有情。

右二四

蔣孟樛

鯤洋夏季發狂風，橫掃臺灣刮海東。豪雨強颱災害起，深山大水屋田沖。  
生民謹慎防塵劫，政府宣行導潏洪。人定勝天施建設，不驚處變創奇功。

左二六

張耀仁

天災地變古今同，入夏豐穰畏暴風。實事防颱民受益，虛招避颶吏爭功。  
宅離險境能安業，河築高堤可阻洪。努力綢繆嚴守護，農漁減損福無窮。

左二七

姚啟甲

台灣本是四時優，遭遇颱風神鬼愁。襲捲馳颶人畜亂，淹侵暴雨市村漚。  
防災急務須長計，護害佑邦徵善謀。汝欲祈安輕苦難，時時備妥不為仇。

左三十

沈榮槐

風雲幻化遇非常，瀛島奔颶震八方。驟雨驚雷誰不懼，橫災細禍總須防。  
變遷氣候時關注，經緯水文早計量。政府黎民皆有備，安居樂歲保家鄉。

右三十

陳欽財

滂沱大雨樓山塌，呼嘯狂風產命捐。處處防颱韜略現，人人解厄睿謀傳。  
耳機泡麵隨時應，手電沙包即地挺。有備無妨維社稷，存心減害享堯天。

次唱：冒雨尋詩

左 翁正雄 先生選  
右 詞宗 洪玉璋

左元右十七

黃祖蔭

難能熱浪雨瀟瀟，山影模糊樹影嬌。我欲尋詩詩覓我，相逢一笑再相邀。

右元左十六

洪淑珍

午後攜壺過板橋，沛然一陣電光昭。不干詩興衣鞋濕，煙雨江城筆底描。

左眼右十

康濟時

沛然夏澍鬱全消，時雨催詩待筆描。我效東坡鞋勝馬，一囊妙句樂逍遙。

右眼左十

洪世謀

滂沱一陣下層霄，載筆推敲興正饒。欣見暑氛消卻盡，霎時藻思湧如潮。

左花右避

洪玉璋

纔過午後雨瀟瀟，雷雨交加興倍饒。勇往直衝佳句拾，干她濕透鳳鞋嬌。

右花左二三

杜美華

霹靂長天大地澆，鷗朋冒雨遣詩寥。諸君莫笑風騷客，尋得佳詞塊壘消。

左四右十八

楊錦秀

暑氣炎蒸驟雨澆，行吟覓句妄心消。稻江一片濛濛色，畫意詩情漲晚潮。

右四左八

邱進丁

驚雷閃電雨千條，未到祥樓一路澆。鷺濕鷗淋何足患，江濱覓句競詩潮。

左五右三三

甄寶玉

詩家有約在今朝，午後驚雷帶雨潮。縱使淋漓衣帽濕，仍來祥閣覓歌謠。

右五左十七

王 前

起早憑窗日尚驕，尋詩緩步趁花嬌。忽來驟雨驚雷急，濕透青衫興未消。

左六右三五

葉金全

雷聲霹靂閃雲霄，驟雨傾盆灑綠蕉。夏日午時常遇此，乘涼覓句樂逍遙。

右六左三三

賴添雲

橫雷驟雨降雲霄，震破城空滅暑囂。鞋濕傘斜心漫喜，街中即景作詩謠。

左七右三一

許哲雄

一身淋瀝雅儔邀，天水愈傾思愈饒。無狀風雲珠玉落，沛然何處管城囂。

右七左十一

邱天來

驟雨當頭暑氣消，一天紅漲水雲嬌。溪山如此真堪畫，攜得吟情過小橋。

右八左九

周福南

蕭疏風雨雅朋邀，觴詠聯歡濁酒澆。洗甲淋鈴詩興逸，行吟覓句樂逍遙。

右九左三七

黃智美

狂風頃刻雨瀟瀟，共領南窗暑氣消。抱得冰心涼味足，吟情畫意滿紅橋。

右十一左十四

李晨姿

蒼芎忽暗雨聲囂，雷電交加快步颿。濕透青衫欣得句，南薰領處筆花嬌。

左十二右三八

吳秀真

空靈總是遠塵囂，霖雨霏霏詩意饒。欲藉吟情陳淑景，千般夢幻畫中描。

右十二左二九

蔣孟樑

夏雲驟雨漲江潮，山海濛濛韻意饒。詞客尋詩甘冒險，衝風破浪覺逍遙。

左十三右二三

游振鏗

滂然驟雨陣盆澆，滌盡炎威潤稼苗。浙瀝催詩欣唱和，旗亭絕妙韻清飄。

右十三左二四

陳淑芬

甘霖一雨降炎驕，踽踽徐行覓句迢。落拓胸懷長鬱悶，吟情且嘯散雲霄。

右十四左二五

翁正雄

祥樓赴會雨瀟瀟，詩筆淋漓暑悶消。浙瀝聲中鷗鷺狎，潘江潮湧淡江潮。

左十五右三七

許欽南

冒雨尋詩句未調，幾番慘淡費心挑。蹇驢似解沉吟趣，故意遲遲任路遙。

右十五左三六

張民選

驟雨俄然暑氣消，興來無畏水淹橋。烟濛綠野新紅洗，畫裡尋詩思似潮。

右十六左三四

林松喬

驟雨油然興益饒，吉祥樓上客吟邀。尋詩覓句酬知己，浙瀝聽來慰寂寥。

左十八右二七

余美瑛

千峰忽送尋詩雨，一掃炎光忘市囂。屏翳何能驚雅聚，敲窗聲裡片心描。

左十九右三二

陳漢津

白雲紅日舉頭招，紫電銀蛇雨即朝。滌盡胸中詩正發，覓來金句德同堯。

右十九左三十

林禎輝

上天變化不能調，陣雨時來暑氣消。最是涼風人盡爽，尋詩覓句樂逍遙。

左二十右二一

歐陽開代

雷聲震水浪珠跳，驟雨濕衣奔野寮。暫息靜心思李杜，覓尋金玉古今飄。

右二十左二八

張錦雲

豪情豈懼雨瀟瀟，喜聽穿林興倍饒。濡面覓來詩意勃，風雷如織筆如橋。

左二一右三九

李宗波

冒雨尋詩鉢興饒，偶聞淅瀝濕吟僚。滋潤筆花齊怒放，迭成佳句足逍遙。

左二二右二九

張耀仁

冒雨前來詠古謠，胸中雅興任風飄。吉祥樓上騷朋萃，鉢震波瀾應手描。

右二二左三二

劉美玉

驟雨時來暑氣消，當頭密洒洗塵囂。搜奇得句吟心發，共會敲詩送寂寥。

右二四左二七

唐羽

榴紅六月赴朋招，一路滂沱溢市朝。忽憶畦原苗正槁，逢時急雨富詩饒。

左二五右三六

陳欽財

偶然布澤享涼宵，卻暑怡心草木陶。冒雨尋詩追李杜，珠璣麗藻樂逍遙。

右二五左二六

許又勻

雷聲伴雨熱蒸消，天際雲收暑氣調。祥閣騷人揮彩筆，珠璣妙串白吟謠。

右二六左三九

陳保琳

午後驚雷震地囂，傾盆驟雨怒風颿。塵煙滌淨神清爽，沛澤敲詩意更饒。

右二八左三八

鄧 強

忽然衣濕雨狂颿，熱逼炎蒸暑暫銷。眾綠時生梅早熟，憑誰妙筆翠煙描。

右三十左三一

黃廖碧華

忽降甘霖暑氣消，雨中欣景解無聊。一時詩興如泉湧，賦得佳篇彩筆描。

右三四左三五

蕭煥彩

濕足前來赴友邀，花亭小歇海棠嬌。敲詩和韻絲絲扣，雨打芭蕉廿四橋。

左四十右四十

王尚義

經山歷水過幽橋，度霧穿雲向江潮。最好春雷絲雨後，詩思無限景偏饒。

## 中秋組例會

時間：102年10月6日

地點：天祥路吉祥樓餐廳

首唱：良心

左 詞宗 蔣夢龍 先生選  
右 蕭煥彩

左元右八

李宗波

撫心無愧對蒼穹，路不拾遺進大同。一諾千金師季子，片言九鼎效毛公。  
是非辨別良知啟，善惡分明聖訓崇。但使靈台能淨化，清廉治國譽瀛東。

右元左廿四

王 前

蒼天有眼勿猜疑，善念中存福可期。處事開誠循直道，為人守正不偏私。  
宵深自問心無愧，夢裡何愁德已虧。寄語莫教哀莫大，殷殷聖訓啟良知。

左眼

許欽南

良心無愧事圓融，君子謙謙慎始終。楊震四知堅勁節，曾參三省振淳風。  
榮華富貴何須慕，潦倒清貧豈運空。養性修行能長壽，胸懷坦蕩樂無窮。

右眼左廿六

張錦雲

舉止微觀判劣良，老天有眼莫輕狂。仰頭正氣心頭定，偏理循私義理傷。  
世事如棋爭不盡，靈台恆善樂安祥。儒家道法知多少，尚德行仁入夢香。

左花

黃祖蔭

若具形體乃行屍，唯有四端人有之。孟聖曾言稱不忍，陽明繼述謂良知。  
源頭活水流未捨，佛手拈花事堪為。俯仰無慚因秉善，民胞物與樂何其。

註：孟子公孫丑六，指四端即惻隱、辭讓、羞惡、是非之心，人皆有之。

未捨見論語，逝者如斯夫，不捨晝夜。民胞物與，見張載西銘。

右花

空谷靈根不染塵，澄明胸次自彬彬。人情世道符天理，安分知機見性真。  
歹事莫爲心境淨，福田常植物華新。念頭起處惟存善，俯仰之間無鬼神。

游振鏗

左四右九

靈通七竅循環理，本立三才仁義心。俯仰無虧天地道，知行不負古今箴。  
小人惡惡災猶雹，君子彬彬德化霖。方寸奚由藍綠染，狂瀾倒挽孰能侵。

康濟時

右四左廿一

良心喪盡恥私心，醒世誰來發正音。放眼虎狼貪且狡，置身名利古猶今。  
權臣誤國違三策，騷客匡時抵萬金。所貴撫躬銜道義，不隨俗物共浮沉。

陳麗華

左五右廿二

豪奪橫行詞振振，欺瞞算計日營營。人因貪欲良知蔽，事及危機後悔生。  
方信無邪心地好，得能自在玉壺清。作爲磊落夜眠穩，俯仰無虧廉且貞。

洪淑珍

右五左六

乾坤有道世同倫，德義藏胸主六神。善惡殊途緣此念，聖凡分際匪他因。  
無邪智府慈懷抱，一點靈犀正氣伸。天理不虧明若鑑，冰清何懼鬼爲鄰。

許哲雄

右六左七

無邪方寸最堪珍，算盡機關失本真。違法栽贓嘆濟濟，爭權奪利禍頻頻。  
居心善種菩提果，行事宜修般若因。如此靈台澄不昧，堯天重見福蒸民。

陳麗卿

右七左十九

濁世貪風甚可悲，幾多奸道蔽良知。偷工減料人神憤，把政擅權名利爲。  
天理昭昭焉放縱，心田朗朗最安怡。常懷正念雲程遠，閨室居身亦不欺。

洪世謀

左八右廿七

許又勻

知足謙和方寸明，紛紛濁世貴無爭。心如寶鏡時時鑑，胸有靈珠日日晶。  
美善情懷常醞釀，凶邪意念速瀾清。怡然自在觀花去，小苑秋風舞菊英。

左九右十四

李珮玉

人初性淨本心良，圖利謀生豈可忘。食品添加無毒害，民膏運用避私囊。  
惡爲報應須臾至，德積兒孫福祜償。凡事捏拿三尺舉，不違秉善自安祥。

左十右十二

林松喬

天理昭彰莫亂行，舉頭三尺有神明。當循正道心能淨，摒棄邪言性可清。  
只歎奸商充斥苦，焉知劇毒恐惶驚。高瞻守德嚴修己，處世待人必至誠。

右十左廿七

洪玉璋

元戎心迹要雙清，國事關懷秉信誠。治世無偏妨俗染，施仁公正博佳評。  
勤修萬善師先哲，好結諸緣礪後生。大任應從天所命，興邦功業慶承平。

左十一右卅

孫秀珠

世上初心本善真，濁流慾海自欺身。沈浮名利錢遮眼，追逐威權勢奪人。  
格物致知天理在，尚儒端性德風親。溫良恭儉謙和讓，惻隱常存無幸民。

右十一左十三

葉金全

瓊林啟教學修身，古訓先賢誨守仁。處世無欺行正道，營生有德待寬人。  
農工百業良心秉，商賈千家信譽珍。萬事循天知照鑑，舉頭三尺現明神。

左十二

沈榮槐

森羅萬象易迷離，對境澄心可自知。善惡是非由念轉，升沉良窳見行持。  
分明黑白守中道，參悟乾坤啟大慈。抱素懷真根源處，長留浩氣妙難思。

右十三左十五

楊錦秀

惻隱情懷達性柔，人間至善共追求。雪中送炭興仁義，錦上添花起怨尤。  
富貴布施功德積，貧窮持戒儉廉修。靈臺篤實隨緣住，世界和平享自由。

左十四右十六

鄧強

全民穩定作規箴，樂道安貧積善心。奮鬥焉曾停腳步，辛勤能得壯胸襟。  
滋培正氣吟軀健，曉悟虛懷感性深。處事除非明義理，靈台潔淨福恩臨。

右十五左廿九

黃天賜

良心買賣效先賢，飲料經營數十年。食品安全遵典範，楊桃產製續師傅。  
商場失信名聲損，情分難堪顧客憐。畢竟病常從口入，衛生第一健如仙。

左十六右十八

周福南

靈台若鏡本元良，不畏榮枯住世長。逐利追名應禮讓，行仁培義振綱常。  
慈悲並濟泯恩怨，公德齊宣見吉祥。富莫驕矜窮莫餒，蘭孫桂子發幽香。

左十七

蔡業成

天良未泯寸心丹，垂老猶思萬里搏。立德立言求上進，有為有守不偷安。  
明齊日月容人易，量合乾坤入世難。儒法躬修辨義利，知微深究出毫端。

右十七

徐世澤

我心如秤憑才俊，憎愛無偏求至公。處事仍須當義士，待人猶戒作奸雄。  
精思創建非淫巧，竭智興仁亦正風。矜彼更能多撫慰，恩波遠及受尊崇。

左十八右廿六

陳淑芬

大道虛無象帝先，少私寡欲竹林賢。上行德政星辰拱，下以良知瓜瓞綿。  
驟雨飄風莫終日，含光養晦用臨淵。平和處與艱危世，天下為公法令蠲。

右十九左卅

林李玲玲

人心莫測風雲變，善惡區分一念差。因果循環誠有律，慈悲應照樂無涯。  
虛情假意言行悖，實義真仁道德誇。天理常懷良性顯，隱微獨慎莫思邪。

左廿右廿四

甄寶玉

天性純良乃本心，能知善惡作規箴。待人處事皆無愧，守義行仁最可欽。  
塑化添加何等毒，機謀財命不如禽。歪風颯烈迷方寸，道德重修內在尋。

右廿

郭三河

時下良心沒值錢，清廉口號破虛傳。貪財誤國雖堪恨，枉法欺民總可憐。  
善策蹉跎歡有限，奸商難絕苦無邊。祈開正義新生道，世界昇平快欲仙。

左避右廿一

蔣孟樑

惻隱之心至善宗，遵循天理達中庸。爲非一世憂煩裏，作惡三更恐懼逢。  
道德勤修事精進，慈悲持戒業消溶。布施濟困招鴻福，博愛情懷致敬恭。

左廿二

余詠纓

方寸地原天性有，尺標人各鑑分明。親賢豈可疏忠諫，好惡安能任寵榮。  
潤義無私誠內養，滋仁不黨德中耕。春風久坐心田失，法理乖違舉世評。

左廿三右廿五

張耀仁

少小兒孫掌上珍，雙親嚴教善爲鄰。恒持稟性追先聖，確保淳風沐後人。  
治國無能今倍昔，濫權有套步翻新。良心已泯規何在，但願台灣去暴秦。

右廿三

張民選

人初本性是非明，貪念薰心却逆行。鬬利謀財拋道德，爭權逐位棄公誠。  
傳媒添亂危機起，社稷沉淪濁氣生。古訓無存天理滅，難將善惡兩分清。

左廿五

政客營私賊國家，良心不再肇中華。財團獨利基金損，國庫虧空鐵碗奢。  
庶眾身形皆瘦骨，官商口慾盡貪蛇。豺狼虎豹權朝野，百姓無從脫爪牙。

邱進丁

右廿八

道生德畜貴相尊，善信除驕惡不存。清靜去私天下正，柔和知足四鄰敦。  
輕名重義知榮辱，少慾求真播愛恩。策政司權憑憲治，良心失若樹糜根。

賴添雲

左廿八右廿九

舉頭三尺有神光，永鑑芸生善惡彰。良士虛懷維社稷，誠心處事展家鄉。  
歸真反璞修情厚，化己成人養性長。因果臨終咸必報，慈行納福滿庭香。

陳欽財

次唱：風雨故人來

左 詞宗 王 前 先生選  
右 許哲雄

左元左廿五

游振鏗

故交重叩菊籬秋，大好吟情話舊儔。簷下溜聲留住客，斯文喜共覓清流。

右元左十五

洪淑珍

正是清涼風雨秋，迎來老友喜不休。笑談竟夕交情密，共剪西窗醉一甌。

左眼右十六

張民選

暴雨狂風韻更悠，詞人雅集展吟喉。興詩豈畏天時惡，文運憑誰策壯猷。

右眼左九

林禎輝

風吹雨急繼無休，舊約如期免用愁。但愛故人情意好，依然共赴吉祥樓。

左花右八

陳欽財

颱風菲特擾清秋，雙北基隆雨襲尤。墨客傾心瀛社契，聯珠唱玉吉祥樓。

右花左卅

陳麗卿

菲特颱風挾雨稠，難能故友會祥樓。西窗剪燭溫情現，妙筆生花句更遒。

左四右邇

許哲雄

畢箕交逐苦行舟，淅瀝翻飛引我憂。忽有敲窗忙倒徙，相期已是過三秋。

右四左八

許又勻

烏雲重疊雨聲愁，鯤北風馳令我憂。好是騷朋依約至，傾觴把盞吉祥樓。

左五右五

李珮玉

強颱風至使人愁，駭雨狂風不肯休。幸喜知交來敘舊，笑談今日更情投。

左六右十四

楊錦秀

菲特狂吹捲浪頭，西窗剪燭聚朋儔。隨園韻事神交久，苦雨淒風故友留。

右六左十二

蔣孟樛

菲特中颶蕩九秋，強風驟雨滿山樓。最難故友臨寒舍，促膝敲詩樂忘憂。

左七右廿六

黃祖蔭

細雨斜風正凝愁，搖窗亂影竹修修。同覺攘臂翩然至，反老還童兩白頭。

右七左十

葉金全

時逢急雨襲三秋，四處狂風積水流。難得故人依約至，騷心摘藻樂悠遊。

右九左廿九

許金珍

狂風暴雨襲清秋，趁興敲詩赴吉樓。喜與故人重話舊，同傾杯酒最情投。

右十左十三

陳淑芬

中颶菲特亂瀛洲，雅集騷朋意志遒。不畏雨風馳驟急，敲詩把酒吉祥樓。

左十一右廿三

許欽南

蕭蕭逸韻送新秋，四面峰明宿霧收。燭剪西窗情繾綣，故人風雨一登樓。

右十一左廿一

周福南

風姨夜襲北台憂，十里鄉林土石流。瀛社蘭亭鷗鷺契，騁懷樂見我良儔。

右十二左廿

孫秀珠

落葉滴階敲玉樓，吟朋把盞語難休。今宵勝似當年夜，共剪西窗韻事悠。

右十三左十八

林正三

論詩設席就樊樓，狂肆風姨擾未休。撐傘荷簑心愈切，故交風義見情遒。

左十四右十七

張耀仁

颶風帶雨襲瀛洲，受害災民滿眼愁。故友照常來各地，高吟暢飲樂悠悠。

右十五左廿二

甄寶玉

迎君今日到瀛洲，雖值颶風卻不憂。有約劇場同聽戲，喁喁夜半兩心投。

左十六右卅

洪世謀

秋颶肆虐幾時休，論詩逕上吉祥樓。暴雨狂風留客醉，雖然喜會感離愁。

左十七右十九

林松喬

雨暴風狂滿海樓，中颶菲特襲瀛洲。忽來故友攜肥蟹，敘舊持螯酒不休。

右十八左廿三

唐羽

連朝暴雨使人愁，五畝豐田陷歉收。燭剪西窗徠遠客，敲詩諷世足忘憂。

左十九右廿八

王尚義

暴雨狂風逢故遊，夢回歲月已驚秋。淒涼檢點離情事，減卻浮生幾許愁。

右廿左廿四

康濟時

菲特風狂雨箭咻，稻江十月使人愁。詩心未許天心絕，瀟灑聲中倍唱酬。

右廿一左廿六

歐陽開代

秋颶風雨亂台疇，島內政爭仍不休。世事紛紛何解悶。邀來故友覓鷗遊。

右廿二左廿七

邱進丁

菲特風狂雨亦尤，騷朋履約醉祥樓。沿途霎颶行人少，感子濃情結永儔。

右廿四左廿五

徐世澤

詩朋相約度周休，豈料颶風雨又稠。會長笑迎隨口出，鏗鏘好句激如流。

右廿七左廿八

李宗波

不驚風雨訪吟儔，雅聚祥樓意悠悠。促膝論詩談逸事，騷朋囊篋慶豐收。

左卅一

李晨姿

驟雨急風客遣舟，湍流不懼爲同修。忘機友集吟哦韻，振筆詩成往事留。

右卅一左卅

王前

連朝風雨強淹留，坐困寒齋宛自囚。誰叩柴門猶帶酒，料知老友有詩酬。

## 冬至組例會

時間：102年1月22日

地點：天祥路吉祥樓餐廳

首唱：冬至瀛社團敘

左 詞宗 許哲雄 先生選  
右 洪玉璋

左元右十六

陳漢津

管灰葭律令行時，落木霜寒羽蓋披。瀛社敘吟梅菊譜，稻江團契柏松枝。  
苔岑應節書雲物，酒肉燒心醉粉脂。莫使騷壇荒李杜，分冬宴賦宋唐詩。

右元左十四

蔣孟樑

欣逢冬至歲寒登，暢敘江樓藻思騰。一社崢嶸揚海嶠，千秋翰墨契鷗朋。  
斯文猶憶洪癡者，祭酒長懷李建興。且待迎春看躍馬，詩風繼美日蒸蒸。

左眼右二四

李玲玲

合璧連珠亞歲迎，群陰將伏一陽生。騷心團聚吉祥見，熱血奔騰如意傾。  
但化干戈爲玉帛，暢談風雅遠功名。人同糕黍搓圓滿，六律初調氣轉清。

右眼左三五

王 前

葭灰飛動夜眠長，律應黃鐘轉一陽。歲末詩賡瀛社侶，樽傾賦就臘梅香。  
會開筆陣聯聲氣，話舊情懷耀錦章。唯盼道衰同挽起，期斯聖教吐光芒。

左花右四

陳麗卿

節逢至日一陽生，瀛社苔岑續舊盟。應景湯糰甜蜜蜜，談天譚語笑盈盈。  
詩吟放膽開金嗓，藻薦披懷獻玉觥。頭白吾儕唯此願，相將激濁與揚清。

右花左三一

張耀仁

藝文吟社史悠悠，團敘騷朋上酒樓。至節搓丸爭宴樂，寒冬得句競風流。  
嗟官事管油殘害，歎吏農欺地賤收。送款邦交呈敗象，人權倒退是何由。

左四右三二

蕭煥彩

搓圓令節喜洋洋，瀛社騷朋聚滿堂。論道談心皆有感，扶輪匡俗不能忘。  
吉祥莫寫傷時句，福壽多吟愛國章。詩酒聯歡才並茂，斯文一脈永流芳。

左五右三五

陳麗華

樂此佳辰共舉觴，談心促膝引杯長。論文意合風騷客，得句詞傾翰墨場。  
又喜葭灰吹玉管，更瞻斗柄動瑤光。吾儕聚首吟清景，律轉鴻鈞復一陽。

右五左二七

孫秀珠

雅聚開筵四季輪，小樓冬至仿如春。高吟低唱邀明月，濁酒清茶論古人。  
座上文星紛耀眼，詩中仙聖一臨身。成珠筆陣爭元榜，瀛社風騷日日新。

左六右三三

吳茂盛

珠連曜合鵲增巢，暖閣張筵梅放苞。接酒引謳徵鼓吹，分箋寸燭競推敲。  
袖詩未擬題凡鳥，逃席無由賦解嘲。已薦搏丸酬歲復，還將伐木定新交。

右六左九

楊錦秀

陰極乾坤又轉陽，良辰最喜共飛觴。百年詞藻興瀛社，一線斯文動海疆。  
麗澤金蘭膠漆契，風華翰墨韻聲長。天涯知己相濡沫，肝膽論交氣節芳。

左七右三一

張錦雲

升降陰陽歲暮臨，騷朋冬至契同心。飛觴醉月歡何極，動筆干霄樂不禁。  
瀛社誼聯君子德，吉祥會敘雅文音。洪鈞六瑄灰飛處，應律迎長共浩吟。

右七左十

甄寶玉

冬至陽升逸興催，華筵款待鷺鷗來。搓圓把酒添溫暖，琢玉尋章巧剪裁。  
經歷百年風雅事，堂皇大社棟樑才。同心躍進新時代，深盼春花老樹開。

左八右十五

林禎輝

冬來氣候變寒天，節序因循總自然。瀛社依時會鷺友，騷人挾筆競濤箋。  
無詩那得分優劣，有酒相傾樂聖賢。但使醉鄉長入夢，莫教些事擾安眠。

右八左三八

陳淑芬

落木寒空永夜消，陽生此日欲春招。樓開文讌吟珠玉，席共山罇話市朝。  
願効群賢高格調，方瞻孤僻太無聊。詩成便看詞宗意，樸拙渾然未必雕。

右九

黃祖蔭

雅會流芳鉢不存，精神貫徹軌同遵。三叉七步揚斯盛，一樹千花綻始蕃。  
政海興瀾添野怨，吟壇煮酒共冬溫。書生振臂非文弱，正義扶來壯國魂。

右十左十五

洪淑珍

節迎長至倍心驚，吟友雅趨文酒盟。聚首引杯論世道，抒懷言志減風情。  
齊歎吏治何隳敗，安解民懸得等平。寄語官爺仁政布，是非真假要分清。

左十一右三九

鄧強

五十年來契雅情，群賢瀛社續詩盟。起衰文運追先哲，啟化人心勵後生。  
闡教尼山胸豁達，依仁臺島道宏行。團圓敘舊逢冬至，互頌康寧韻事賡。

右十一

吳秀真

葭飛陽轉歲添新，樓敘吉祥騷客親。雅會聯吟敲活筆，鉢聲遍響賦佳辰。  
社耕百載猶賡續，史綻千秋欲郁醇。培育幼苗當務急，傳承德業靠吾人。

左十二右二八

張民選

欣逢亞歲迓新陽，鬥韻名流會一堂。啓後承先肩負重，扶清激濁筆添長。  
人間貢獻捫心問，海外交流引領望。過百社齡謙得益，聯聲合氣霸旗揚。

右十二左二九

洪世謀

癸巳欣逢長至時，緣何瀛社豎文旗？搓糰祭祖符深意，赴約驅車會故知。  
酌酒高吟摩詰句，暢談細賞少陵詩。且看鷗鷺祥樓敘，此日騷風蕩海湄。

左十三右二十

王尚義

瀛壇勝會萃名流，冬至圍爐意氣投。讚嘆連綿龍鳳榜，吟哦斷續吉祥樓。  
披箋擊鉢添新句，執手談詩感舊游。美酒盈樽須盡醉，及時行樂復何求。

右十三左三三

周福南

南枝春到放梅先，晝短宵長節序遷。騷客聯翩金石契，群雄樽俎竹林賢。  
敲詩韻事追山谷，鬪句才華繼樂天。瀛社搓丸觴詠處，吉祥樓內喜同筵。

右十四左二二

歐陽開代

寒流酷急著裘衣，瀛社吉祥爐火圍。擊鉢一心偷李杜，閒吟萬卷覓珠璣。  
莫慚名落孫山外，當悔書疎金榜違。每季鑿詩驚雋逸，鷺鷗群聚樂忘機。

左十六右二一

蔡業成

陽升陰伏轉洪鈞，瀛社聯吟氣味親。握手言歡話今古，揮毫琢句動星辰。  
日行北陸祥光麗，春到南枝曙色新。晝短宵長添白髮，舉杯互祝歲寒身。

左十七右二九

葉金全

佳節葭灰喜轉陽，歡欣吟宴慶禎祥。飛觴把酒春回夜，擊鉢揮毫日麗章。  
迎歲騷人多獻策，逢年駿馬合騰驤。雄才領導同仁擁，瀛社精神奮鬣揚。

右十七左二四

康濟時

癸巳陽生互問安，融融一社競搓丸。談心為契風騷法，脫手相成團結丹。  
你我歲添增智慧，伊誰節賀掃嚴寒。鴻鈞運轉蓬瀛日，滿滿圓圓天地寬。

左十八

許秉行

搓丸瀛社擊鉢鳴，翰墨緣深序弟兄。握手未曾談近況，飛觴先互讚高明。  
欣聯秋後文思勝，感觸當前政策盲。期願吾人吟體健，霜華敲句鬢邊生。

右十八左二六

翁正雄

應律馬年開首運，迎寒瀛社祝長庚。吉祥樓詠詩詞美，福壽人誇伉儷榮。  
梅信早傳徵氣節，湯團共製見精誠。一陽復始群陰伏，春到南枝萬物生。

左十九右三八

許今珍

冬至祥樓滿室春，鷗朋餐敘接良辰。香醪半盞詩腸潤，清茗盈喉貝齒津。  
瀛社四時倡風雅，騷壇千古出龍麟。更期自此紛爭少，吃罷湯圓氣象新。

右十九左三四

陳欽財

光陰荏苒轉洪鈞，暢月融風大地伸。冬至迎時鷗鷺爽，春臨應節梓桑新。  
湯圓剔透溫腸胃，鉢調清鮮拂鬼人。瀛社鑒詩弘雅契，掄元奪眼吉祥臻。

左二十右二六

李宗波

冬至團圓萃一家，詩賡瀛社筆生花。以文會友心相契，藉酒高歌興倍加。  
搓作湯丸循古例，宣揚國粹振中華。今朝聯誼情何逸，共敘鷗盟樂靡涯。

左二一右避

洪玉璋

至節陽生興轉濃，呼儔嘯侶鬪詞鋒。一團和氣迎新馬，眾預歡心送小龍。  
待寫梅花詩萬首，酣傾竹葉酒千鍾。即今瀛社鴻儒盛，道統弘揚未許慵。

右二二左三十

洪龍溪

又逢冬至一家圓，瀛社同仁締吉緣。團敘談情懷昔日，圍鍋祝福在今天。  
搓糰炖補心何爽，戛玉敲金志益堅。偏累廚師齊感激，歡迎令節繼年年。

左二三

郭三河

冬至欣逢聚百家，洪鈞氣轉筆開花。敲詩把酒心相契，鬪韻攤箋興倍加。  
騷幟高飄擲大雅，吟聲響亮燦中華。宏揚國粹期長久，瀛社名流信可誇。

右二三左三七

尤錫輝

瑞雪紛紛葉漸殘，家家循俗好加餐。魚雞多肉真滋補，薑芥生津更禦寒。  
年少飛觥呼嘯樂，老生高論滿心歡。詩吟瀛社逢冬至，暢敘和衷氣一團。

左二五右二七

陳保琳

陰行極處返陽途，履約群英德不孤。酌雅歌詩成就艷，弘經述道斐然殊。  
以文會友騷朋樂，對酒當歌翰墨娛。冬至聯歡情意愜，共期瀛社壯雄圖。

右二五左避

許哲雄

亞歲瀛壖百四過，鷗朋聚首話磋跎。陽微問暖談鋒健，晷短忘寒吟籟多。  
待臘心情隨筆縱，賀冬時節憶丸搓。喜從紅友催春訊，奚若聯珠促大羅。

左二八右四十

杜美華

葉盡吹葭冬至寒，秋聲遠颺小陽殘。驅涼雅客焙茶暖，吐繡騷人琢句安。  
百載共維瀛社譽，一堂齊聚吉樓歡。惟思肇始先賢德，戮力捐私意更寬。

右三十左三二

許又勻

冬風颯颯拂林丘，喜見紅梅嫩蕊抽。地肅庭前金菊艷，天寒嶺上白雲幽。  
薦神該日馳瀛社，邀鷺如期萃吉樓。會友以詩情最雅，聯歡把盞句相酬。

右三四左三六

徐世澤

朔風凜冽北台遊，自覺冬陽勝敝裘。不想徐行添雅興，趕來團敘泯鄉愁。  
吉祥樓內閒吟鶴，社友群中闊論鷗。幸賴微軀仍健壯，宏揚詩教莫言休。

右三六

余美瑛

禮天迎至酬佳節，日月相饒共此時。問子年來詩幾許，詢君歲晚戒何斯。  
求真致善無窮志，覓句尋新有味辭。文采有神交有道，湯團佐酒鷺鷗期。

右三七左三九

邱進丁

冬寒著暖囑騷翁，鷗暢瀛懷鷺作東。放眼高山冰雪下，醉心詩卷古今中。  
祥樓雅會喧長夜，烈酒溫身卻冷風。白髮何須愁日短，匡時快筆氣猶雄。

左四十

余雪敏

學詩入社是新兵，百載躬逢倍顯榮。全國聯吟開盛宴，鵲城論述益高名。  
奈何有隙傷和氣，期盼經寒萬籟鳴。團敘祥樓欣至日，開箋作賦慶昇平。

次唱：歲暮

左 詞宗 黃祖蔭 先生選  
右 王 前

左元右十五

林松喬

頻敲臘鼓上詞場，凜冽寒風氣激昂。時序翻新人事老，追思話舊入詩囊。

右元左二三

許今珍

草枯風勁雨輕狂，知己溫茶興味長。歲暮雖寒春更近，轉頭喜得臘梅香。

左二右十

杜美華

筆力詩心日月長，匆匆歲末又登場。徒增年齒蹉跎去，臘鼓聲中振志揚。

右眼左三十

游振鏗

臘鼓頻催暗自傷，駒光如駛冷風狂。晦居抱有凌雲志，處世全憑勵雪霜。

左三右五

劉清河

濕寒天氣冷無常，歲暮偏逢物價狂。多難之冬民受苦，春風何日惠窮鄉。

右花左十九

甄寶玉

天寒落木葉凋傷，迫近年關又雪霜。獨有騷人多寫意，樓台把酒熱詩腸。

左四右三一

鄭貴真

雲狗翩躚映九蒼，邇來生計壓詩囊。欣余最愛黃昏裡，五彩繽紛戀夕陽。

右四左十四

余雪敏

時光荏苒又經霜，政治紛爭亂象長。經濟衰微民困苦，陰霾速去盼冬陽。

左五右二二

陳麗卿

聖誕鐘聲四野揚，寒風雖勁未飛霜。新詩遣意工期進，蝸角虛名早已忘。

左六右二四

邱進丁

高山積雪播風霜，北鷺南鷗共舉觴。迎馬辭蛇敦友誼，祥樓雅聚引盃長。

右六左十六

洪玉璋

一年欲盡客他鄉，歡渡佳辰至節長。預送小龍迎駿馬，桃符待寫九如章。

左七

賴添雲

回首殘年幸得康，食安紛擾國深傷。揮戈壯志凌霜後，欣看蒼生正氣揚。

右七左三二

周福南

寒宵短景逐斜陽，臘鼓梅開百業涼。濁世嚴懲名利客，春回雪霽共稱觴。

左八

蔡業成

歲暮陽回樂未央，寒梅破臘酒詩香。雲濃風勁山容瘦，赤手迎春引興長。

右八

蔣孟樛

歲末烹茶夜更長，談天說地暢枯腸。山川變色糧油毒，看見台灣受百創。

左九右二七

徐世澤

毒油假米鬧商場，工廠排汙暗管裝。歲暮天寒逢漲價，黎民下箸感憂傷。

右九左三一

黃廖碧華

歲暮隆冬倍覺惶，滿頭烏髮又添霜。韶華易逝終無奈，勤讀詩辭惜寸光。

左十右二十

洪淑珍

溟濛冷雨一窗霜，又見庭梅送暗香。惟喜吟懷長不減，感時共勉策圖強。

左十一右二一

蕭煥彩

寒山木落見冬裝，臘鼓咚咚詩韻揚。不覺小龍年已盡，相催策馬國隆昌。

右十一

張民選

天寒水結北風狂，凍苦難熬覺歲長。世道酬勤肩負重，雖增馬齒更堅強。

左十二右二八

黃天賜

光陰莫笑七旬郎，多少風流夢裡藏。嗟歎老來多病苦，但期桃李滿詩囊。

右十二左十八

葉金全

臘梅初綻暗飄香，肇慶春歸瑞氣彰。迎接神駒臨寶島，奔騰萬里自堅強。

左十三右二六

鄧強

癸巳年終引興長，群賢敘舊萃天祥。節逢冬至華詞抒，勵志師生道益彰。

右十三左二十

楊錦秀

臘鼓頻吹餞歲忙，驚心世變太悲涼。河川毒染汙環境，經濟艱辛百姓傷。

右十四左二一

張耀仁

年已臨殘草樹荒，騷朋聚首話家常。蝸蟻國事人嗟歎，共醉旗亭引興長。

左十五

林禎輝

一生勞力積多忙，學道求來必有章。歲暮迎春誰識得，新年萬物悅無疆。

右十六左十七

陳淑芬

瀟瀟寒雨滿天霜，初蕊梅花浥冷香。夜坐闌珊聽淅瀝，年年老去懶梳妝。

右十七左二四

范文映

歲晚寒梅綺樹裝，欣看短日始偏長。鴻鈞氣轉頒新曆，頌禱來春國祚康。

右十八左二九

陳漢津

點雪梅花隔歲香，號風松柏一如常。平心享受年更迭，思自無邪壽自長。

右十九左二八

陳保琳

歲末陰窮始動陽，鴻鈞應律暑初長。頻聞臘鼓心懷愧，有待來年志願償。

左二二

李宗波

臘鼓頻喧日漸長，桃符將近換新粧。年青不覺如梭急，白首方知惜景光。

右二三

洪世謀

雁鳴殘月照寒堂，一事無成入醉鄉。夢想搓丸驚歲晚，唯期畫荻蕙蘭芳。

左二五右三二

吳秀真

臘鼓聲催歲暮忙，髮漸灰染志猶昂。詩吟教業勤耘作，來日枝芽滿郁香。

右二五左二七

許哲雄

漏促天寒萬象僵，辭年在即樂禎祥。曆殘春近人徵瑞，新紀可期歌擊壤。

左二六

康濟時

歲寒不忝利名場，日短無痕又一章。省識陰陽原自在，壽人壽己壽偏長。

右二九

林政輝

工商社會太猖狂，不為農漁竟日忙。理罷清塵旋饋禮，行人車陣比天長。

右三十

施得勝

經年鬱累為嬌娘，何事幾番掀舊創。不願湯圓孤夜嚙，重溫又勸共甜湯。

## 編後語

經過兩個多月的忙碌，《鄉土吟懷》與《瀛社題襟集》第二輯終底於成。緣許理事長自身公務繁忙，無法分身，責由個人佐理【瀛社百五周年詩書聯展】及專集編輯事宜，故於此作一報告。

本會自一〇一年許理事長接篆以來，除了自費購置房舍，捐贈本會作為社中文物、書籍、資料儲放外，並於去年（一〇一年度）籌辦【瀛社與臺灣詩學發展學術研討會】。其積極任事、前瞻性視野及求新求變之精神深值肯定，尤有甚者，其「向不居功而求回報」之態度，更是值得稱道。迥異於偶有小善即急者向人誇耀之丑表功心態。

就本輯《瀛社題襟集》編輯過程中，個人頗有深切之感觸。回憶早期瀛社以社課及擊鉢之作，唯祇選出投稿作品約三分之一敘獎，此在民國七、八十年代之前類皆如此。而今為鼓勵初學，皆選出四分有三，由於過度浮濫，造成社友「不讀書以求進步」之心態。此於近來之《瀛社題襟集》作品中，可以窺出端倪。不禁讓人想起清朝某位名人初次看到籃球比賽，大家共搶一求時的一句名言「為何搶來搶去，每個人各發一顆球不就解決了」的故事。加以當今詞壇，已經走向偏鋒，處處充斥者錯謬之觀念與風氣，又因許多詩友無法自力辨別是非對錯而受其誤導，造成積非為是的情況，略述於下：

大凡詩句與文句，其結構各有不同。文句注重語義結構。詩句注重語音結構，由此形成文體與詩體之差異。時下詩人，無法區分詩體與文體，所寫句子，分不清是詩句或是文句。綜觀近來詩家之作，用詞造句，頗有低俗化與便利化趨向，所謂俗者如「大腸麵線人人愛，一碗三元五角銀」之類，就格律與句法言，並無毛病，然而予人之感覺，就是一個「俗」字。便利者如將成語整句套用，毫無創意可言。合掌者如將「紅男綠女」、「天南地北」等拆開，分嵌於一聯中之上下句，亦即浪費字詞，有違「最精煉之字詞，表述最豐富之內容」之原則。至於「天南地北」等句中自對之句，偶一為之，固然無妨，然如一首詩中一再重複運用，則亦予人過於便利且缺少變化之譏，能不慎哉！

「轉益多師」固是學習進程中不可少之經驗，然各個老師見解或有差異，從學者如程度不夠，無法自我辨別，則易為老師個別觀念所引導，更因為好處不易學，而壞處一學即上手，而致路頭愈走愈差。

詞宗評詩，原本好詩之佳處為何？劣者其劣處為何？必皆有所交待。考之學術界及全國性徵詩比賽之評審感言，莫不如此。而民間詩社之詞宗，因恐示人以柄，率皆只評好者，而於劣者則不敢輕置一詞，以為藏拙。另有因詞宗本身素質低下而肆意亂評，造成程度較低者受其誤導，以致認知歧誤。而程度較高之作者，因不願受詞宗之糟蹋而不投稿，致成

「劣幣驅逐良幣」之局面，寧非詩壇之一厄，並使人對瀛社滋生誤會。古人有云「一字入公門，九牛拖不出。」形諸於書面者，何嘗不是如此。對詩作肆意亂評者，固可自欺或欺瞞初學者，然一旦或有寸進，而能自我辨識時，則不知將何以自處，至於毫無羞恥之心者則不論。詞宗選詩誤判固所難免，然而經人指出卻是怒言反嗆，難怪爾後無人願意予以指正。

另外，詞宗選詩，因本身學養不足，肆意點竄作品，如將「喜際天妃降誕辰」點竄為「喜『祭』天妃降誕辰」造成文義不通，一字之訛謬以千里（此乃實例，所幸後來經主辦人員重新訂正，方不至貽笑方家）。

有關罵題之作，殊失溫柔敦厚之詩旨，一向被視為不入流之作品，與格律不合者並為棄稿。此在詩齡較久之詩人，率皆知曉。而今卻被拱為主流，難怪詩風日下。作之者自以為得計，罵得震天價響，殊不知已墜魔道而不自知，宜乎淪為識者之譏。詩人天職，固然是站在當政者之對面，以扮演監督角色。負面文章非不能寫，唯必以「含蓄」方式出之，即如詩聖杜甫，言及上位者之窮兵黷武，亦只云「武皇開邊意未已」（〈兵車行〉）。白傅之述玄宗荒淫，亦唯「漢皇重色思傾國」（〈長恨歌〉）。至如三百篇之述衛宣公之殘害公子伋及二子爭相為死之事，亦只云「願言思子，不瑕有害」而已，何等溫柔，何等含蓄，所謂「言之者無罪，聞之者足以戒」者是也。於此引述民國二十年（日治昭和六年）八月十五日出刊之《詩報》第十八號十三版黃梅生〈松社漢詩研究會序〉所云：「……玩所彙集，非無一、二傑作也，大抵語直意淺，句俗辭露，音韻輕浮而迫促，詞氣叫噪而怒張，殊乖忠厚之風……」一段，俾供參考。

舉凡藝文，所要求的是創意，詩學一道，與之書畫並同，必須自模仿而躋於創造，即以「詩」論，所要求乃是「意新、句新、詞新」。觀乎當今詞壇作者，大都處於臨摹階段而無法有所突破以達於自創程度。簡言之，即是將「習作」當成「創作」，如同書畫之以臨摹為創作。（對於走向自我創作一道，個人也處在摸索階段，只是多具一分內在自省之心而已。）綜觀社課作品，部分社友甚至連命題都無法自我完成，更遑論及「新」字，宜乎引致他人之詬病。此由各組之命題方式，即可見出一般。團體中之一般會員，或可抱持玩票心態，然而作為各組領導人，乃是訓練爾後領導全社之奠基工作，身繫團體興衰之重責大任，如不具有「與時俱進」之思維，則不知將何以領導。當茲政府當局與產學各界，競相以「文創」為號召之情況下，凡我同仁，如未能體認情勢，一味因循苟且，則整個瀛社之前景堪慮矣。以上諤諤之聲，讀之者或有以為逆耳拂心，然為瀛社甚而為整個傳統詩壇計，亦不得不言耳！（編者）